

DIDZA' DXI'A BUZÚAJĚ' LUCAS

Didza' rigu'ë Lucas lu nē'ë Teófilo

¹ Zián nupa chigulún bayudxi ulu'zúaj lu guichi idútë le nácatë, le guca ga zóaru', ² ca na' bila'lé'e nupa ni' dza ni'te, ate' bulu'luí'i rë'u, en bulu'zë didza' que. ³ Teófilo, bönni' tsáhui'do', runi neda' naca dxi'a uzúaja' quiu' lu guichi, ga ze lo dzö' yúgu'të lë ni, tu' chibuguílaj bubéquia' ga ze lo dzö' ca naca yúgu'të lë na' guca dza ni'te. ⁴ Ruzúaja' quiu' lu guichi ni para inözinu' naca idútë li lë na' chinazëdu'.

Rulu'inë' gubáz lá'ayi queë' Dios ca si' gálajbi' Juan, bönni' uquilë' bönachi nisa

⁵ Dza ni'te cate' gunná bē'ë Herodes luyú Judea, ni' zoë' tu bixúz lë' Zacarías. Nabábalenë' cö' bixúz, nazí'i le Cö' Queë' Abías. Elisabet, nigula queë' Zacarías na' nácanu ca' zxí'ini xi'sóë' Aarón, bönni' gúquië' bixúz lo dza ni'te. ⁶ Nácagaquië' Zacarías, en Elisabet tsahui' lahuë' Dios, ate' idú ládxi'gaquië' tunë' ca rnna xtídzë'ë Dios, en le rinná bē' xibá queë'. Caní guca, cuntu nu guca bi inné quégaquië'. ⁷ Cuntu nu zoa bi'i quégaquië', tu' nácanu Elisabet nigula huödx, ate' chinagúlagaquië' irópatë'.

⁸ Guca beo' gul-la' uláz que cö' na' nabábalenë' Zacarías ilunë' dxin lahuë' Dios, lu yöl-la' bixúz quégaquië'. ⁹ Ca naca le nulaga lógaquië' tunë' bixúz, gul-la' uláz queë' Zacarías guyázië' lu lataj lá'ayi que yudo' para uzégui'ë yalaj lahuë' Xanru' Dios. ¹⁰ Tsanni ni' ruzégui'ë Zacarías na' yalaj,

gula'cuá' yúgu'të bönachi ní'ilo, tu'lidza Dios. ¹¹ La' ná'sö buluí'i lahuë' gubáz lá'ayi queë' Xanru' ga zoë' Zacarías na'. Zuínë' gubáz na' tsölá'a ibëla bucugu lá'ayi ga na' régui yalaj. ¹² Cate' bilé'enë' Zacarías gubáz lá'ayi na', gurö'ë böniga, en gudxi bidzöbinë'. ¹³ Ní'irö gubáz lá'ayi na' gudxë' lë', gunnë':

—Zacarías, biti' gádxinu', tu' chibiyönnë' Dios le rinabu' lahuë', ate' Elisabet, nigula quiu', uzóanu-bi' tubi' bi'i bönni'do', ate' gu'u labi' Juan. ¹⁴ Gata' quiu' le uzi'u xibé, en udzéjanu', ate' zían nupa ulu'dzeja ládxi'gaca cate' gálajbi' bí'ido' na', ¹⁵ tu' gácatëbi' zxön lahuë' Dios. Biti' gu'ajbi' xisi uva, en calëga tu le rusudxi bönachi, ate' sóalenë'-bi' Dios Bö' Lá'ayi cate' isí lo si' gálajbi'. ¹⁶ Gunë' Juan ni ga ulu'huóáca zían bönachi Israel queë' Xanru'. ¹⁷ Inöruë' lë' ca Xanru', ate' ila'cuá'alén lë' Bö' na', en yöl-la' huáca na' gula'cuá'alén Elías, bönni' bë'ë didza' uláz queë' Dios dza ni'te. Caní gunë' para únë' tuz nupa nácgaca xuz len zxí'inigaquië', en uzéajni'inë' nupa ta'dá'baga' para ilácgaca tsahuí', en ucözë' bönachi para ila'zí' lu né'eguequi Xanru'.

¹⁸ Zacarías gunábinë' gubáz lá'ayi na', rnnë':

—¿Bizxi gaca bë' para inözda' ilaca lë ni? Chínagúla' neda', en chínagúlanu ca' nigula quia'.

¹⁹ Bubi'ë didza' gubáz lá'ayi na', rnnë':

—Neda' lea' Gabriel. Runa' dxin lahuë' Dios. Lë cazë' gusöl-lë'ë neda' para gü'ílena' li' didza', en usiyönda' li' didza' dxi'a ni. ²⁰ Na'a, tu' cabí guyéajlë'u xtídza'a, icödzu', en bítirö gaca innó' cate' gácarö lë ni. Yúgu'të lë ni udxín cate' idxín dza que.

21 Tsanni ni' raca lë ni, nacuá' bönachi ní'ilo, ta'böza Zacarías, ate' tu'bani tu' ridzenë' xidzé ga na' zoë' lu lataj lá'ayi. 22 Cate' burúajë' Zacarías, biti' guca gü'ilenë' légaquië' didza', ate' guléquibe'enë' bilé'enë' tu le buluí'inë' Dios lë' lu lataj lá'ayi. Bulá'a buluí'isë' Zacarías, buzéajni'inë' légaquië', tu' cabí raca innë'.

23 Cate' bizá'a yugu' dza na' ral-la' gunë' dxin Zacarías lahuë' Dios, ní'irö böajë' lidxë'. 24 Gudödi yugu' dza na' Elisabet, nigula queë' Zacarías na', biá'anu-bi' lë'ënu bí'ido', ate' idú gayu' beo' bugá'anasinu ga zoa lídxigaquië'. Guzá' ládxi'nu, rnnanu: 25 "Caní runë' Xanru' quia'. Ruzá' ládxië' quia' bí'ido', en runë' ga bíti'rö utuí'ida' lógaca bönachi."

Rigúixjö'ë gubáz lá'ayi ca si' gálajbi' Jesús

26 Cate' chiguca xopa beo', buluí'i lahuë' gubáz lá'ayi na', tu' gusöl-lë'ë Dios lë cazë' Gabriel, tsejë' Nazaret, tu yödzo luyú Galilea. 27 Dios gusöl-lë'ë lë' ni' tsöjyüë'-bi' tubi' bi'i nigula ra'bando' lëbi' María. Chinazí' lu ná'abi' María utsaga ná'aleni'-në' bönni' lë' José. Nababë' José di'a dza queë' David, bönni' gunná bé'enë' bönachi Israel dza ni'te. 28 Cate' guyázië' Gabriel na' ga zóabi' María, gudxë'-bi':

—Padiux. Dios ruzá' ládxië'ë quiu'. Xanru' Dios zóalenë' li'. Lë cazë' benë' ga nácaru' li' bica' ba ca yúgu'të nigula.

29 Cate' bilé'ebi' María gubáz lá'ayi na', gurö'öbi' böniga tu' nözi didza' na' bë'ë, en rubani ládxi'bi' nacxi sa'yéaj didza' na' bulidzë'-bi' gubáz lá'ayi na'.

30 Ní'irö gubáz lá'ayi na' gudxë'-bi', rnnë':

—María, bití' gádxinu', tu' chibidéli'nu' le ruzá' ládxe'ë Dios quiu'. ³¹ Na'a, tsú'ubi' tubi' bí'ido' lë'u, ate' uzú'-bi' tubi' bi'i bönni'do', ate' gu'u labi' Jesús. ³² Jesús ni tsépisëtë'rë', en si' Lë' Zxí'inë' Dios, Nu nayëpisëtë'rö. Xanru' Dios gunë' ga inná' bë'ë ca na' gunná' bë'ë David, xuz gula gudödi queë'. ³³ Jesús na' inná' bé'etica'sinë' bö'nachi Israel, ate' le inná' bë'ë Lë' catu caz tödi que.

³⁴ Ní'irö María gunábibi' gubáz lá'ayi na', rnnabi':

—¿Nacxi caz gaca lë ni, tu' cabí' zóalena' bönni'?

³⁵ Bubi'ë didza' gubáz lá'ayi na', rë'ë-bi':

—Guidë' Dios Bö' Lá'ayi ga zu', ate' yöl-la' huáca queë' Dios, Nu nayëpisëtë'rö, sóalen li', le gaca ca tu zzul-la rigú'u böaj ga zu'. Que lë ni na' bi'i bönni'do' na' ral-la' gálajbi', tsú'ubi' lu në'ë Dios, ate' si' labi' Zxí'inë' Dios. ³⁶ Cá'anqueze Elisabet, nigula dí'a dza quiu', chinuá'anu-bi' lë'ënu tubi' bi'i bönni'do' sal-la' chinagúlanu. Gula'nnë' queënu: “Nácanu nigula huödx”, pero chizéaj xopa beo' nuá'anu-bi' lë'ënu bí'ido' na'. ³⁷ Biti' bi' zoa le cabí' séqui'në' Dios.

³⁸ Ní'irö María gunabi':

—Ni zoa'. Tsaz naca' huen dxin queë' Xanru'. Gaca quia' ca na' chigunnó'.

Ní'irö la' buza'të' gubáz lá'ayi na' ga zóabi' María.

María söjyubi'-nu Elisabet

³⁹ La' dza ní'isö guyú'ubi' nöza María, ate' carelö sa'yéajbi' ga naca guí'ado', en bidxinbi' tu yödzo luyú' Judea. ⁴⁰ Ni' guyázabi' lidxë' Zacarías, en gúdxibi'-nu Elisabet:

—Padiux.

41 Cate' biyönninu Elisabet didza' na' bë'ëbi' María, la' butátë cuinbi' bi'i huë'ënido' na' yú'ubi' lé'ënu, ate' bidisóalenë'-nu Dios Bõ' Lá'ayi. 42 Ní'irõ bë'ënu Elisabet zidzaj didza', rnnanu:

—¡Chinunë' Dios ga nácaru' li' bica' ba ca yúgu'të nigula, en chinunë' ca' ga nácabí' bica' ba bí'ido' na' yú'ubi' lë'u! 43 ¿Núzxitë neda', zá'anu xinë'ë Xana' quia'? 44 Cate' biyönda' didza' bë'u, bulidzu' neda', lu yöl-la' rudzeja queëbi' la' butátë cuinbi' bi'i huë'ënido' ni yú'ubi' lë'a. 45 ¡Bica' ba li' tu' guyéajlë'u xtídzë'ë gubáz lá'ayi, ate' udxín caz lë na' gudxë' li' uláz queë' Xanru'!

46 Ní'irõ gunabi' María:

¡Idútë le naca' rigú'u Xanru' yöl-la' ba,

47 en rudzeja ládxi'lena'-në' Dios, Nu rusölá neda'!

48 ¡Dios caz buzá' ládxi'ë quia' neda'!

Yu'a lu në'ë, en tsaz naca' huen dxin queë'.

Na'a isí lo, ca naca' quia' ila'nná:

Bica' ba nigula na'.

49 ¡Zxöntëro naca le benë' Dios unná bë' quia'!

¡Lá'ayi naca Lë'!

50 Lë' ruhuéchi' ládxi'tica'së' bönachi tadxi Lë' na'a dza, en dza zá'gaca.

51 Yugu' yöl-la' huáca zxön chibenë' Lë'.

Buzõtjë' nupa gulún zxön yöl-la' réajni'i quéguequi.

52 Bugúë' yöl-la' unná bë' quégaca nupa gulaca lo, en benë' ga gulaca lo nupa gulaca nõxaj ladxi'.

53 Benë' ga bulu'huólaj bulu'dzë'e nupa gula'dún, en bucá'anë' cá'asö nupa bila'lé'e yöl-la' tsahui'.

54 Gúcalenë' bönachi Israel, nupa na' tun xichinë', tu' yöjnenë' légaquië', en buéchi' ládxi'ë légaquië'.

55 Benë' ca guzxi' lu në'ë gunë' quégaquië' xuz xtó'oru' enca' queë' Abraham, en quégaca di'a dza queë'.

56 María bugá'analenbi'-nu Elisabet idú ca tsonna beo', ate' gudödi ni' böajbi' lídxibi'.

Le guca cate' gúlajbe' Juan, bönni' uquilë' bönachi nisa

57 Cate' bidxín dza ral-la' sóabi' bí'ido' queënu Elisabet, buzóanu-bi' tubi' bi'i bönni'do'.

58 Bila'yöni dzaga yu'u queënu, en yugu' di'a dza queënu ca na' guca, buéchi' ládxë'ë-nu Dios, ate' bulu'dzëjalen lënu. 59 Cate' chiguca xunu' dza zóabi' bí'ido' na', bila'dxinë' di'a dza queënu para ila'chúguië' lu xipëla'bi' bi'i bönni'do' na' lë na' gaca bë' néquibi' queë' Dios, ate' t'ënnë' ilu'ë labi' Zacarías ca na' lë' xúzibi'. 60 Ní'irö bubí'ínu didza' Elisabet, xiná'abi', rnnanu:

—Calëga. Juan si' labi'.

61 Gula'nábinë'-nu, ta'nnë':

—¿Bizx que? Cuntu nu di'a dza quiu' lë' Juan.

62 Ní'irö bulu'lá' bulu'luí'isinë', gula'nábinë' xúzibi' nacxi rë'ënë' gu'ë labi'. 63 Zacarías na' gunabë' tu blágado', ate' buzúajë' lahui caní: Juan lëbi'. Bulu'bábinë' yúgu'të'. 64 La' ní'sö böáljatë ru'ë Zacarías na', en bugúitjatë lúdxë'ë, ate' bë'ë didza' le gulu'ë Dios yöl-la' ba. 65 Ní'irö guládxinë', en bulu'bábinë' yúgu'të dzaga yu'u quégaquië', ate' yúgu'të yödzödo' nacuá' lu guí'ado' luyú Judea, guzë didza' ca guca lë ni. 66 Gula'zá' ládxigaca yúgu'të nupa bila'yöni ca na' guca, ta'nná: “¿Nacxi caz gácabi' bi'i bönni'do' ni? Le nácatë Xanru' zóalenë'-bi'.”

Didza' bē'ē Zacarías uláz queē' Dios

67 Ní'irō Dios Bō' Lá'ayi bidisóalenē' Zacarías, xúzibi' Juan, ate' bē'ē didza' uláz queē' Dios, rnnē':

68 ¡Yöl-la' ba Dios, Xángaca bönachi Israel

tu' buduyúē' rē'u, bönachi queē', en böá'uē' rē'u!

69 ¡Gusöl-lē'ē queēru' Bönni' usölē' rē'u,

len yöl-la' huáca zxön queē'!

Bönni' ni guljē' ládajgaca di'a dza queē' David,

huen dxin queē' Dios.

70 ¡Dza ni'te guzxí' lu nē'ē gunē' ga gaca caní!

Raca ca na' gunné' lu ruá'agaquiē' bönni' gulu'ē
didza' uláz queē'.

71 Guzxí' lu nē'ē usölē' rē'u

lu ná'agaca nupa tequi rē'u zi',

enca' lu ná'agaca nupa bití' ta'lé'e rē'u dxi'a.

72 Guzxí' lu nē'ē huéchi' ládxe'ē xuz gudödi queēru',

en tsöjnenē' le guzxí' lu nē'ē le naca lá'ayi.

73 Lē ni benē' tsutsu xtídzē'ē, en guzxí' lu nē'ē,

le gunē' queē' Abraham, xuz gudödi queēru',

le naca tu le ral-la' gunē' queēru' rē'u.

74 Guzxí' lu nē'ē usölē' rē'u

lu ná'agaca nupa bití' ta'lé'e rē'u dxi'a

para cabirö gádxiru' gunru' xichinē' Lē',

75 en para gácaru' ba'a ladxi', en idú dxi'a

lahuē' Lē' yúgu'tē dza sóaru' ibanru'.

76 Li', xzí'ina'do', si' lo' bönni' ru'ē didza' uláz queē'

Dios unná bē'

tu' tsöjnöru' ca Xanru' caz, en upó'o nöza ga tödē'.

77 Gunu' ga ila'nözi bönachi queē' ca gaca ulu'lágaca,

en ca na' uniti lahuē' Dios dul-la' nabága'gaca.

78 Caní gaca, tu' ruhuéchi'da' ládxe'ē Dios rē'u,

en runē' ga tsení' queēru' Bönni' na' náquiē' bení
idú.

79 Lë' uzení'ë quégaca nupa nacuá' gapa naca chulla,
 en gapa nacuá' nupa chizóa ilátigaca
 para ugu'ë rë'u nōza ga cō'ō dxi lādxi'do'oru'.

⁸⁰ Guzxōnbi' bi'i bōnni'do' na', en bidipa lādxi'bi'.
 Guzóasibi' gapa naca lu lataj cá'asō cate' bidxinrō
 dza buluí'i lobi' lógaca bōnachi Israel.

2

Le guca cate' gúlajbi' Jesús (Mt. 1:18-25)

¹ Lu dza na' gunná bē'ë Augusto César, bōnni' Roma, ila'yaza lu guichi yúgu'tē bōnachi nacuá' yōdzōlió. ² Cate' gusí lo ta'yaza lu guichi caní, rinná bē'ë bōnni' lē' Cirenio luyú Siria. ³ Yúgu'tē bōnachi yōjaca yōdzō que queéquequi ga na' zeaj nababa para ila'yaza lu guichi. ⁴ Guzé'ë José yōdzō Nazaret luyú Galilea, sa'yéajē' luyú Judea, en bidxinē' yōdzō Belén, ga ni' guljē' David, tu' guljē' José lādajgaca di'a dza queē' David na'. ⁵ Guyijē' José ni' para tsáziē' lu guichi, ate' dzágabi'-nē' María, bi'i nigula nazí' lu ná'abi' utsaga ná'alēnbi' lē', en chizóa sóabi' bí'ido' queēbi'. ⁶ Cate' ni' nacué' lu yōdzō Belén, bidxín dza sóabi' bí'ido' queēbi'. ⁷ Buzóanu-bi' tubi' bi'i bōnni'do', bi'ihuáca queēnu. Buchōlinu-bi' yugu' lári'do', ate' gudíxjanu-bi' tu lu yú'udo' ga tun chí'i le táguba' bōa' quégaca bōnachi yú'ugaca nōza. Caní guca, tu' cabí bidzōli lataj ila'cu'ë lu yu'u ga ni' ta'dxín bōnachi yú'ugaca nōza.

Tu'lú'i lahuē' gubáz lá'ayi queē' Dios ga nacué' bōnni' tu'yúē'-ba' bō'cu' zxila'

⁸ Gala' ra' yödzö Belén nacu'ë bönni' tu'yúgaquië'-ba' bö'cu' zxila' la' guixi', tapa chí'igaquië'-ba' chí'i dzö'ölö. ⁹ La' buluí'të lahuë' gubáz lá'ayi queë' Xanru' ga na' nacu'ë. Yöl-la' beni' queë' Xanru' buzení' ga na' nacu'ë, ate' guládxinë'. ¹⁰ Ní'irö gubáz lá'ayi na' gudxë' légaquië', rnnë':

—Biti' gádxili'. Na'a rusiyönda' libí'ili' didza' le gun ga udzėjade'eli', le ulu'zí' ca' xibé yúgu'të bönachi. ¹¹ Na'a chigúlajbi' lu ladzë' David Nu usölá libí'ili'. Nu ni naca Cristo, Xanru'. ¹² Lë ni gaca bé'ëbi'. Udzöllili'-bi' Bí'ido' na', narölibi' yugu' lári'do', en dëbi' tu lu yú'udo' ga tun chí'i le táguba' böa' quégaca bönachi yú'ugaca nöza.

¹³ Ga na' zoë' gubáz lá'ayi na', tsárido'os bulu'luí'i lógaquië' zíanrö ca' gubáz lá'ayi queë' Dios, narúajgaquië' yehua' yubá, en ta'gu'ë Dios yöl-la' ba, ta'nnë':

¹⁴ ¡Yöl-la' ba Dios zoë' xitsá',
ate' luyú gaca le cuéqui dxi ládxi'do'gaquië'
bönni' raza ládxe'ë Dios légaquië'!

¹⁵ Cate' bulu'zë'ë gubáz lá'ayi na' ga ni' nacu'ë, söjhuöjgaquië' yehua' yubá, ní'irö gulë luzë'ë tuë' ia'tué' bönni' uyú bö'cu' zxila' na', ta'nnë':

—Uyéajtsöca'ru' Belén para ilé'eru' lë ni chiguca ca na' chibusiyönnë' Xanru' rë'u.

¹⁶ La' yöjácatië', ate' yöjácagaquië' María len José, enca' bí'ido' na', dëbi' tu lu yú'udo' ga tun chí'i le táguba' böa' quégaca bönachi yú'ugaca nöza. ¹⁷ Cate' bila'lé'enë' lëbi', gula'guíxjö'ë lë na' si' busiyönnë' gubáz lá'ayi na' légaquië' ca naca queëbi' bí'ido' na'. ¹⁸ Bulu'bani yúgu'të nupa bila'yöni didza' gulu'ë bönni' tu'yúé' bö'cu' zxila'

na'. ¹⁹ María gulú'usö icja náganu didza' ni, ate' guzá' ládxi'nu ca naca que. ²⁰ Söjhuöjgaquië' bönni' na' tu'yúë'-ba' bö'cu' zxila', tunë' zxön Dios, en ta'gu'ë Lë' yöl-la' ba ni'a que yúgu'të lë na' bila'yönnë', en bila'lé'enë', le guca ca na' busiyönnë' gubáz lá'ayi na' légaquië'.

Ta'gu'ë-bi' bí'ido' Jesús lu në'ë Dios

²¹ Cate' chiguca xunu' dza zóabi' bí'ido' na', gula'chúguië' lu xipéla'bi' lë na' naca bë' néquibi' queë' Dios, ate' gulu'ë labi' Jesús ca na' chibë' cazë' labi' gubáz lá'ayi na' zí'alö cate' si' tsú'ubi' lë'ënu xiná'abi'.

²² Cate' chibizá'a dza que le tu'pá'a cuíngacanu nigula ca rinná'bë' xibá queë' Moisés, gula'ché'ë-bi' bí'ido' Jesús yödzo Jerusalén para ila'gu'ë-bi' lu në'ë Xanru' Dios. ²³ Caní gulunë', tu' nazúaj lu guichi lu xibá queë' Xanru' le rnna: "Yúgu'tëbi' bi'i bönni'do' nácagacabi' bi'i zí'alö queënu xiná'agacabi', ulu'béajë'-bi' quez queë' Xanru' Dios." ²⁴ Que lë ni na' yöjáquië' ni' para ilútië'-ba', en ila'gú'ë-ba' lahuë' Dios chópaba' gúgudo' o chópaba' budödu' ca na' rinná'bë' xibá queë' Xanru' Dios.

²⁵ Dza ní'isö zoë' tu bönni' lë' Simeón lu yödzo Jerusalén. Bönni' ni náquië' tsahui', en reaj ládxe'ë Dios. Ribözë' Bönni' na' isöl-lë'ë Dios, Bönni' na' gácalenë' bönachi Israel. Dios Bö' Lá'ayi zóalenë' Simeón na', ²⁶ en chibulu'ínë' lë' biti' gátië' cate' ilé'erönë' Cristo, Bönni' na' isöl-lë'ë Xanru' Dios. ²⁷ Bidxinë' Simeón na' chila yudo' tu' guchë'ë Dios Bö' Lá'ayi lë' ni'. Cate' xuz xiná'abi' gula'ché'ë-bi' bí'ido' Jesús chila yudo' para ilunë' queëbi' ca

rinná bē' xibá na', ²⁸ ní'irō bunidē'-bi' Simeón na', en guyéaj lādxi'ē Dios, rnnē':

²⁹ Xana', na'a huáca gunnu' neda' lataj gátia', soa dxi lādxa'a

tu' chiguca le gudxu' neda', huen dxin quiu'.

³⁰ Chibilé'eda' Nu na' buzóa cazu', Nu usölä bönachi,

³¹ Nu na' ulú'u lahui lógaca yúgu'tē bönachi.

³² Lēbi' nácabi' bení' le uzení' bönachi izá'a, en nácabi' ca' bení' quégaca bönachi Israel quiu'.

³³ Bulu'báninē' José, en María, xiná'abi' bí'ido' Jesús, ca naca lē na' gunnē' Simeón ca naca queēbi' Jesús. ³⁴ Simeón na' gunábinē' Dios gunē' ga gaca dxi'a quégaquiē', ate' gudxē'-nu María, xiná'abi' Jesús, rnnē':

—Buyútsöca'. Bi'i ni nuzóē'-bi' Dios para gunbi' ga ila'chixi bönachi zían, ate' ulu'huóása bönachi zían ladaj bönachi Israel. Gácabi' tu le naca bē', ate' ila'nnē bönachi queēbi'. ³⁵ Gaca caní para ila'lá' lahui le ta'zá' lādxi'gaca bönachi zían. Yugu' lē ni ilaca quiu' ca tu guíē tuchi' le tsaza lādxi'do'o.

³⁶ Ana, nigula ru'ínu didza' uláz queē' Dios, zóanu ca' ni'. Nácanu zxi'inē' Fanuel, bönni' nababē' di'a dza queē' Aser. Chinagúlada'anu Ana na', tu' guzóalenu bönni' queēnu idú gadxi iz gudödi gúcanu ra'bando', ³⁷ ate' bugá'ananu tuzi cate' bidxintē dza chiyú'unu idú ca tápalalaj yu' tapa iz. Biti' ca' rubí'i ruzá'anu ga naca chila yudo'. Rēla, en te dza reaj lādxi'nu-nē' Dios, runnu gubasa, en rulídzanu-nē' Dios. ³⁸ La' ná'asö bidxintēnu ni', rēnu-nē' Dios: "Xclenu." Gudíxjöi'ínu yúgu'tē bönachi ca naca queēbi' bí'ido' Jesús, bönachi na'

nacuá' Jerusalén, nupa ta'böza dza idxín Nu na' isöl-lë'ë Dios para gácalen bönachi.

Söjhuöjgaquië' José, en María yödzo Nazaret

³⁹ Gudödi gulunë' José, en María yúgu'të le rinná bë' xibá queë' Xanru' Dios, yöjhuöjgaquië' ládzagaquië' Nazaret luyú Galilea. ⁴⁰ Guzxönbi' bí'ido' Jesús, en bidipa ládxi'bi'. Guta' queëbi' yöl-la' réajni'i, ate' zxön naca le ruzá' ládxe'ë queëbi' Dios.

Rudxinbi' bí'ido' Jesús chila yudo'

⁴¹ Yugu' iz röjáquië' xuz xiná'abi' Jesús Jerusalén cate' raca Laní Pascua, laní tu'subanë' bönni' judío ca benë' Dios, bubéajë' xuz xtó'ogaquië' luyú Egipto. ⁴² Cate' chiyú'ubi' chinnu iz bi'i Jesús, yöjáquië' Jerusalén ca tun cazë' cate' raca laní na'. ⁴³ Cate' gudödi laní, söjhuöjgaquië', ate' bugá'anabi' bí'ido' Jesús Jerusalén, pero biti' téquibe'enë' José, en María, xiná'abi' Jesús. ⁴⁴ Tu' téquinë' nútsa'bi' ladaj bönachi zían yú'ulengaca légaquië' nöza, tu dza nayá' gula'zë'ë. Ní'irö cate' bulu'guiljé'-bi' gapa nacué' di'a dza quégaquië', en gapa nacué' nupa núnbë'gaquië' ⁴⁵ biti' bulu'dzölinë'-bi'. Que lë ni na' yöjhuöjgaquië' Jerusalén, söjdíljagaquië'-bi'.

⁴⁶ Cate' chiguca dza bunny, bulu'dzölinë'-bi' ga naca chila yudo', rö'öbi' gatsaj láchui'lë' bönni' yudo' tu'sédinë'. Ruzë nágabi' didza' tu'ë, en rinaba yúdxibi' légaquië'. ⁴⁷ Bulu'bani yúgu'të nupa bila'yöni didza' bë'ëbi' ca naca yöl-la' réajni'i queëbi', en ca nácagaca didza' bubí'ibi'. ⁴⁸ Cate' bila'lé'enë'-bi' xuz xiná'abi', bulu'bánninë', ate' gúdxinu-bi' xiná'abi', rnnanu:

—Zxi'ina', ¿bizx que benu' caní queëtu'? Buyútsöca', len yöl-la' ruúbi ruguí'i neda', en xuzu' buguúljatu' li'.

⁴⁹ Ní'irö gúdxibi' Jesús légaquië', rnnabi':

—¿Bizx que buguúljali' neda'? ¿Naru' cabí nözili' run bayudxi guna' xichinë' Xuza'?

⁵⁰ Biti' gula'yéajni'inë' xuz xiná'abi' didza' na' gúdxibi' légaquië'.

⁵¹ Jesús böajlenbi' légaquië', budxinbi' Nazaret, ate' benbi' ca rna xtídza'gaquië' xuz xiná'abi'. María, xiná'abi' Jesús, gulú'usönu icja ládxi'do'onu yúgu'të læ ni. ⁵² Ráta'rö yöl-la' réajni'i queëbi' bi'i Jesús, en rizxönbi'. Burúajbi' dxi'a lahuë' Dios, en lógaca bönachi.

3

*Libán runë' Juan, bönni' ruquilë' bönachi nisa
(Mt. 3:1-12; Mr. 1:1-8; Jn. 1:19-28)*

¹ Cate' chiguca chinu iz rinná bé'enë' Tiberio César idútë yödzölió, rinná bë'ë Poncio Pilato luyú Judea, ate' Herodes rinná bë'ë ca' luyú Galilea. Felipe, böchë'ë Herodes na', rinná bë'ë luyú Iturea, en luyú Traconite, ate' Lisantias rinná bë'ë luyú Abilinia. ² Yugu' dza na' nácagaquië' bixúz lo Anás, en Caifás, ate' la' ná'asö Dios bë'lenë' Juan, zxi'inë' Zacarías, didza' cate' ni' zoë' Juan lu lataj cá'asö. ³ Ridë' Juan ni yúgu'të lataj nacua' ra' yegu Jordán, runë' libán ca ral-la' ila'dila nisa nupa tu'bí'i ládxi'gaca para uniti lahuë' Dios dul-la' nabága'gaca. ⁴ Guca caní ca na' nazúaj lu guichi lá'ayi yugu' didza' bë'ë Isaías, bönni' bë'ë didza' uláz queë' Dios, rna:

Riyón chi'ë bönni' rulidzë' lu lataj cá'asö, rnnë':
 “Buli'pá'a nöza lu icja ládximo'oli' para idxín Xanru'
 queéli'.

Buli'béaj li yugu' nöza lasi ga tödë'.

⁵ Ral-la' ulígaca yúgu'të gapa naca röga',
 en ulu'huóáca lachi' yúgu'të gu'a sibi, en gu'ado'.
 Ral-la' ulu'rúaj li nöza nayecja nabí'igaca,
 ate' ulu'huóáca dxi'a nöza guiöj.

⁶ Ila'lé'eni yúgu'të bönachi Bönni' na' isöl-lë'ë Dios,
 Nu usölá bönachi.”

⁷ Cate' bila'rúaj bönachi zían para ila'dila nisa lu
 në'ë Juan, lë' gudxë' légaquië':

—Libi'ili', di'a dza quégacaba' bëla sínia'. ¿Zoa
 nu bulu'í libi'ili' ral-la' izxúnajli' yöl-la' rusiúdxí
 sí' gaca quégaca bönachi? ⁸ Na'a, guli'gún le ilaca
 bë' chibubi'í ládxi'li', en biti' sa' ládxi'li', biti' in-
 nali': “Nácatu' tsahui' tu' nácatu' di'a dza queë'
 Abraham”, tu' rea' libi'ili', huáca quelë'ë Dios yugu'
 guiöj ni, en gunë' ga ulu'huóáca di'a dza queë'
 Abraham. ⁹ Nácali' ca yugu' yaga. Chizóa riböza
 guié huága para ichugu yugu' yaga. Yúgu'të yaga
 biti' ta'bía le naca dxi'a, ila'chúguië' yaga na', en
 ila'gu'ë léguequi lu guí'.

¹⁰ Ní'irö bönachi nacua' ni' gula'nabi lë', ta'nná:

—¿Nacxi gúntsatu'?

¹¹ Bubi'ë didza' Juan, rë' légaquië':

—Nu dë chopa cö' zxe ral-la' unödzej que nu biti'
 dë que, ate' nu dë le gagu, lësca' caní ral-la' quisi
 quégaca nupa biti' dë le ilágugaca.

¹² Bal-lë' bönni' tu'quizxjë' lázagaca bönachi uláz
 que yödzö zi'tu' bila'dxinë' ca' ni' para ila'dilë' nisa,
 ate' gula'nabinë' lë', ta'nnë':

—Bönni' usëdi, ¿nacxi gúntsatu' netu'?

13 Juan gudxë' légaquië':

—Biti' uquízjaröli' tsca le chigunnë' bönni' yú'uli' lu në'ë.

14 Bal-lë' bönni' röjáquië' gudil-la gula'nábinë' ca' lë', ta'nnë':

—¿Nazxi netu', nacxi guntu'?

Juan gudxë' légaquië':

—Bíti'rö gun gádxili' bönachi para cúali' le dë quéguequi. Bíti'rö innëli' quégaca bönachi le cabí nácatë para gunli' ga ila'guizzaj libí'ili', pero guli'tsaza ládxi'li' tsca rázxfalí'.

15 Ta'zá' ládxi'gaca bönachi na' ta'böza Bönni' na' ral-la' isöl-lë'ë Dios, channö náquië' Juan na' Bönni' lë' Cristo. 16 Bubi'ë didza' Juan, gudxë' yúgu'të', rnnë':

—Le nácatë neda' ruquila' libí'ili' nisa, pero zë'ë Bönni' gunë' le rulu'isö yöl-la' ridila nisa ni, ichízië' libí'ili' Dios Bö' Lá'ayi, en le naca guí' queë'. Bönni' ni náparë' yöl-la' unná bë' ca neda', ate' neda' biti' naca' lesaca' ilecja' le nudë'ë ni'e. 17 Zönë' lu në'ë böcö' queë', ate' ulubë' ga rilubi zxoá' xtila queë', lë ni rulu'i le gaca quégaca bönachi. Utubë' zxoá' xtila, en cu'ë le xilataj, pero bëbu que uzéguí'ë lu guí' le catu caz ulu.

18 Ca nácgaca didza' ni, en ia'zica'rö zían didza' le guchizië' icja nággaca bönachi, benë' libán Juan lógaquië' que didza' dxi'a. 19 Juan na' buzéguí'ë didza' Herodes, bönni' rinná bë'ë, tu' zóalenë'-nu Herodías, nigula queë' Felipe, bönni' böchë'ë, enca' tu' runë' zían le ruá' dö'. 20 Ní'irö benë' Herodes tu le nácarö huiá' dö', gulu'ë Juan na' lidxi guié.

*Ridíle' Jesús nisa**(Mt. 3:13-17; Mr. 1:9-11)*

²¹ Dza na' cate' cabí nadzunë' Juan lidxi guë, cate' ni' ruquilë' bönachi nisa, bidilë' ca' Jesús nisa. Cate' ni' rulidzë' Dios, gyalaj lúzxiba, ²² ate' bötjë' Dios Bö' Lá'ayi, bidxinë' ga na' zoë' Jesús. Buluí'i lahuë', rinë'ë ca riná' tuba' gu'dödo', ate' biyón chi'i Nu ruí'i didza' yehua' yubá, rnna:

—Li' nacu' Zxí'ina'. Nadxí'ida' Li', en raza ládxa'a Li'.

*Yugu' xuz xinë'e gudödi queë' Jesús**(Mt. 1:1-17)*

²³ Cate' gusí lahuë' runë' xichinë' Jesús, yu'ë ca chi uruá' iz. Téquiguequi bönachi náquië' zxí'inë' José. Jesús náquië' zxí'ini xi'sóë' Elí, nu na' náquië' xúzinu María, nigula queë' José na'.

²⁴ Elí na' gúquië' zxí'inë' Matat,
nu ni guca zxí'inë' Leví,
nu ni guca zxí'inë' Melqui,
nu ni guca zxí'inë' Jana,
nu ni guca zxí'inë' ia'tué' José.

²⁵ José ni gúquië' zxí'inë' Matatías,
nu ni guca zxí'inë' Amós,
nu ni guca zxí'inë' Nahum,
nu ni guca zxí'inë' Esli,
nu ni guca zxí'inë' Nagai.

²⁶ Nagai na' gúquië' zxí'inë' Mat,
nu ni guca zxí'inë' ia'tué' Matatías,
nu ni guca zxí'inë' Semei,
nu ni guca zxí'inë' ia'tué' José,
nu ni guca zxí'inë' Judá.

²⁷ Judá na' gúquië' zxí'inë' Joana,

nu ni guca zxí'inë' Resa,
nu ni guca zxí'inë' Zorobabel,
nu ni guca zxí'inë' Salatiel,
nu ni guca zxí'inë' Neri.

²⁸ Neri na' gúquië' zxí'inë' ia'túë' Melqui,
nu ni guca zxí'inë' Adi,
nu ni guca zxí'inë' Cosam,
nu ni guca zxí'inë' Elmodam,
nu ni guca zxí'inë' Er.

²⁹ Er na' gúquië' zxí'inë' Josué,
nu ni guca zxí'inë' Eliezer,
nu ni guca zxí'inë' Jorim,
nu ni guca zxí'inë' ia'túë' Matat.

³⁰ Matat na' gúquië' zxí'inë' Leví,
nu ni guca zxí'inë' Simeón,
nu ni guca zxí'inë' Judá,
nu ni guca zxí'inë' ia'túë' José,
nu ni guca zxí'inë' Jonán,
nu ni guca zxí'inë' Eliaquim.

³¹ Eliaquim na' gúquië' zxí'inë' Melea,
nu ni guca zxí'inë' Mainán,
nu ni guca zxí'inë' Matata,
nu ni guca zxí'inë' Natán.

³² Natán na' gúquië' zxí'inë' David,
nu ni guca zxí'inë' Isaí,
nu ni guca zxí'inë' Obed,
nu ni guca zxí'inë' Booz,
nu ni guca zxí'inë' Salmón,
nu ni guca zxí'inë' Naasón.

³³ Naasón na' gúquië' zxí'inë' Aminadab,
nu ni guca zxí'inë' Aram,
nu ni guca zxí'inë' Esrom,

nu ni guca zxí'inë' Fares,
 nu ni guca zxí'inë' ia'túë' Judá.
 34 Judá na' gúquië' zxí'inë' Jacob,
 nu ni guca zxí'inë' Isaac,
 nu ni guca zxí'inë' Abraham,
 nu ni guca zxí'inë' Taré,
 nu ni guca zxí'inë' Nacor.
 35 Nacor na' gúquië' zxí'inë' Serug,
 nu ni guca zxí'inë' Ragau,
 nu ni guca zxí'inë' Peleg,
 nu ni guca zxí'inë' Heber,
 nu ni guca zxí'inë' Sala.
 36 Sala na' gúquië' zxí'inë' Cainán,
 nu ni guca zxí'inë' Arfaxad,
 nu ni guca zxí'inë' Sem,
 nu ni guca zxí'inë' Noé,
 nu ni guca zxí'inë' Lamec.
 37 Lamec na' gúquië' zxí'inë' Matusalén,
 nu ni guca zxí'inë' Enoc,
 nu ni guca zxí'inë' Jared,
 nu ni guca zxí'inë' Mahalalel,
 nu ni guca zxí'inë' ia'túë' Cainán.
 38 Cainán na' gúquië' zxí'inë' Enós,
 nu ni guca zxí'inë' Set,
 nu ni guca zxí'inë' Adán,
 nu ni guca ca zxí'ini cazë' Dios.

4

Satanás tu' xihui' rë'ëni usubaga' Jesús dul-la'
(Mt. 4:1-11; Mr. 1:12-13)

1 Buzë'ë Jesús ra' yegu Jordán, zóalenë' Dios Bö'
 Lá'ayi Lë', ate' Dios Bö' Lá'ayi na' guchë'ë Jesús lu

lataj cá'asö. ² Guzöë' Jesús ni' idú ca choá' dza, ate' gú'uni tu' xihui' usubaga' Jesús dul-la'. Biti' bi gudahuë' Jesús yugu' dza na', ate' gudödi ni' ridunë'. ³ Ní'irö tu' xihui' na' gudxi Jesús, rnna:

—Channö naca cazu' Li' Zxí'inë' Dios, gunnátsöca' ulu'huöáca guiöj ni yöta xtila.

⁴ Bubi'ë didza' Jesús, rë' le:

—Nazúaj lu guichi, rnna: “Calégasö yöta xtila nabánigaca bönachi, pero nabánigaca ca' yúgu'të xtídzë'ë Dios.”

⁵ Ní'irö guchë' tu' xihui' na' Jesús ga naca tu lu gu'a sibi ate' tu chí'ido'osö buluí' Lë' yúgu'të xilátjagaca nupa ta'nná bë' yödzölió. ⁶ Tu' xihui' na' rë Jesús, rnna:

—Gunna' quiu' yúgu'të xilátjagaca nupa ta'nná bë' ni, en yöl-la' tsahui' quéguequi, tu' nadödi lu na'a yúgu'të lë ni, ate' nu rë'ënisida' ruá'a que. ⁷ Channö Li' uzóa zxibu' lahua', en gunu' neda' zxon, yúgu'të lë ni guequi quiu'.

⁸ Bubi'ë didza' Jesús, rë' le:

—Gucuita ga zoa', Satanás, tu' nazúaj lu guichi lá'ayi le rë netu', rnna: “Xanu' Dios tseaj ladxu'u-në', en tuzë' Lë' gunu' xichinë'.”

⁹ Ní'irö tu' xihui' na' guchë' Jesús Jerusalén, ate' budxía Lë' lu zö'ö ícjo'olö yudo', en rë Lë':

—Channö nacu' Zxí'inë' Dios, busuládzu'tsöca' cuinu' ni ¹⁰ tu' nazúaj lu guichi lá'ayi, rnna:

Dios isöl-lë'ë gubáz lá'ayi queë', ilácalenë' Li'.

¹¹ Lu ná'agaquië' ulu'chisë' Li' para cabí tsöjchégu'u guiöj,

en biti' gunu' zi' ni'u.

¹² Bubi'ë didza' Jesús, rë' le:

—Nazúaj lu guichi lá'ayi le rë netu': "Biti' si' bē'u Xanu' Dios."

¹³ Cate' biti' budzöli tu' xihui' na' ia'tú le si' bē' Jesús, buzá' ga zoë' tu chí'ido'.

Risí lahuë' Jesús runë' xichinë' luyú Galilea

(Mt. 4:12-17; Mr. 1:14-15)

¹⁴ Bőajë' Jesús luyú Galilea, dë lu nē'ë yöl-la' huáca queë' Dios Bö' Lá'ayi. Guzé didza' ca naca queë', ate' bila'yöni bönachi nacua' yúgu'të yödzö idú gásibi'ilö. ¹⁵ Busédinë' Jesús bönachi gapa naca lu yu'u ga tu'dubë' tu'sëdë' bönni' judío queë' Dios, ate' yúgu'të bönachi gulún Lë' zxön.

Le benë' Jesús yödzö Nazaret, ga naca ladzë'

(Mt. 13:53-58; Mr. 6:1-6)

¹⁶ Ní'irö budxinë' Jesús yödzö Nazaret ga ni' guzxönë'. Cate' bidxín dza lá'ayi quégaquië' bönni' judío, ca run cazë' Jesús, guyázië' lu yu'u ga tu'dubë' tu'sëdë' bönni' judío queë' Dios, ate' guzuínë' para ulabë' tu le nazúaj lu guichi lá'ayi.

¹⁷ Bulu'dödë' lu nē'ë Jesús guichi ga na' nazúaj didza' bē'ë Isaías, bönni' bē'ë didza' uláz queë' Dios. Cate' gusaljë' guichi na', budzölinë' ga nazúaj lu guichi le rnna:

¹⁸ Zóalenë' Bö' Lá'ayi queë' Xanru' neda'

tu' nubéajë' neda' quez queë'

para usiyönda' bönachi yechi' didza' dxi'a.

Gusöl-lë'ë neda' para una' nupa raca zi'

ládxi'do'guequi,

en usiyönda' nupa nadzúngaca, ca gaca ulu'lágaca,

en úna' bönachi nachul-la lóguequi,

en usölä' bönachi zoa nu run léguequi zi',

19 en guna' libán que dza ruzá' ládxe'ë Xanru' Dios quegaca bönachi.

20 Ní'irö butubë' Jesús guichi na', en bugu'ë le lu në'ë bönni' rapa chi'ë yugu' guichi lá'ayi, ate' gurö'ë. Ní'irö yúgu'të nupa nudúbigaca lu yu'u na' gula'ná' Jesús. 21 Gusí lahuë' Jesús rë' légaquië':

—Na'a dza ni zóali' libí'ili', rudxín caz le nazúaj lu guichi ni.

22 Yúgu'të' gula'nnë' dxi'a queë', en bulu'bánninë' ca naca didza' dxi'a ru'ë, ate' ta'nnë':

—¿Naru' calëga bönni' ni zxi'inë' José?

23 Jesús rë' légaquië', rnnë':

—Nadxi huëli' neda' lë ni ta'nná bönachi, le rnna: “Li', bönni' ruún bönachi, bun cuinu'.” Lësca' caní huëli' neda': “Yugu' le biyönitu' benu' Capernaum, ben ca' ga ni naca ladzu'.”

24 Gunnë' ca' Jesús:

—Le nácatë rea' libí'ili', channö zoë' nu bönni' ru'ë didza' uláz queë' Dios, biti' tun bönachi uládz queë' lë' bal. 25 Le nácatë rea' libí'ili', gula'cuá'anu zían nigula uzëbi luyú Israel yugu' dza ni' zoë' Elías, bönni' bë'ë didza' uláz queë' Dios, cate' ni' biti' gulaj guiöj idú ca tsonna iz yu' xopa beo', ate' guca gubín luyú na', 26 pero Dios biti' gusöl-lë'ë Elías na' ga nacué'anu nigula uzëbi nabábagacanu Israel, pero gusöl-lë'ë lë' ga na' zóanu tu nigula uzëbi lu yödzo Sarepta, le nababa yödzo Sidón. 27 Lësca' caní, gula'cuá' zían nupa te'e huë' nudzu' ruzödi luyú Israel dza ni' zoë' Eliseo, bönni' bë'ë didza' uláz queë' Dios, pero biti' böáquië' nu bönni' nútsë'ë ladaj bönachi Israel na', pero böáquië' tuzë Naamán, bönni' nababë' luyú Siria.

28 Cate' bila'yönnë' didza' ni, gula'lenë' yúgu'të bönni' nacu'ë lu yu'u ga na' tu'dubë' tu'sëdë' queë' Dios. 29 Ní'irö gula'yasë', en bulu'béajë' Jesús ní'ilö ra' yödzö. Gula'chë'ë Lë' ga naca lë'e guí'a guiöj ga na' dë ládzagaquië' para ulu'suláduë' Lë' ga naca lë'e guí'a guiöj na'. 30 Ní'irö gudödë' Jesús gatsaj láchui'lö ga na' nacu'ë, söhuöajtë'.

Tu bönni' yu'u lë' bö' xihui'

(Mr. 1:21-28)

31 Ní'irö guyijë' Jesús yödzö Capernaum luyú Galilea, ate' busédinë' bönachi yugu' dza lá'ayi quégaquië' bönni' judío. 32 Bulu'báninë' ca naca le rusédinë' Jesús légaquië', tu' bë'ë didza' ca tu bönni' dë lu në'ë yöl-la' unná bë'.

33 Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sëdë' queë' Dios, ate' bë'ë zidzaj didza', 34 rnnë':

—¿Busán netu'! ¿Bizxi rála'tu' quiu', Jesús, bönni' Nazaret? ¿Naru' zo'o para usunítu' netu'? Núnbë'a Li' Nu nacu'. Bönni' Lá'ayi queë' Dios nacu'.

35 Jesús buzenë' le bach bö' xihui' na', en rë' le:

—Busayaj ru'u, en burúaj lu bönni' ni.

Ní'irö bö' xihui' na' gurú'una bönni' na' lu yu lógaca bönachi nacuá' ni'. Burúajtë lu bönni' na', en bíti'rö bi ben queë'. 36 Bulu'báninë' yúgu'të', en gulu'ë didza' tuë' len ia'túë', ta'nnë':

—¿Bizxi didza' ni ru'ë? Len yöl-la' unná bë', en yöl-la' huáca zxön rinná bé'enë' yugu' bö' xihui', ate' tu'rúajtë bö' xihui' na'.

37 Guzë didza' ca naca queë' Jesús, ate' bila'yöni bönachi yúgu'të yödzö idú gásibi'ilö.

Ruúnë' Jesús xiná'anu nigula queë' Pedro
(Mt. 8:14-15; Mr. 1:29-31)

³⁸ Ní'irö guyasë' Jesús, en burúajë' lu yu'u ga na' tu'dubë' tu'sédë' queë' Dios, ate' guyázië' lidxë' Simón. Xiná'anu nigula queë' Simón na' zóanu ni', en yú'unu xilá, ate' guláta'yuë' lahuë' Jesús únë'-nu. ³⁹ Gubígui'ë Jesús ga na' dënu, ate' bulidzë' huë' xilá na' yú'unu. La' birúajtë xilá na' yú'unu, ate' la' guyástënu, en bë'ënu le gulahuë'.

Ruúnë' Jesús zían nupa te'e
(Mt. 8:16-17; Mr. 1:32-34)

⁴⁰ Cate' chiribía gubidza, yúgu'të nupa nacué'len léguequi nupa na' te'e que queëguequi yödzhüë' bila'dxín ni', ate' dujuá'gaca léguequi ga na' zoë' Jesús. Lë' guxóa në'ë nupa na' te'e, en bunë' léguequi. ⁴¹ Bulu'rúaj ca' zían bö' xihui' yú'ugaca bönachi te'e na'. Ta'bödxi'a bö' xihui' na', ta'nná:

—Li' nacu' zxi'inë' Dios.

Ní'irö Jesús buzenë' le bach yugu' bö' xihui' na', en bití' bë'ë lataj ila'nná, tu' nöziguequi náquië' Cristo.

Runë' Jesús libán luyú Galilea
(Mr. 1:35-39)

⁴² Cate' za' rení' ia'tú dza, burúajë' Jesús Capernaum na', ate' guyijë' tu lataj cá'asö. Bila'dxín bönachi zían ni', tu'guílaj Jesús. Cate' bila'dxinë' ga na' zoë', gulë'ë'niguequinë' ulu'tsenë' Lë', para cabí uzë'ë ga na' nacué'. ⁴³ Ní'irö Jesús gudxë' légaquië', rnnë':

—Run bayudxi tseja' gapa nacué' ia'zica'rö yödzö, tsöjena' ca' libán ni' que didza' dxi'a ca rinná bë'ë Dios. Que lë ni na' gusöl-lë'ë neda' ni.

44 Caní guca, benë' libán yugu' yödzö luyú Galilea gapa naca lu yu'u ga tu'dubë' bönni' judío, en tu'sedë' queë' Dios.

5

Ta'dzunba' böla zían
(Mt. 4:18-22; Mr. 1:16-20)

¹ Cate' ni' zoë' Jesús ra' nísado' nazí'i le Gene-saret, lu xiyú Galilea, bulu'quída' bönachi zían Lë' para ila'yöni xtídzë'ë Dios. ² Ní'irö bilé'enë' Jesús chopa bárcodo', zxóagaca lu nísado' ga na' naca ra' yu bidxi, ate' narúajgaquië' bönni' uzxön böla lë'egaca bárcodo' na', en ta'guibë' yöxaj böla quégaquië'. ³ Gurenë' Jesús tu lë'e bárcodo' na', le nequi queë' Simón Pedro, ate' gunábinë' lë' udxíguië' le ia'látido' zi'tu' ga naca ra' yu bidxi na'. Ní'irö gurö'ë Jesús lë'e bárcodo' na', en röö'së' ca' ni' rusédinë' bönachi zían nacua' lu yu bidxi na'. ⁴ Cate' budxi bë'ë didza' Jesús, ní'irö gudxë' Simón, rnnë':

—Busá' bárcodo' ni lu nísado' ga na' röö' zila, ate' ni' guli'zalaj yöxaj böla queëli' para sönli'-ba' böla.

⁵ Bubi'ë didza' Simón, rë' Jesús:

—Bönni' Usëdi, idú yëla chibentu' dxin, en biti' bi böla nazönitu'-ba', pero didza' quiu' izáljagara' yöxaj.

⁶ Cate' chigula'zaljë' le, gula'zönë' zióntëröba' böla, ate' réquitiqui' iröza' yöxaj böla na'. ⁷ Ní'irö bulu'lá'a bulu'lú'isinë', bulu'lidzë' luzá'agaquië' nacu'ë ia'tú lë'e bárcodo' na' para zá'gaquië' ilácalenë' légaquië'. Cate' bila'dxinë' ni' bulu'dzë'ë-ba' böla irópatë bárcodo' na', ate' chirequi ulu'huötaj bárcodo' na' lu nisa. ⁸ Cate' bilé'enë'

Simón Pedro lë ni, ní'irö buzóa zxibë' lahuë' Jesús, rnnë':

—Gucuita ga zoa', Xan, tu' naca' bönni' dul-la'.

⁹ Caní gunné' tu' radxi ridzöbinë' Pedro ni'a quégacaba' böla zián na' gula'zöngaquië'-ba', en lësca' caní guca quégaca nupa nacua'len lë'.

¹⁰ Guladxi gula'dzöbinë' ca' Jacobo, en Juan, yugu' zxi'inë' Zebedeo, nupa ni nácagaca luzë'ë Simón Pedro na'. Ní'irö Jesús rë' Simón na', rnnë':

—Biti' gádxinu'. Na'a isílo' ichë'u quia' bönachi ca runu' rizönu'-ba' böla.

¹¹ Cate' chibulu'sudxinë' yugu' bárcodo' na' ga naca ra' yu bidxi, ní'irö bulu'cá'anë' yúgu'të ni', ate' sôjácalenë' Jesús.

Ruúnë' Jesús tu bönni' ré'enë' huë' nudzu' ruzödi (Mt. 8:1-4; Mr. 1:40-45)

¹² Cate' zoë' Jesús tu lu yödzö ni', bidxinë' tu bönni' ré'ede'enë' huë' nudzu' ruzödi ga na' zoë'. Cate' bilé'enë' Jesús, busudxín lahuë' lu yu, en gúta'yuë' lahuë', rnnë':

—Xan, channö rë'ënu', huáca unu' neda'.

¹³ Ní'irö bulí në'ë Jesús, en gudanë' lë'. Rë' lë':

—Rë'ënda'. Gacu' dxi'a.

La' gubídxitë huë' nudzu' queë' bönni' na'.
¹⁴ Ní'irö Jesús gunná bé'enë' lë' cuntu nu guié' ca'. Gudxë' lë':

—Guyéaj, yöjlu'i cuinu' lahuë' bixúz, ate' yöjnodzaj que yudo' le rulu'i nuhuóacu' dxi'a ca gunná bë'ë Moisés, lë na' ulu'i légaquië' chiböacu'.

¹⁵ Guzëtë'rö didza' que yöl-la' huáca queë' Jesús, ate' bulu'dubi bönachi zián ga na' zoë' para ila'yöni xtídzë'ë, en para únë' léguequi, ugüë' yödzöhuë'

té'eguequi. ¹⁶ Ní'irö buzé'ë Jesús ni', en guyijé' tu lataj cá'asö, ate' ni' bulidzë Dios.

*Ruúnë' Jesús tu bönni' huë' nacú'unië' bin
(Mt. 9:1-8; Mr. 2:1-12)*

¹⁷ Ia'tú dza, cate' ni' rusédinë' Jesús bönachi, rö'ogaquië' yugu' bönni' yudo' fariseo len bönni' yudo' tu'sédinë' xibá queë' Moisés ni', narúajgaquië' yúgu'të yödzö luyú Galilea, en luyú Judea, en lu yödzö Jerusalén. Naca bë' dë lu në'ë Jesús yöl-la' huáca queë' Xanru' Dios tu' ruúnë' bönachi te'e nacua' ni'. ¹⁸ Ní'irö bönni' nuá'agaquië' le denë' tu bönni' huë' nacú'unië' bin bila'dxinë' ga ni', ate' bulu'guiljé' nacxi ilunë' para ila'gu'ë lë' lu yu'u para ila'guixjé' lë' lahuë' Jesús. ¹⁹ Cate' biti' gula'dzölinë' nacxi ilunë', tu' nacua' bönachi zían ni', gula'benë' ícjo'olö yu'u na', en gula'saljé' ícjo'o na'. Ní'irö bulu'zötjé' le denë' bönni' huë' na', ate' gula'guixjé' lë' gatsaj láhui'lö bönachi ni' lahuë' Jesús. ²⁰ Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Bönni', yugu' dul-la' nabágu'u chibuníti lahua'.

²¹ Ní'irö gula'sí lógaquië' ta'zá' ládxi'gaquië' bönni' yudo' tu'sédinë' na', en yugu' bönni' yudo' fariseo, ta'nnë': “¿Nuzxi caz bönni' ni rnnë' le rucá'ana Dios cá'asö? ¿Nuzxi caz gaca uniti lo dul-la'? Tuzë' Dios runiti lahuë' dul-la'.”

²² Réquibe'enë' Jesús le ta'zá' ládxi'gaquië', ate' rë légaquië':

—¿Bizx que rizá' ládxi'li' caní? ²³ Biti' naca böniga nu guiësö bönni' ni: “Yugu' dul-la' nabágu'u chibuníti lahua'”, pero naca böniga nu gun ga chasë', en së'e ni'ë. ²⁴ Guna' ga inözili' dë lu na'a neda',

Bönni' Guljē' Bönachi, yöl-la' unná bē' uniti lahua' dul-la' luyú ni.

Ní'irö gudxē' bönni' na' nacú'uniē' bin, rnnē':

—Li' rea', guyasa. Buá' le denu', en böaj lidxu'.

²⁵ La' guyásatē' bönni' huē' na' lógaquiē', ate' bu'ē lē na' gúti'nē', en söhuöjē' lidxē', rigu'ē Dios yöl-la' ba. ²⁶ Gula'nítitiqui'sinē' yúgu'tē', ate' gula'gu'ē Dios yöl-la' ba, en tádxisinē' ca', ta'nnē':

—Na'a bilé'eru' le run ga rubániru'.

Jesús rulidzē' Leví

(Mt. 9:9-13; Mr. 2:13-17)

²⁷ Gudödi gulaca yugu' lē ni burúajē' Jesús ni', ate' bilé'enē' tu bönni' uquízxaj lázagaca bönachi, lē Leví, rö'ē ga na' ruquíxjē', ate' Jesús rē' lē':

—Gudá' neda'.

²⁸ La' guyásatē' Leví, ate' bucá'anē' yúgu'tē', en sa'yéajlenē' Jesús.

²⁹ Gudödi ni' benē' Leví na' tu gü'i huagu queē' Jesús ga naca lu yu'u lidxē', ate' gula'cu'ē zían bönni' uquízxaj ni' len ia'bal-lē' bönni' ta'bō'lenē' légaquiē' tahuē'. ³⁰ Ní'irö bönni' yudo' tu'sédinē' len yugu' bönni' yudo' fariseo gula'nnē' quégaquiē' bönni' usēda queē' Jesús, ta'nnē':

—¿Bizx que rē'aj rágulenli' yugu' bönni' uquízxaj, en ia'zica'rē' bönni' dul-la'?

³¹ Bubi'ē didza' Jesús, rē' légaquiē':

—Yugu' bönni' nacu'ē dxi'a biti' naquíniguequinē' nu un bönachi, pero bönni' té'enē' naquíniguequinē' nu un bönachi. ³² Za'a, calēga ulídzagaca'-nē' bönni' tsahui', pero za'a ulídzagaca'-nē' bönni' dul-la' para ulu'bí'i ládxi'gaquiē'.

*Ta'nábinë' Jesús ca naca que yöl-la' run gubasa
(Mt. 9:14-17; Mr. 2:18-22)*

³³ Ní'irö bönni' yudo' na' gula'nábinë' Jesús, ta'nnë':

—¿Bizx que tunë' gubasa zián luzuí bönni' dá'gaquië' Juan, en tu'lidzë' Dios, ate' tunë' ca' caní bönni' dá'gaquië' yugu' bönni' yudo' fariseo, pero bönni' dá'gaquië' Li' tē'aj tahuë'?

³⁴ Jesús rë' légaquië':

—¿Naru' huácatsö gunli' ga ilunë' gubasa bönni' nacu'ë laní que yöl-la' rutsaga na' tsanni ni' bönni' rutsaga në'ë zóalenë' légaquië'? ³⁵ Huadxín dza cate' udúë' bönni' rutsaga në'ë ga nacu'ë. Dza ní'irö ilunë' gubasa.

³⁶ Ní'irö bucúdzu'ë didza' Jesús ca naca lë ni, ate' rë' légaquië':

—Cuntu nu bönni' ichúguië' tu lari' cubi chinadía, en cuejë' tsötaca' le udë'ë lë'e lari' tēbi. Channö gunë' caní, calégasö gaca ditaj lari' cubi na', pero lári'do' na' birúaj lë'e lari' cubi na' bití' tsöjlóza lari' tēbi na'. ³⁷ Lësca' caní, cuntu nu bönni' riguë'ë xisi uva cubi lu buzudi guídi gula. Channö nu gun caní, xisi uva cubi na' uchöza' buzudi guídi gula, ate' ilalaj xisi uva na', ate' gaca ditaj buzudi guídi gula na'. ³⁸ Que lë ni na' ral-la' cá'aru' xisi uva cubi lu buzudi guídi cubi, ate' irópatë ilaca chí'i. ³⁹ Channö zoa nu rë'aj xisi uva gula, bití' guë'ënitë gu'aj xisi uva cubi, tu' rnna: “Nácarö sizxí' xisi uva gula na'.”

6

Bönni' usëda queë' Jesús ta'lecjë' do zxoa' xtila dza lá'ayi

(Mt. 12:1-8; Mr. 2:23-28)

¹ Cate' naca tu dza lá'ayi quégaquië' bönni' judío, ridödë' Jesús gapa dë yöla zxoa' xtila, ate' bönni' usëda queë' ta'lecjë' do ga dxía zxoa' xtila. Ta'zxúbi'ni ná'agaquië' le, en tahuë'. ² Ní'irö gula'nábinë' bönni' yudo' fariseo légaquië', ta'nnë':

—¿Bízz que runli' le cabí ral-la' gunru' dza lá'ayi?

³ Bubi'ë didza' Jesús, rë' légaquië':

—¿Naru' cabí nulábanili' ca benë' David cate' gudunë', ate' gula'dún ca' nupa nacuá'len lë'?

⁴ Guyázië' lu yu'u queë' Dios, en guzxi'ë yöta xtila tu'cu'ë lahuë' Dios, lë na' biti' ral-la' gáguru', pero tuz bixúz dë lataj ilahuë', ate' gudahuë' David le, en bë'ë ca' quéguequi nupa nacuá'len lë'.

⁵ Ní'irö Jesús gudxë' légaquië', rnnë':

—Neda', Bönni' Guljë' Bönachi, naca' xani dza lá'ayi.

Tu bönni' narequi' në'ë

(Mt. 12:9-14; Mr. 3:1-6)

⁶ Cate' naca ia'tú dza lá'ayi quégaquië' bönni' judío, guyázië' Jesús lu yu'u ga tu'dubë' tu'sédë' queë' Dios, en busédinë' nupa nacuá'ni'. Zoë' ca' tu bönni' ni' narequi' në'ë ibëla. ⁷ Yugu' bönni' yudo' tu'sédinë', en yugu' bönni' yudo' fariseo tu'yüë' Jesús para ila'lé'enë' channö únë' bönni' na' cate' naca dza lá'ayi quégaquië' para ulu'dzölinë' nacxi ulu'zéguië' Lë' didza'. ⁸ Réquibe'enë' Jesús le ta'zá' ládxi'gaquië', ate' gudxë' bönni' na' narequi' në'ë, rnnë':

—Guyasa. Guzuí gatsaj láhui'lö ni.

La' guyásatë' bönni' na', guzuínë'. ⁹ Ní'irö Jesús gudxë' yugu' bönni' yudo' na', rnnë':

—Unábitsöqui'da' libí'ili' tu didza'. ¿Naru' dë lataj cate' naca dza lá'ayi gunru' le naca dxi'a o gunru' le ruá' dö'? ¿Naru' dë lataj uguéla'ru' yöl-la' na'bán quégaca bönachi, o ugúaru' le?

¹⁰ Ní'irö buyüë' Jesús yúgu'të bönni' na' nacu'ë gásibi'ilë', ate' gudxë' bönni' huë' na':

—Bulí no'o.

Bulí në'ë bönni' na', ate' la' böácatë në'ë na'.
¹¹ Ní'irö gula'lenë' bönni' yudo' na', ate' gulún xtídza'gaquië' la' légacasë' nacxi bi ilunë' queë' Jesús.

Riböë' Jesús chínnuë' bönni' ilácagaquië' gubáz queë'

(Mt. 10:1-4; Mr. 3:13-19)

¹² Dza ni' guyijë' Jesús ga naca tu lu gu'ado'. Bulidzë' Dios ni', ate' idú yëla bë'lenë' Dios didza'.

¹³ Cate' za' rení', bulidzë' yugu' bönni' dá'gaquië' Lë', ate' guröë' chínnuë' para iláquië' gubáz queë'.

¹⁴ Bulidzë':

Simón, (lë' ca' Pedro),

Andrés, (böchë'ë Pedro),

Jacobo, en Juan, en Felipe, en Bartolomé,

¹⁵ Mateo, en Tomás,

Jacobo, (zxí'inë' Alfeo),

Simón, (bönni' ruí'i lácxë'ë yödzo queë'),

¹⁶ Judas, (böchë'ë Jacobo),

en Judas Iscariote, (bönni' udödë' Jesús lu ná'agaquië' bönni' ilútië' Lë').

*Ruúnë' Jesús bönachi zián**(Mt. 4:23-25)*

¹⁷ Jesús bötjalenë' yugu' bönni' gubáz queë' na' lu guí'ado' na', ate' bila'dxinë' tu ga naca lachi', ga ni' nacu'ë ziánrö ca' bönni' usëda queë', ate' nacuá'len légaquië' bönachi zián narúajgaca yúgu'të yödzö luyú Judea, en yödzö Jerusalén, en yugu' yödzödo' dëgaca ra' nísado' ga na' nacuá' yödzö Tiro, en yödzö Sidón. Bila'dxín bönachi ni ga ni' para ulu'zë nágagaca xtídzë'ë Jesús, en ulu'huóáca lu yödzöhuë' té'eguequi. ¹⁸ Bulu'huóáquië' ca' bönni' ni' ta'guí'i ta'záquië' lu ná'agaca bö' xihui'. ¹⁹ Yúgu'të bönachi zián na' tuí'i ládxi'gaca ila'gán Jesús tu' ruúnë' léguequi len yöl-la' huáca queë'.

Nupa ná'agaca bica' ba, en nupa ná'agaca bica' bayechi'

(Mt. 5:1-12)

²⁰ Ní'irö buyüë' Jesús yugu' bönni' usëda queë' nacu'ë ni', en gudxë' légaquië':

—Bica' ba libí'ili', réquibe'eli' riyadzjali' le naca queë' Dios, tu' gata' queëli' lataj ga rinná bë'ë Dios.

²¹ 'Bica' ba libí'ili' ridunli' le gunnë' Dios queëli', tu' huóljali'.

'Bica' ba libí'ili' ribödxili' tu' bi nadéli'li' le naca tsahui', tu' huadxín dza uzzídxili'.

²² 'Bica' ba libí'ili', tu' za' dza cate' biti' ila'lé'e bönachi libí'ili' dxí'a, en ulu'béaj libí'ili' ga nacuá', en ila'nnë' zì queëli', en ulu'cá'ana cá'asò le nazí'i lali' ca tu le naca xihui' tu' dá'ali' neda', Bönni' Guljë' Bönachi. ²³ Buli'sí' xibé dza na', en buli'dzeja, tu' naca zxön le guequi queëli' yehua' yubá. Lësca' caní gulunë' xuz xtó'ogaca bönachi ni quégaquië' bönni' gulu'ë didza' uláz queë' Dios.

24 'Bica' bayechi' libí'ili', dë yöl-la' tsahui' queéli', tu' chidé le ruzí'ili' xibé.

25 'Bica' bayechi' libí'ili' nuhuölej nudzé'eli' na'a, tu' huadunli'.

'Bica' bayechi' libí'ili' ruzxídxili na'a, tu' huí'inili', en cödxí yéchi'li'.

26 'Bica' bayechi' libí'ili' ta'nnë yúgu'të bönachi dxi'a queéli'. Lësca' caní gulunë' xuz xtó'oli', gula'nnë' dxi'a quégacuië' bönni' gula'zí' yë'ë, gula'nnë' nácagaquië' bönni' tu'ë didza' uláz queë' Dios.

Ral-la' idxi'iru' nupa biti' ta'lé'e rë'u dxi'a

(Mt. 5:38-48; 7:12)

27 Gunnë' ca' Jesús:

—Libi'ili' zóali' ni, en riyönili' xtídz'a'a, rea' libí'ili': Guli'dxi'i nupa biti' ta'lé'e libí'ili' dxi'a. Guli'gún le naca dxi'a quégaca nupa tu'dí'i libí'ili'.

28 Guli'nabi Dios gaca dxi'a quégaca nupa tua' dö' queéli', en buli'lidzë' Dios inábili'-në' gácalenë' nupa ta'nnë' zi' queéli'. 29 Channö nu capa' tsölá'a xagu', buzë ia'tsölá'a ca' xagu'. Channö nu cúa lari' naxó'a cúdz'u, bë' lataj cúa ca' xzo'. 30 Núti'tës nu bi inaba le dë quiu', bunödzej que, ate' nu cúa le nequi quiu', biti' unabu' le. 31 Ca rë'ënili' ilún bönachi queéli', lësca' caní guli'gún quégacui.

32 'Channö nadxí'isili' nupa nadxí'igaca libí'ili', ¿bizxi yöl-la' ba idéli'li'? Lësca' caní tunë' bönni' dul-la', ta'dxí'inë' nupa nadxí'igacui légaquië'.

33 Channö runli' le naca dxi'a quégacasö nupa tun dxi'a queéli', ¿bizxi yöl-la' ba idéli'li'? Lësca' caní tunë' bönni' dul-la'. 34 Channö runödzejali' quégaca nupa runli' löza ulu'bí'i queéli', ¿bizxi yöl-la' ba idéli'li'? Lësca' caní tunë' bönni' dul-la', tu'nödzejë'

quégaca nupa tun dul-la', tu' tunë' löza ulu'bí'i quégaquië' lë na' bulu'nödzjë'. ³⁵ Neda' rea' libí'ili': Guli'dxi'i nupa biti' ta'lé'e libí'ili' dxi'a, en guli'gún le naca dxi'a. Buli'nödzaj quégaca bönachi sal-la' biti' runli' löza nu ubí'i queéli'. Channö caní gunli', zxön naca le gata' queéli', ate' gácali' zxí'ini cazë' Dios, Nu nácatërö lo, tu' runë' Lë' le naca dxi'a quégaca bönachi biti' ta'yaza ládxi'gaca, en quégaca bönachi tuá' dö'. ³⁶ Buli'huéchi' ládxi'li' bönachi ca na' runë' Xúzili' Dios, ruhuéchi' ládxi'ë yúgu'të bönachi.

Biti' ral-la' ichugu bë'ëru' que luzá'aru'

(Mt. 7:1-5)

³⁷ Gunnë' ca' Jesús:

—Biti' ichugu bë'ëli' que luzá'ali', ate' cuntu nu ichugu bë' queéli'. Biti' cuéaj bë'ëli' que luzá'ali', ate' cuntu nu cuéaj bë' queéli'. Buli'niti lo luzá'ali', ate' Dios uniti lahuë' ca' libí'ili'. ³⁸ Buli'nödzaj que luzá'ali', ate' Dios gunnë' queéli'. Ulu'nödzjë' queéli' le ulu'rixë' len tu guí'ina ribixi le naca idú, le naguirö, en nagú gate ga rë', en zóatica' gubá. Ca naca le ruríxili', la' cá'asö urixë' Dios ca' queéli'.

³⁹ Bucúdzu'ë didza' Jesús, rë' légaquië':

—¿Naru' huácatsö nu bönni' lo chul-la ichë'ë ia'tué' bönni' lo chul-la? Biti' ca' gaca, tu' ila'bixë' iropë' tu lu yeru. ⁴⁰ Biti' ca' gácarë' lo tu bönni' usëda ca nu rusëdi lë', pero cate' údxi izëdë' bönni' na', gáquië' ca naca nu na' rusëdi lë'.

⁴¹ ¿Bizx que ruyú' bëbudo' yu'u guiøj lahuë' böchi' luzó'o, en biti' rilé'enu' le zxön yu'u guiøj lo cazu'? ⁴² ¿Naru' huácatsö guío'-në' böchi' luzó'o: “Böcha'a, benna lataj cueja' bëbudo' yu'u guiøj

lo”, en bití’ rilé’enu’ le zxön yu’u guiöj lo cazu’? Li’, bönni’ rulu’isö tsahui’ cuinu’, guléaj zí’alö le zxön yu’u guiöj lo cazu’, ate’ ní’irö ilé’enu’ dxi’a para cueju’ bëbudo’ yu’u guiöj lahuë’ böchi’ luzó’o.

Le runru’ naca bë’ le nácaru’
(Mt. 7:17-20; 12:34-35)

⁴³ Gunnë’ ca’ Jesús:

—Tu yaga dxi’a bití’ cuía le naca cá’asö. Lësca’ caní, tu yaga guí’a bití’ gaca cuía le naca dxi’a. ⁴⁴ Caní naca, le ribía tu yaga naca bë’ ca naca yaga na’. Bití’ ruchíbiru’ le ribía yaga higo lu yaga yötsi’, en calëga lu bisequi’ yötsi’ bití’ ruchíbiru’ le ribía lubá uva. ⁴⁵ Tu bönni’ dxi’a ru’ë didza’ dxi’a tu’ yu’u le naca dxi’a icja ládxi’da’ahuë’, ate’ didza’ xihui’ ru’ë bönni’ xihui’ tu’ yu’u icja ládxi’da’ahuë’ le xihui’. Rinnë ruá’aru’ ca naca le yu’u icja ládxi’do’oru’.

Chopa ca gaca cuéquiru’ xilibi yu’u
(Mt. 7:24-27)

⁴⁶ Gunnë’ ca’ Jesús:

—¿Bizx que rulídzali’ neda’, rnnali’: “Xantu’, Xantu”, pero bití’ runli’ ca rinná bé’eda’ libí’ili’? ⁴⁷ Ulu’ída’ libí’ili’ ca naca nu na’ za’ quia’, en riyöni xtídza’a, en run ca rnna xtídza’a. ⁴⁸ Nu ni naca ca tu bönni’, cate’ benë’ lidxë’, guchö’önë’ ga rë’, en guléquië’ xilibi yu’u ga naca lu guiöj. Cate’ bötaj yegu gubó’o, guchö’öna cuita yu’u na’, pero bití’ guca uquínnaj le, tu’ nulibi ga naca lu guiöj. ⁴⁹ Na’a, nu riyöni xtídza’a, en bití’ run ca rnna, nu ni naca ca tu bönni’ benë’ lidxë’ ga naca lu yu cá’asö. Bití’ benë’ xilibi. Cate’ guchö’öna yegu gubó’o cuita yu’u na’, la’ biguínnajtë, ate’ gubixi’ dërö zö’ö que.

7

*Jesús ruúnë'-bi' bi'i huen dxin queë' tu bönni' unná
bë'*
(Mt. 8:5-13)

¹ Cate' Jesús budxi bé'lenë' légaquië' didza' ni, guyázië' yödzö Capernaum. ² Lu yödzö ni' zoë' tu bönni' Roma rinná bé'enë' bönni' röjáquië' gudil-la. Zóabi' bi'i huen dxin queë' nadxí'ide'enë'-bi', ate' bi'i ni ré'ebi', en chirequi gátibi'. ³ Cate' biyönnë' bönni' ni didza' tu'ë bönachi ca naca queë' Jesús, la' gusól-la'të' bal-lë' bönni' gula tu'z'éajni'inë' bönni' judío ga na' zoë' Jesús, tsöjötá'yugaquië' lahuë' Lë' guidë' uduhuénë'-bi' bi'i huen dxin queë' na' ré'ebi'. ⁴ Bönni' gula tu'z'éajni'inë' na' bila'dxinë' ga zoë' Jesús, ate' guláta'yue' lahuë' idú ládxi'gaquië', ta'nnë':

—Náquië' lesaca' bönni' na' gunu' queë' lë ni, ⁵ tu' runë' bal bönachi uládz queéru', en benë' tu yu'u queéru' ga rudúbiru' rusédaru' queë' Dios.

⁶ Ní'irö Jesús guyéajlenë' légaquië'. Cate' chizóa ila'dxinë' lidxë' bönni' na', lë' gusól-lë'ë bal-lë' böchi' luzë'ë ga zë'ë Jesús, ate' të' Lë':

—Xan, rnnë' bönni' na': “Biti' uguí'inu', tu' cabí naca' lesaca' tsáziu' lidxa', ⁷ en biti' naca' lesaca' guída' ga zu'. Que lë ni na' bití' burúguida' guída' ga zu'. Bé'ësö didza', ate' huóacatëbi' bi'i huen dxin quia'. ⁸ Neda' ca', zoa nu rinná be'e neda', ate' nacu'ë ca' bönni' röjáquië' gudil-la rinná bé'eda' légaquië'. Rea'-në' tuë': Guyéaj ni', ate' rejë'. Rea'-në' ia'túë': Gudá ni, ate' ridë'. Rea'-në' ca' huen dxin quia': Ben dxin ni, ate' runë' dxin na'.”

⁹ Cate' biyönnë' Jesús didza' ni, bubáninë' queë' bönni' na', ate' buécjë', en gudxë' bönachi na' zá'gaca cúdzu'lë', rnnë':

—Le nácatë rea' libí'ili', cuntu nu bönni' Israel bití' rójxáqui'da'-në' réajlë'ë quia' ca réajlë'ë quia' bönni' ni.

¹⁰ Cate' bulu'dxinë' bönni' na' gusöl-lë'ë bönni' rinná bé'enë' bönni' rójáquië' gudil-la, gula'yázië' ga naca lu yu'u lidxë', en bila'lé'enë' chibóácabi' bi'i huen dxin na'.

Jesús rusubanë'-bi' bi'i bönni' queënu tu nigula uzëbi

¹¹ Gudödi guca lë ni, sa'yéajë' Jesús yödzö Naín, ate' dzágagaquië' bönni' usëda queë' Lë', len bönachi zían. ¹² Cate' bidxinë' gala' ra' yödzö na', bilé'enë' yugu' bönni' nuá'agaquië'-bi' tubi' bi'i bönni' nati. Söjčáchi'gaquië'-bi'. Bi'i nati na' nácabi' la's dui bi'i queënu tu nigula uzëbido'. Zían bönachi uladza queënu nigula uzëbi na' sójácalen-nu. ¹³ Cate' Xanru' bilé'enë'-nu, buéchi' ládxë'ë-nu, ate' gudxë'-nu:

—Bíti'rö cödxu'.

¹⁴ Ní'irö gubígui'ë Jesús, en gudanë' da'a yaga ga na' dëbi' bi'i nati na'. Gula'bözë' bönni' na' nuá'agaquië'-bi', ate' Jesús gunnë':

—Bi'ido', li' rea', guyasa.

¹⁵ Ní'irö bubanbi'. Gurö'öbi' bi'i na' zí'alö nátibi', ate' gusí lobi' ru'íbi' didza'. Jesús budödë'-bi' lu ná'anu xiná'abi'. ¹⁶ Cate' bönni' ni' bila'lé'enë' lë ni, guládxinë' yúgu'të', ate' gula'gu'ë Dios yöl-la' ba, ta'nnë':

—Bidxín queëru' tu bönni' lo, ru'ë didza' uláz queë' Dios. Dios caz rácalenë' bönachi queë'.

17 Guzë didza' ca naca yöl-la' huáca queë' Jesús, ate' bila'yöni bönachi yúgu'të yödzo luyú Judea, en yúgu'të yödzo idú gásibi'ilö.

*Le rinabë' Juan, bönni' buquilë' bönachi nisa
(Mt. 11:2-19)*

18 Bönni' dá'gaquië' Juan gula'guíxjöi'inë' lë' yúgu'të lë ni runë' Jesús. Ni' yu'ë Juan lidxi guië, bulidzë' chopë' bönni' na' dá'gaquië' lë, 19 ate' gusöl-lë'ë légaquië' ga na' zoë' Jesús para ila'nábinë' Lë', ila'nnë': "¿Nacu' Li' Cristo, bönni' ral-la' guidë', o naru' ral-la' cöztu'-në' bönni' yúbölö?" 20 Cate' bila'dxinë' bönni' na' nasöl-lë'ë Juan ga na' zoë' Jesús, të' Lë':

—Juan, bönni' buquilë' bönachi nisa, nasöl-lë'ë netu' para inábitu' Li', innatu': "¿Nacu' Li' Cristo, bönni' na' ral-la' guidë', o naru' ral-la' cöztu'-në' bönni' yúbölö?"

21 La' ná'asö ruúnë' Jesús zían nupa te'e, yugu' bönni' huë', en bönni' yú'ugaca légaquië' bö' xihui', ate' zían bönni' lo chul-la busaljë' guiöj lógaquië'. 22 Bubi'ë didza' Jesús, rë' chopë' bönni' na' nasöl-lë'ë Juan, rnnë':

—Guli'tséaj, guli'tsöjtíxjöi'i-në' Juan ca naca le bilé'eli', en le biyónili'. Tu'lé'enë' bönni' guchul-la lógaquië'. Tu'zë'ë bönni' gulatsjë'. Nuhuóácagaquië' bönni' gü'iguequinë' huë' nudzu' ruzödi. Tu'yönnë' bönni' gula'cödzuë'. Nubángaquië' bönni' gulátië'. Ta'yönnë' bönni' yechi' didza' dxi'a. 23 Bica' ba nu biti' gaca chopa ladxi', ate' za'len neda' sal-la' biti' runa' ca réqui nu na' ral-la' guna'.

24 Cate' bönni' na' gusól-lë'ë Juan bulu'zë'ë ni', gusílahuë' Jesús rulu'ínë' bönachi ni' ca naca queë' Juan na', rnnë':

—¿Bizxi birúajli' yöjyuli' lu lataj cá'asö? ¿Naru' birúajli' yöjyuli' tu gui rutá bö' recja le? 25 ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' nácuë' lari' nazáca'de'e? Nöz quézili' nupa nácu'gaca lari' nazáca'de'e, en tu'zí xibé yöl-la' tsahui', nacuá' lídxigaquië' bönni' ta'nná bë'ë. 26 ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' ru'ë didza' uláz queë' Dios? Ön, rea' libí'ili', ate' nayépisëtë'rë' ca nu ru'í' didza' uláz queë' Dios. 27 Náquië' Juan bönni' na' nazúaj lu guichi lá'ayi ca naca queë', rnna: Buyútsöca', risól-la'a-në' gubáz quia', inöruë' ca Li'. Bönni' ni uchi'ë nöza ga tödu'.

28 'Neda' rea' libí'ili': Gapa nacuá' bönachi, channö zoë' nu bönni' ru'ë didza' uláz queë' Dios, biti' nácarë' lo ca Juan, bönni' na' buquilé' bönachi nisa, pero nu nácatërö cuídi'sö ga rinná bë'ë Dios nayépisëtërö ca Juan na'.

29 Cate' bönachi ni', en bönni' tu'quizxjë' lázagaca bönachi bila'yönnë' didza' ni bë'ë Juan, guléquibe'enë' le naca tsahui' lahuë' Dios, en bila'dilë' nisa lu në'ë Juan, 30 pero yugu' bönni' yudo' fariseo, en bönni' yudo' tu'sédinë' xibá queë' Moisés biti' bila'dilë' nisa lu në'ë Juan, ate' caní guca, bulu'cá'anë' cá'asö le gú'unnë' Dios gunë' quégaquië'.

31 Gunnë' ca' Xanru':

—¿Nacxi uséqui'tseda' bönachi nacuá' dza ni zóaru' na'a? ¿Nacxi caz nácagaquië'? 32 Nácagaquië'

ca bí'ido' ta'guítjabi'. Ta'bö'öbi' lu yé'ëyi, en ta'bödxi'abi'. Ta'nnabi' tubi' ia'tubi': "Rucódxitu' queéli' gui, pero biti' ruyá'ali'. Rul-la yéchi'tu', pero biti' ribödxi'li'." ³³ Caní nácali' tu' bidé' Juan, bönni' buquilé' bönachi nisa, en biti' gudahué' yöta xtila, en biti' gu'ë xisi uva, ate' rnnali' queé': "Tu' xihui' dzaga lé'." ³⁴ Cate' bida' neda', Bönni' Guljé' Bönachi, en rë'aj rahua', rnnali' quia': "Bönni' ni náquié' bönni' huágulë'ë, en bönni' re'jé'. Náquié' luzá'agaquié' bönni' tu'quizxjé', en ia'zica'rë' bönni' dul-la'." ³⁵ Rea' libí'ili': Naca bë' nupa nápagaca yöl-la' réajni'i queé' Dios ni'a que le túngaca.

Le benë' Jesús lidxë' tu bönni' yudo' fariseo

³⁶ Tu bönni' yudo' fariseo bulidzë' Jesús gágulenë' lë' tsözxön, ate' guyázië' Jesús lidxë' bönni' na', en gurö'ë rahué'. ³⁷ Zóanu lu yödzö na' tu nigula udá dzaga, en cate' nözinu rö'ë rahué' Jesús lidxë' bönni' yudo' fariseo na', ní'irö bidxinnu ni' nuá'anu tu böga'do' néquini guiöj nazaca' le yudzu tu le rilá' zxixi. ³⁸ Cate' bidxinnu zaca' cúdzulë' Jesús, gurö'önu xini'ë ribödxinu. Ní'irö gusi lonu rigú'unu nisa ribödxinu ni'ë Jesús, en ruzxinu ni'ë len guitsa' ícjanu. Butsaga lonu ni'ë, en gulú'unu ni'ë lë na' rilá' zxixi. ³⁹ Cate' bönni' yudo' fariseo na' nulidzë' Jesús bilé'enë' lë ni, guzá' ládxë'ë, rnnë': "La'tu' náquié' bönni' ni bönni' ru'ë didza' uláz queé' Dios, huéquibe'enë' nuzxi na', en nacxi nácanu nigula ni rigannu Lë', tu' nácanu nigula udá dzaga." ⁴⁰ Ní'irö Jesús gudxë' bönni' fariseo na', rnnë':

—Simón, dë tu le ral-la' guía' li'.

Bubi'ë didza' bönni' na', rnnë':

—Gunná, Bönni' Usedi.

41 Jesús rë' lë':

—Zoë' tu bönni' dë dumí queë', ate' nacu'ë chopë' bönni' tál-lë'ë dumí queë'. Tuë' bönni' na' ral-lë'ë queë' lazjë' que chopa iz, ate' ia'túë' na' ral-lë'ë queë' lazjë' que chopa beo'. 42 Tu' cabí dë quégaquië' dumí ulu'guízxjë' lë na' tál-lë'ë queë', que lë ni na' buniti lahuë' iropë' lë na' tál-lë'ë queë'. Gunnátsöca' na'a. ¿Núzxilë' bönni' chopë' ni idxí'irönë' bönni' na' buniti lahuë' légaquië'?

43 Bubi'ë didza' Simón na', rnnë':

—Réquida' neda', bönni' na' rála'rë' queë' dumí, lë na' buniti lahuë'.

Jesús gudxë' lë':

—Le nácasö rno'.

44 Ní'irö buécjë' Jesús, ate' ni' ruyüë'-nu nigula na', rë' Simón:

—¿Naru' rilé'enu' nigula ni? Guyázia' lidxu', ate' biti' bennu' quia' nisa quíbida' ni'a, pero nigula ni gulú'unu ni'a nisa ribödxinu, en buzzinu ni'a len guitsa' ícjanu. 45 Biti' butsaga lo' neda', pero cate' bidxíntea' lidxu', biti' ruzóa dxinu nigula ni, rut-saga lonu ni'a. 46 Biti' gulú'u icja' le za, pero nigula ni gulú'unu ni'a lë na' rilá' zxixi. 47 Que lë ni na' rea' li', dul-la' zían gubága'nu nigula ni, chiguyú'u yöl-la' runiti lo quéguequi, ate' nadxí'ide'enu neda'. Nu na' Dios runiti lahuë' le láti'do'os, láti'do'os nadxí'i Dios nu na'.

48 Ní'irö Jesús gudxë'-nu nigula na', rnnë':

—Dul-la' gubágu'u chiguyú'u yöl-la' runiti lo que.

49 Yugu' bönni' na' ta'bó'lenë' Jesús tahuë' gula'sí lógaquië' të' luzá'agaquië', ta'nnë':

—¿Nuzxi caz bönni' ni, runiti lotsë' ca' dul-la'?

50 Ní'irö Jesús gudxë'-nu nigula na', rnnë':

—Tu' réajlë'u neda', chibuló' li'. Böaj lidxu', zoa dxi ládXu'u.

8

Yugu' nigula tácalennu Jesús, ta'gú'unu le tahuë'

¹ Gudödi gulaca lë ni, gudë' Jesús gapa nacuá' zían yödzo zXön, en yugu' yödZodo', ate' benë' libán ni', en bë'ë didza' que didza' dxi'a ca rinná bë'ë Dios, ate' idxínnutë' bönni' usëda queë' dzágagaquië' Lë'. ² Bál-lanu nigula bunë' Jesús légacanu dzágagacanu ca' Lë'. Bubéajë' bö' xihui' yú'ugaca légacanu, en bugúë' yugu' yödZohuë' gü'iguequinu. Nútsa'nu ládjagacanu María, lënu ca' Magdalena, nigula na' bubéajë' gadxi bö' xihui' yú'ugaca lënu. ³ Juana, nigula queë' Chuza, bönni' yu'u lu në'ë le dë lidxë' Herodes, nútsa'nu ca' ládjagacanu, ate' cá'anqueze Susana nútsa'nu ca' légacanu. Ta'gú'unu nigula ni, en zíanrönu ca', le tahuë' Jesús, en yugu' bönni' usëda queë'. Tu'nödZjanu le dë quégacanu.

Rucúdzu'ë didza' Jesús ca naca queë' bönni' guz (Mt. 13:1-9; Mr. 4:1-9)

⁴ Bila'rúaj bönachi zían yugu' yödzo ni', en bilá'gaca ga na' zoë' Jesús. Cate' bulu'dubë' ga na' zoë', Lë' bucúdzu'ë didza', rë' légaquië':

⁵ —Birúajë' bönni' guz, söjësië' xisedo'. Cate' ni' söjësië', bulu'huöxaj bal-la xisedo' na' ga naca la' nöza, ate' bulu'libi bönachi léguequi. Bila'dxinba' ca' biguínido', en gulé'ajba' xisedo' na' dzö'ö la' nöza. ⁶ Bulu'huöxaj ia'bal-la xisedo' na' lu yu ga rö'ö guiöj. Cate' gula'lén xisedo' na', la' gula'bídxitë

tu' cabí nalupa' yu na'. ⁷ Bulu'huöxaj ia'bal-la xisedo' na' ga bulu'lén lubá yötsi'. Tsözxön gula'zxön lubá yötsi' na', en xisedo' na', ate' lubá yötsi' na' bila'röli xisedo' na' gula'lén, en gulún ditaj léguequi. ⁸ Bulu'huöxaj ia'bal-la xisedo' na' ga naca luyú bëbu. Cate' chigula'zxön, bulu'nödzaj. Tu dxigu' na' bunödzaj ia'tú gayuá'tërö xisedo' ca'.

Cate' budxi gunné' caní Jesús, bë'ë zidzaj didza', rnné':

—¡Nu zoa nagui, en riyöni ral-la' uzë nagui!

Bizx que rucúdzu'ë Jesús didza'

(Mt. 13:10-17; Mr. 4:10-12)

⁹ Ní'irö yugu' bönni' usëda queë' Jesús gula'nábinë' Lë', ta'nné':

—¿Bizxi sa'yéaj lë na' bucúdzu'u didza'?

¹⁰ Jesús gudxë' légaquië':

—Dios ruzéajni'inë' libí'ili' le nagachi' ca rinná bë'ë Lë', pero ia'zíca'rö bönachi ni, ru'ilena' léguequi didza' le rucúdzu'a didza' para cate' ulu'yüë', bití' ila'lé'enë', en cate' ila'yönnë', bití' ila'yéajni'inë'.

Riguíxjö'ë Jesús le ruluí'i le bucúdzu'ë didza'

(Mt. 13:18-23; Mr. 4:13-20)

¹¹ Gunné' ca' Jesús:

—Caní naca le ruluí'i lë na' bucúdzu'a didza'. Xisedo' na' naca xtídzë'ë Dios. ¹² Xisedo' na' bulu'huöxaj la' nöza tu'luí'i ca raca quégaca bönni' ta'yönnë' didza' na', pero la' za'të tu' xihui', en rigúa didza' na' bidxín lu icja ládxi'do'gaquië', para cabí ila'yéajlë'ë, en cabí ulu'lë'. ¹³ Xisedo' na' bulu'huöxaj lu yu ga rö'ö guiöj tu'luí'i ca raca quégaquië' bönni' ta'yönnë' didza' na', en tu'dzéjanë'

ta'zi'ë le, pero nácagaquië' ca xisedo' na' biti' ben lui. Tu chí'sö ta'yéajlë'ë, tu' ridxín le rizí' bë légaquië', ate' la' tu'huóatë ládxi'gaquië'. ¹⁴ Xisedo' na' bulu'huöxaj ga bulu'lén lubá yötsi' tu'luí'i ca raca quégaquië' bönni' ta'yönnë' didza' na', en cate' chibila'yönnë', yugu' le tuí'i ládxi'gaquië' yödzölió ni, en yugu' yöl-la' tsahui' que, en yugu' le ta'yaza ládxi'gaquië' le taca ni, tun nigui légaquië', ate' biti' run dxin didza' na' lu icja ládxi'do'gaquië'. ¹⁵ Xisedo' na' bulu'huöxaj ga naca luyú bëbu tu'luí'i ca raca quégaquië' bönni', idú ládxi'gaquië' ta'yönnë' didza' na', en ta'gu'ë tsutsu le lu icja ládxi'do'gaquië', ate' lu yöl-la' riböza zxön ladxí tunë' ca rnna didza' na'.

Rucúdu'ë didza' Jesús que le rigú'u bení' lídxiru'
(Mt. 4:21-25)

¹⁶ Gunnë' ca' Jesús:

—Cuntu nu bönni' ruquélë'ë guí', ate' la' rudúsi'të' le guí'ina, en biti' rigú'ë le zxani le ráti'në', pero ruzóë' le xilataj ga naca liná' lu yu'u, ate' nupa ila'yaza ni' ulu'zí' xibé guí' na'. ¹⁷ Ilá' lahui yúgu'të le nagachi', ate' gaca bë', ate' irúaj ga liná' yúgu'të le raca balándo'os.

¹⁸ 'Que lë ni na', buli'zë nágali', tu' huadéli'në' ia'lati' bönni' ruzóë' tsutsu icja ládxi'da'ahuë' didza' riyönnë', en huazi'rë' xtídzë'ë Dios, pero bönni' biti' ruzóë' tsutsu icja ládxi'da'ahuë' didza' riyönnë', huadúa didza' na' biyönnë'.

Xinë'ë Jesús, en yugu' bönni' böchë'ë
(Mt. 12:46-50; Mr. 3:31-35)

¹⁹ Ní'irö bila'dxinë' xinë'ë Jesús, en yugu' bönni' böchë'ë ga na' zoë', pero biti' guca ila'bíguë'ë gala'

ga zoë' tu' nacuá' bönachi zían ni'. ²⁰ Zoa ni' nu bulidza Jesús, rnna:

—Nacu'ë xinó'o, en yugu' bönni' böchu'u lö'a. Të'ënnë' ilu'ilenë' Li' didza'.

²¹ Bubi'ë didza' Jesús, rë' légaquië':

—Nupa ni ta'yöni xtídzë'ë Dios, en tun ca rnna, bönni' ni nácagaquië' ca xiná' caza', en yugu' bönni' böchi' caza'.

Jesús ribequi dxíë' bö' budunu'

(Mt. 8:23-27; Mr. 4:35-41)

²² Tu dza gurenë' Jesús tu lë'e bárcodo', dzágagaquië' bönni' usëda queë' Lë', ate' Jesús rë' légaquië':

—Udöditsöca'ru' ia'tsölá'a nísado' ni.

Ní'irö söjácatë'. ²³ Tsanni ni' ta'dödë' lu nísado' na', rásië' Jesús. Ní'irö gusí lo recja bö' budunu' lu nísado' na', ate' chirequi huötaj bárcodo' na' zxan nisa, en zoa bönadxi quégaquië'. ²⁴ Ní'irö gula'biguë'ë ga dë' Jesús, en bulu'subanë' Lë', ta'nnë':

—¡Bönni' Usedi! ¡Bönni' Usedi! ¡Chirequi huötjaru' lu nisa!

Cate' bubanë' Jesús, bulidzë' bö' na' recja, en nisa na' riyasa ridxíada', ate' guzóa dxi bö' na' recja, en guró'o dxi lu nísado' na'. ²⁵ Ní'irö Jesús gudxë' yugu' bönni' usëda queë', rnnë':

—¿Naru' cabí réajlë'ëli' Dios?

Guládxinë' légaquië', en tu'bánninë'. Gulë luzá'agaquië' tuë' ia'túë':

—¿Nuzxi caz bönni' ni? Rinná bé'enë' bö' recja, en nísado', ate' tun ca rnna xtídzë'ë.

Tu bönni' yödzö Gadara yu'u lë' bö' xihui'

(Mt. 8:28-34; Mr. 5:1-20)

26 Ní'irö bila'dxinë' lu xiyúgaquië' bönni' Gadara, le dë ia'tsölá'a nísado' ca dödilö ga dë luyú Galilea.

27 Cate' birúajë' Jesús lë'e bárcodo' na' ga naca lu yu na', dutságuië' tu bönni' yödzo na' Lë'. Chigudzé yu'u bö' xihui' lë', ate' bíti'rö rácuë' lari', en bíti'rö rizóë' lu yu'u, pero nun xilatjë' lu zxan bulóaj ga nádjagaca yeru ba. 28 Cate' bönni' na' yu'u bö' xihui' lë' bilé'enë' Jesús, gurödxie' zidzaj, ate' buzóa zxi'bë' lahuë' Jesús, en bë'ë zidzaj didza', rnnë':

—¿Bizxi ral-la'a quiu', Jesús, Zxi'inë' Dios nayëpisëtërë'? Ráta'yua' lo' cabí usaca' zi'u neda'.

29 Caní gunné' tu' chigunná bé'enë' Jesús bö' xihui' na' urúaj lu bönni' na'. Zián luzuí zí'atëlö burixi butúluda' bö' xihui' na' bönni' na', ate' yugu' bönni' yödzo ni' gulúguië' lë' du guië, en bulu'xéjanë' bregui' guië ni'a në'ë, pero blë'ë yugu' du guië na', ate' bö' xihui' na' yu'u lë' guché' lë' lu lataj cá'asö. 30 Ní'irö Jesús gunábinë' bö' xihui' na', rnnë':

—¿Bi leu'?

Bö' xihui' na' gudxi Lë':

—Le Zián lea'.

Caní gunná tu' yú'ugaca bö' xihui' zián bönni' na'. 31 Ní'irö yugu' bö' xihui' na' guláta'yugaca lahuë' Jesús cabí isöl-lë'ë léguequi lataj chul-la quégaca nupa nátigaca. 32 Nacuá'aba' ca' tu cö'öba' cuchí zián ta'daba' táguba' lu guí'ado' ni', ate' bö' xihui' na' gula'naba yechi' Jesús gu'ë léguequi lataj tsöjtsú'ugaca cuchí zián na'. Jesús bë'ë léguequi lataj. 33 Bulu'rúaj yugu' bö' xihui' lu bönni' na', en yöjtsú'ugaca cuchí zián na', ate' yöjácaba' cuchí zián na' ga naca tu lë'e guiöj. Yöjbíxigacaba' lu nísado', ate' ni' gula'yëpiba' nisa, gulátiba'.

34 Cate' bila'lé'enë' bönni' tu'yúgaquië'-ba' cuchi zián na' ca na' guca quegacaba', guladxi gula'dzöbinë'. Bulu'zxúnnajë' ni', ate' yöjhuöjgaquië' yöjtíxjöi'iguequinë' nupa nacuá' yödzö na', en nupa nacuá' la' guixi' ni'. 35 Ní'irö bila'rúajë' bönni' yödzö na', yöjyúgaquië' lë na' guca. Cate' bila'dxinë' ga na' zoë' Jesús, bila'lé'enë' bönni' na' gula'yú'u bö' xihui' lë', rö'ë xini'ë Jesús. Nácuë' lari', en dxí'ado' chizóë', ate' guládxinë'. 36 Nupa na' bila'lé'e lë na' guca gula'guíxjöi'i légaquië' ca guca, böáquië' bönni' na' gula'yú'u bö' xihui' lë'. 37 Ní'irö yúgu'të bönachi zián na' quegaca yödzö nabábagaca Gadara na' guláta'yu lahuë' Jesús urúajë' lu xiyúguequi, tu' tádxinë'. Bubenë' Jesús lë'e bárcodo' na', en söhuöjë'. 38 Bönni' na' bulu'rúaj bö' xihui' na' lë' gúta'yuë' lahuë' Jesús gu'ë lë' lataj tséajlenë' Lë' tsözxön. Gunná bé'enë' Jesús lë' ugá'anë' ni', rnnë':

39 —Böaj lidxu'. Yöjtíxjöi'i bönachi uládz quiu' yugu' le zxön benë' Dios quiu'.

Böajë' bönni' na' lidxë', ate' buzë' didza' idú lu yödzö ni' ca naca le zxön benë' Jesús queë'.

Jesús ruínë'-bi' bi'i nigula queë' Jairo enca' nigula na' gudannu lari' nácuë'

(Mt. 9:18-26; Mr. 5:21-43)

40 Cate' budxinë' Jesús ia'tsölá'a nísado' na', bulu'dzeja bönachi zián nacuá' ni' ni'a queë' Lë', tu' ta'böza Lë'. 41 Ní'irö bidxinë' Jairo ga zoë' Jesús. Náquië' bönni' lo que yu'u ga tu'dubë' bönni' judío, en tu'sëdë' queë' Dios. Biyéchuë' xini'ë Jesús, en gúta'yuë' lahuë' tsejë' lidxë'. 42 Cani benë' tu' zóabi' tubi' bi'i nigula queë', chirequi gátibi'. Nácabi' bi'i

la's dui queë', en yú'ubi' ca chinnu iz. Tsanni ni' sa'yéajë' Jesús, sönógaca tu'quirö bönachi zián Lë'.

⁴³ Nútsa'nu tu nigula ladaj bönachi zián na', chiguca chinnu iz riguí'i rizáca'nu. Biti' ruhuí'i rön queënu que huë' quégaca cázanu nigula, ate' chibutönu dëra le dë queënu, riguízjxjanu nupa tu'ún bönachi, pero bití' guca nu bönni' únë'-nu.

⁴⁴ Gubíga'nu zaca' cúde' lë' Jesús, en gudannu ruí'i lari' nácuë', ate' la' buí'të huë' rön queënu.

⁴⁵ Ní'irö Jesús gunábinë' nupa nacué' ni', rnnë':

—¿Nuzxi na' gudán neda'?

Gula'dá'baguí'ë yúgu'të'. Ní'irö Pedro, en nupa nacué'len lë' gulë' Lë', ta'nnë':

—Bönni' Usedi, nacué' bönachi zián ni, tu'quirö Li', en tu'dxiga' Li', ate' ¿rnnatso': “¿Nuzxi na' gudán neda'?”

⁴⁶ Ní'irö Jesús gunné':

—Zoa nu gudán neda', tu' gúquibe'eda' birúaj yöl-la' huáca neda' le ruún bönachi.

⁴⁷ Cate' réquibe'enu nigula na' nözinë' Jesús le bennu, ní'irö guzxízinu. Biyéchunu xini'ë Jesús, en gudíxjöi'ínu Lë' lógaca bönachi zián na' bizx que na' gudannu lari' nácuë', en ca na' guca, la' böácatënu.

⁴⁸ Ní'irö Jesús gudxë'-nu:

—Nigúlado', tu' réajlë'u neda' chiböácu'. Böaj lidxu', zoa dxi ládXu'u.

⁴⁹ Cate' ni' ru'ë Jesús didza' ni, bidxinë' tu bönni' ni', zë'ë lidxë' bönni' lo na' que yu'u ga tu'dubë' tu'sedë' queë' Dios, ate' gudxë' bönni' lo na':

—Chigútibi' bi'í nigúlado' quiu'. Bítí'rö upízjxjanu'në' Bönni' Usedi.

⁵⁰ Cate' biyönnë' Jesús lë ni, bubí'ë didza', rë bönni' lo na':

—Biti' gádxinu'. Guyéajlë'ësö Dios. Huöácabi' bi'i nigúlado' quiu'.

⁵¹ Cate' guyázië' Jesús yu'u na', bití' bë'ë lataj nu tsázalen Lë', pero légacasë' Pedro, en Jacobo, en Juan, enca' xuz xiná'abi' nigúlado' na'. ⁵² Ta'bödxi nupa nacuá' ni'. Ta'bödxi yechë'ë ni'a queëbi' bi'i nigúlado' na', ate' Jesús rë' légaquië', rnnë':

—Bíti'rö cödxiili'. Biti' nátibi' nigúlado' ni. Rásisibi'.

⁵³ Bulu'titjë' Lë' tu' nözguequinë' chinátibi'.

⁵⁴ Ní'irö gudélë'ë Jesús ná'abi', en bë'ë zidzaj didza', rnnë':

—Bi'i nigúlado', guyaschi.

⁵⁵ Ní'irö bu'u bö' naca cázabi', bubanbi', ate' la' guyásatëbi'. Jesús gunná bé'enë' légaquië' ilu'ë le gágubi'. ⁵⁶ Bulu'báninë' xuz xiná'abi', pero Jesús gunná bé'enë' légaquië' cuntú nu ilë' ca na' guca.

9

Risöl-lë'ë Jesús bönni' usëda queë' tsöjéngaquië' libán

(Mt. 10:5-15; Mr. 6:7-13)

¹ Ní'irö butubë' Jesús idxínnutë' bönni' usëda queë', ate' budödë' lu ná'agaquië' yöl-la' huáca, en yöl-la' unná bë' para ulu'béajë' bö' xihui' yú'ugaca bönachi, en ulu'únë' nupa te'e. ² Gusöl-lë'ë légaquië' tsöjéngaquië' libán ca rinná bë'ë Dios, en tsöjhuéngaquië' nupa te'e. ³ Jesús gudxë' légaquië':

—Biti' bi guá'ali' para la' nöza, calëga xiyágado', en calëga yöxaj, en calëga yöta, en calëga dumí, en bití' ixóa yenli' chopa lari'. ⁴ Bíti'tës yu'u ga tsú'uli', guli'sóa ni' cate' uzá'aröli' yödzo na'. ⁵ Gátí'tës ga

biti' ilún bönachi libí'ili' bal, buli'rúaj yödzö na', en guli'cuíbi bëchtö da' lë'e lábali', le uluí'i légaquië' nagá'ana xíguia' nabága'gaquië'.

⁶ Ní'irö bila'rúajë' bönni' usëda queë' na'. Gula'dödë' yúgu'të yödzödo', tunë' libán que didza' dxi'a, en tu'únë' nupa te'e yúgu'të lu yödzö na'.

Ca gútië' Juan, bönni' buquilë' bönachi nisa
(Mt. 14:1-12; Mr. 6:14-29)

⁷ Biyönnë' Herodes, bönni' rinná bë'ë, ca naca yúgu'të le runë' Jesús, ate' gurö'ë böniga, tu' ta'nná bönachi:

—Juan na' chibubanë' lu yöl-la' guti.

⁸ Ia'bal-lë' ta'nnë':

—Chibulé'ë Elías, bönni' na' bë'ë didza' uláz queë' Dios.

Ia'bal-lë' ta'nnë':

—Chibubanë' tu bönni' bítsë'ë yugu' bönni' gulu'ë didza' uláz queë' Dios dza ni'te.

⁹ Herodes na' gunné':

—Juan na' burixa' yenë'. ¿Nuzxi caz bönni' ni, riyönda' queë' runë' yugu' lë ni?

Rizóa ribö'ë Herodes ilé'enë' Jesús.

Rugahuë' Jesús chi-un gayuá' bönachi
(Mt. 14:13-21; Mr. 6:30-44; Jn. 6:1-14)

¹⁰ Cate' bulu'dxinë' bönni' gubáz nasöl-lë'ë Jesús ga zoë' Lë', bulu'siyönnë' Lë' yúgu'të le gulunë'. Ní'irö guchë'ë Jesús légaquië' quez. Yöjáquië' tu lataj cá'asö lu xiyú yödzö Betsaida. ¹¹ Cate' chinöziguequi bönachi lë ni, yöjnóguequi Lë', ate' Jesús benë' léguequi bal, en bë'lenë' léguequi didza' ca rinná bë'ë Dios, ate' bunë' nupa te'e.

12 Cate' chizá' ral-la dza na', idxínnutë' bönni' gubáz queë' Jesús gula'bíguë'ë ga zoë', en tē' Lē':

—Busöl-la' bönachi ni tsöjaca gapa dē yödzödo', en gapa dē yú'udo' idú gásibi'ilö para tsöjtíljagaquië' gapa ulu'gá'anë', en bi ilahuë', tu' naca lataj cá'asö ga ni zóaru'.

13 Ní'irö Jesús rē' légaquië':

—Guli'gu'ë libí'ili' le ilahuë'.

Tē' Lē':

—Gáyu'sö yöta xtílado' dē, en chópasöba' böla dēba' queëtu', o ¿naru' huayéajtsatu' tsjö'öutu' le ilágugaca bönachi zían ni?

14 Nacu'ë ca chi-un gáyu'ë bönni' ga na'. Ní'irö Jesús gudxë' yugu' bönni' usëda queë', rnnë':

—Guli'gún ga ila'bö'ë tu cö' huéajgaquië', ilaca ca chi-un huéajgaquië'.

15 Caní gulunë', ate' gula'bö'ë yúgu'të'. 16 Ní'irö gudélë'ë Jesús gayu' yöta xtila na', en chópaba' böla na', ate' guchisa lahuë' ruyúë' lúzxiba, en rē' Dios: "Xclenu'." Ní'irö buzuzxjë' léguequi, en bē'ë quégaquië' bönni' usëda queë' para ulu'cu'ë lógaca bönachi na'. 17 Gulahuë' yúgu'të', en bulu'huöljanë'. Gudödi na' bulu'tubë' yugu' bizxaj bugá'ana, ate' bulu'lié' idú chinnu ga'böra.

Rnnë' Pedro Jesús náquië' Cristo

(Mt. 16:13-19; Mr. 8:27-29)

18 Tu dza tsanni ni' zoë' quez Jesús, rulidzë' Dios, bila'dxinë' bönni' usëda queë' ga zoë', ate' gunábinë' légaquië', rnnë':

—¿Nuzxi ta'nná bönachi naca' neda'?

19 Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquilé' bönachi nisa. Ta'nná ia'bal-lë' nacu' Elías, ate' ta'nná ia'bal-lë' nacu' tu bönni' bítsë'ë yugu' bönni' gulu'ë didza' uláz queë' Dios dza ni'te, en nubanë' lu yöl-la' guti.

²⁰ Ní'irö Jesús gunábinë' légaquië', rnnë':

—Názxi libí'ili', ¿nuzxi rnnali' naca'?

Bubi'ë didza' Pedro, rnnë':

—Nacu' Cristo nasöl-lë'ë Dios.

Riguíxjö'ë Jesús ca si' ilútië' Lë'

(Mt. 16:20-28; Mr. 8:30-9:1)

²¹ Ní'irö Jesús gúdxidë'ë légaquië', en gunná bé'enë' légaquië' cuntu nu ilé' Nu náquië' Lë'.

²² Ní'irö rë' légaquië':

—Run bayudxi qui'i saca'a neda', Bönni' Guljë' Bönachi, zían le gaca quia'. Ulu'cá'anë' neda' cá'asö yugu' bönni' gula tu'zéajni'inë', en yugu' bixúz unná bé', en yugu' bönni' yudo' usedi. Ilútië' neda', pero dza tsonna dza Dios usubanë' neda' lu yöl-la' guti.

²³ Gudxë' ca' yúgu'të':

—Channö ré'ënë' nu bönni' të'ë neda', ral-la' uzóë' tsölá'alö le dë queë', en gáquië' ca tu bönni' sa'yéajë' söjtë'ë lë'e yaga cruz, ate' ní'irö gaca të'ë neda'. ²⁴ Núti'tës bönni' ruí'i ládxë'ë gun chi'ë yöl-la' na'bán queë', unítië' le, pero channö unítië' yöl-la' na'bán queë' tu' dë'ë neda', bönni' ni gata' yöl-la' na'bán idú queë'. ²⁵ Biti' bi uzi'ë xibé tu bönni' channö utubë' queë' yúgu'të le dë yödzölió ni, pero unítië' tsaz yöl-la' na'bán queë'. ²⁶ Nu bönni' rutuí'inë' neda', en rutuí'inë' ca' xtídza'a, lësca' neda', Bönni' Guljë' Bönachi, utuí'ida' bönni' na' cate' huöda' idinná bé'a, dzágagaca neda' yöl-la'

zxön queë' Xuza', en yöl-la' zxön quégaquië' gubáz lá'ayi queë' Dios. ²⁷ Le nácatë rea' libí'ili', nacuá' bal-lë' bönni' ni biti' ilátië' cate' ila'lé'erönë' dza idinná bë'ë Dios.

Ridzá' ca riná' lahuë' Jesús
(Mt. 17:1-8; Mr. 9:2-8)

²⁸ Cate' bizá'a xunu' gubidza gudödi bë'ë Jesús yugu' didza' ni, ní'irö guchë'ë Pedro, en Juan, en Jacobo, ate' gurenë' tu lu guí'ado', ga na' bulidzë' Dios. ²⁹ Tsanni ni' ru'ilenë' Dios didza', bidzá' ca riná' lahuë', ate' böáca chiguí'chido'os lari' nácuë', en guyëpi yösa bení'. ³⁰ Ní'irö bulu'luí' lógaquië' chopë' bönni' ga zoë' Lë' tu'ilenë' Lë' didza'. Nácaquië' Moisés, en Elías. ³¹ Chopë' ni gula'yëpë' yösa bení', ate' tu'ilenë' Jesús didza' ca si' uzë'ë yödzölió ni, gátië' lu yödzö Jerusalén. ³² Salla' chirácada' ilásië' Pedro, en nupa nacuá'len lë', bayudxi gula'ná'asë', ate' bila'lé'enë' yöl-la' bení' queë' Jesús, en chopë' na' nacuá'lenë' Lë'. ³³ Cate' bulu'zë'ë chopë' na' ga na' zoë' Jesús, ní'irö Pedro gudxë' Lë':

—Bönni' Usedi, dxi'a naca zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

Biti' réquibe'enë' Pedro bi na' rnnë'. ³⁴ Tsanni ni' ru'ë didza' ni, la' gurö'ötë böaj le bugacu légaquië', ate' guládxinë' tu' nacu'ë lu böaj na'. ³⁵ Ní'irö biyön chi'i Nu ruí'i didza' lu böaj na', rnnna:

—Bönni' ni náquië' Zxí'ina'. Nadxí'ida' Lë'. Buli'zë' nágali' didza' gu'ë.

³⁶ Cate' budxi bë' didza' chi'i na', tuzë' Jesús nagá'analënë' légaquië'. Ta'cuá' dxíë' bönni' usëda

queë', ate' dza na' cuntu nu gulë' ca naca le bila'lé'enë'.

Ruúnë' Jesús bi'i bönni' yu'u bö' xihui' läbi'

(Mt. 17:14-21; Mr. 9:14-29)

³⁷ Cate' za' reni' ia'tú dza bulu'huötjé' Jesús, en bönni' na' dzágagaquië' Lë' lu guí'ado' na', ate' bila'rúaj bönachi zían dutságagaca Jesús. ³⁸ Ní'irö bë'ë zidzaj didza' tu bönni' nútsë'ë ladaj bönachi zían na'. Bulidzë' Jesús, rnnë':

—Bönni' Usedi, ráta'yua' lo' duyú'-bi' bi'i bönni' quia' tu' nácabi' bi'i la's dui quia'. ³⁹ Yu'u bö' xihui' läbi' le run ga ribödxi'abi', en ruxízida' läbi'. Run ga ribía bidxina' zxöna' ruá'abi', en rurixi rutúluda' läbi', ate' catu caz rusán läbi'. ⁴⁰ Gúta'yua' lógaquië' bönni' usëda quiu' ulu'béajë' le, pero biti' gula'zéqui'në'.

⁴¹ Bubi'ë didza' Jesús, rnnë':

—Libi'ili', biti' réajlë'ëli', en nachixi ícjali'. ¿Gáca'xte ral-la' sóalena' libi'ili', en guá' ilena' queëli'? Dijuá'a-bi' bi'i bönni' quiu' ni.

⁴² Cate' ni' zá'abi' ribíga'bi' ga na' zoë' Jesús, burixi butúluda' bö' xihui' na' läbi'. Jesús gudil-lë' bö' xihui' na', en bunë'-bi' bi'i bönni' na'. Ní'irö bugu'ë-bi' lu në'ë xúzibi'. ⁴³ Bulu'bani yúgu'të bönachi ni' ca naca yöl-la' huáca zxön queë' Dios.

Jesús ru'ë didza' leyúbölö ca si' ila'zönë' Lë'

(Mt. 17:22-23; Mr. 9:30-32)

Tsanni ni' tu'bani yúgu'të bönachi ca naca le zxön runë' Jesús, Lë' gudxë' yugu' bönni' usëda queë', ⁴⁴ rnnë':

—Guli'cú'u icja nágali' didza' ni, tu' si' ulu'dödë' neda', Bönni' Guljë' Bönachi, lu ná'agaca bönachi.

⁴⁵ Biti' gula'yéajni'inè' bönni' usèda queë' didza' ni, tu' cabi ru'i'inè' Dios légaquië' lataj ila'yéajni'inè', pero biti' bulu'rúguinë' ila'nábinè' Jesús ca naca didza' ni.

Nu naca lo

(Mt. 18:1-5; Mr. 9:33-37)

⁴⁶ Ní'irö gula'sí lógaquië' bönni' usèda queë' Jesús tu'ë didza'. Ta'nábini luzá'agaquië' tuë' ia'tué' núzxilë' gáquië' lo. ⁴⁷ Réquibe'enè' Jesús le ta'zá' ládxi'gaquië', ate' gudélë'ë-bi' tubi' bí'ido', en buzóë'-bi' cuitë'. ⁴⁸ Ní'irö rë' légaquië':

—Núti'tës bönni' gunë' bal tu bí'ido' caní tu' néquibi' quia' neda', neda' caz gunë' bal, ate' nu bönni' gunë' neda' bal, gunë' ca' bal Xuza' nasól-lë'ë neda'. Que lë ni na' bönni' nútsë'ë ládjali nácarë' nóxaj ládxi', bönni' ni náquië' lo.

Nu bití' ridá'baga' rë'u, rácalen rë'u

(Mr. 9:38-40)

⁴⁹ Ní'irö Juan bulidzë' Jesús, rnnë':

—Bönni' Usedi, bilé'etu'-në' tu bönni' rugunë' dxin Lo' rubéajë' bö' xihui', ate' gunná bé'etu'-në' tu' cabi dë'ë rë'u.

⁵⁰ Jesús rë' lë':

—Biti' inná bé'eli'-në', tu' rácalen rë'u nu bití' ridá'baga' rë'u.

Jesús ridil-lë' Jacobo, en Juan

⁵¹ Cate' chizá' gal-la' dza ral-la' gátië' Jesús, en huëpë' yehua' yubá, benë' bayudxi tsejë' Jerusalén.

⁵² Gusól-lë'ë yugu' bönni' gubáz queë' ila'nöruë' ca Lë', ate' yójáquië' tu yödzödo' quégaca bönachi Samaria para tsöjpa'agaquië' ga ugá'anë' Jesús tu yëla. ⁵³ Yugu' bönni' yödzö na' bití' gulunë' Jesús

bal tu' chinaca queë' sa'yéajë' Jerusalén. ⁵⁴ Cate' Jacobo, en Juan, bönni' usëda queë' Jesús, bila'lé'enë' lë ni, të' Lë':

—Xan, ¿naru' inábatsöca'tu' huötaj guí' le za' yehua' yubá, en usuniti légaquië', guntu' ca na' benë' Elías?

⁵⁵ Buécjë' Jesús, en gudil-lë' légaquië', rnnë':

—Biti' nõzili' bizxi bö' dzágui libí'ili'. ⁵⁶ Bida' ni neda', Bönni' Guljë' Bönachi, calëga para usunítia' yöl-la' na'bán quégaca bönachi, pero bida' dusölá' bönachi.

Ní'irö yöjáquië' yödzö yúbölö.

Nupa të'ëni tsöjácálen Jesús

(Mt. 8:19-22)

⁵⁷ Tsanni ni' yú'ugaquië' nõza Jesús, en yugu' bönni' dá'gaquië' Lë', bidxinë' tu bönni' yödzö Jerusalén, en rë' Jesús:

—Xan, rë'ënda' sá'lëna' Li' gátitës ga tseju'.

⁵⁸ Jesús rë' lë':

—Yúgu' böza', nacuá' znan bulóaj quégacaba', ate' biguínido', dxíagaca xcá'agacaba', pero neda', Bönni' Guljë' Bönachi, biti' dë quia' ga gáta'a uzí' ládxa'a.

⁵⁹ Ní'irö Jesús gudxë' tu bönni' yúbölö, rnnë':

—Gudá' neda'.

Bönni' ni gudxë' Lë':

—Xan, benna neda' lataj huöja' lidxa' ga idxinrö dza chibucácha'a-në' xuza'.

⁶⁰ Jesús gudxë' lë':

—Bë' lataj bönni' chizóa ilátie' ulu'cáché'ë nupa chinati quégaquië', pero li', guyéaj, yójén libán ca inná bë'ë Dios.

⁶¹ Ní'irö bidxinë' ia'túë' ca', en rë' Jesús:

—Xan, rě'enda' sá'lena' Li', pero benna neda' lataj tseja' tsőjégacada'-ně' didza' di'a dza quia'.

⁶² Jesús gudxě' lě':

—Núti'tės bönni' ruí'i lădxě'ē le raca yődzölió náquiē' ca tu bönni' rugá'aně'-ba' bėdxi, en ruyüē' zaca' cůdzu'lě'. Nu run caní bití' naca lesaca' tsaza ga rinná bē'ē Dios.

10

Risöl-lě'ē Jesús tsónnalaj yu' chiē' bönni' tsőjéngaqiē' libán

¹ Gudödi gulaca yugu' lě ni, guröē' Xanru' ia'tsónnalaj yu' chiē' bönni' usėda queē', ate' gusöl-lě'ē légaqiē' chopa huéajgaqiē' para ila'nöruē' ca Lě', en tsőjáqiē' yúgu'tě yődzö, en yődzödo' gapa chizóa tödē' Lě'. ² Gudxě' légaqiē':

—Le nácatē, dēda' dxin quia', le naca ca tu la' yēla zxön ga nu tsöjlapa', pero nabábasö huen dxin quia' nacuá'. Que lě ni na', guli'gáta'yu lahuē' Dios, náquiē' Xan la' yēla na', isöl-lě'ē yugu' huen dxin ga naca la' yēla queē'. ³ Guli'tséaj na'a. Buli'yútsöca', neda' risöl-la'a libí'ili', nácali' ca yugu' bö'cu' zxila' sőjácaba' lădjagacaba' bö'cu' guí'a sínia'. ⁴ Bití' guá'ali' yőxaj dumí, en calēga buzudi yöta, en bití' guá'ali' ia'tú cö' xiráchuli', en bití' tselí' para gü'ilenli' bönachi didza' gapa naca la' nöza. ⁵ Gátí'tės yu'u ga tsú'uli', innali': “Le ribequi dxi ladxi' gaca quégaca bönachi nacuá' yu'u ni.” ⁶ Channö zoa ni' nu bönni' si'ē yöl-la' ribequi dxi ladxi', ugá'analen lě' le ribequi dxi ladxi' na' inábali', pero channö cabí zoa ni' nu bönni' caní, ugá'analen libí'ili' le ribequi dxi ladxi'

na' inábali'. ⁷ Guli'gá'ana yu'u ga na' tsú'uli', en guli'gu'aj guli'gagu bi ilunnë' queëli', tu' udzöli quëzinë' bönni' huen dxin le gahuë'. Biti' tödili' yu'u yu'u. ⁸ Gátitës yödzo ga tsú'uli', ate' ilún libí'ili' bal, guli'gagu le ulu'cu'ë loli'. ⁹ Buli'un nupa te'e nacuá' yödzo na', en guli'guie' léguequi: "Chibidxín le rinná bë'ë Dios ga zóali'." ¹⁰ Gátitës yödzo ga tsú'uli', channö cabí ilún libí'ili' bal, guli'rúaj, tsöjsóali' la' nöza que yödzo na', en innali': ¹¹ "Bëchtö que ládzali' le da' lë'e lóbatu' ruquínajtu', le rulu'i nabága'li' xíguia', pero ral-la' inözili' lë ni, chibidxín le rinná bë'ë Dios ga zóali'." ¹² Neda' rea' libí'ili', cate' idxín dza ichúguië' Dios quégaca bönachi, ila'gu'i ila'zaca'rö bönachi yödzo ni' ca ila'gu'i ila'zaca' bönachi yödzo Sodoma, nupa ni' busunítië' Dios.

*Le gaca quégaca nupa bití' ulu'bí'i ládi' gaca
(Mt. 11:20-24)*

¹³ Gunnë' ca' Jesús:

—Bica' bayechi' libí'ili', bönachi yödzo Corazín. Bica' bayechi' libí'ili', bönachi yödzo Betsaida. La'tu' gulaca lu yödzo Tiro, en lu yödzo Sidón yugu' yöl-la' huáca rubani ca yugu' le bena' ga zóali', dza ni'te ulu'bí'i ládi'gaquië' bönni' ni', ate' ilácuë' lari' cá'asö, en ila'gu'ë dö ícjagaquië', le ulu'ígaca chibulu'bí'i ládi'gaquië'. ¹⁴ Que lë ni na', cate' idxín dza ichúguië' Dios quégaca bönachi, qu'i sáca'röli' ca ila'gu'i ila'záquië' bönni' yödz Tiro, en yödz Sidón. ¹⁵ Libí'ili', bönachi Capernaum. Réquili' tsázali' yehua' yubá. Huötjali' tsöjtsázali' lataj chulla quégaca nupa nátigaca.

16 Ní'irö Jesús gudxë' yugu' bönni' usëda queë', rnnë':

—Nu ruzë nagui libí'ili', ruzë nagui ca' neda', ate' nu rucá'ana libí'ili' cá'asö, rucá'ana ca' neda' cá'asö, en nu rucá'ana neda' cá'asö, rucá'ana ca' cá'asö Xuza', nasól-lë'ë neda'.

Bönni' yöjéngaquië' libán tu' dxinë' ga zoë' Jesús

17 Cate' tsónnalalaj yu' chië' bönni' na' gusól-lë'ë Jesús bulu'dxinë' ga zoë' Lë', bönni' na' yöjéngaquië' libán, ta'nnë':

—Xan, tun bö' xihui' ca rnnatu' cate' ruguntu' dxin Lo'.

18 Jesús gudxë' légaquië':

—Neda' bilé'eda' Satanás tu' xihui', gubixi zxan lúzxiba ca run yösa, le riyaza luyú. 19 Buli'yútsöca', neda' nudöda' lu ná'ali' yöl-la' unná bë' para gaca söngacali'-ba' bëla sínia', en xöjnö', en biti' bi gaca queëli', ate' ucúl-lali' yöl-la' unná bë' que tu' xihui', nu biti' rilé'e rë'u dxi'a. 20 Na'a, buli'dzeja, calégasö tu' tun bö' xihui' ca rnnali', pero tu' nuzúajgaca lali' lu guichi ni' yehua' yubá.

Rudzéjanë' Jesús

(Mt. 11:25-27; 13:16-17)

21 La' ní'isö rudzéjanë' Jesús, dzáguië' Dios Bö Lá'ayi Lë', rnnë':

—Rigu'a Li' yöl-la' ba, Xuza', nacu' Xani yehua' yubá, en Xani luyú ni, tu' bucáchu'u yugu' lë ni lógaquië' bönni' táquië' yenni', en bönni' ta'yéajni'inë', pero buluí'iguequinu'-bi' bí'ido' ca naca. ¡Ca' gaca, Xuza', tu' caní guyaza ladxu'u!

22 Ní'irö gunnë':

—Yúgu'të budödë' Xuza' lu na'a. Cuntu nu bönni' nõzinë' Nu náquië' Zxí'inë' Dios, pero tuzë' Dios Xuz nõzinë', ate' cuntu nu nõzi Nu náquië' Dios Xuz, pero tuzë' Zxí'inë' nõzinë', ate' inözigaca ca' nupa na' Zxí'inë' rë'ënë' uluí'inë' léguequi Xuzë'.

²³ Ní'irö Jesús buyúë' yugu' bönni' usëda queë', en rë' légaquië':

—Bica' bágaca nupa ta'lé'e le rilé'eli' libí'ili',
²⁴ tu' rea' libí'ili': Zián bönni' gulu'ë didza' uláz queë' Dios, enca' bönni' gula'nná bë'ë, gulë'ënnë' ila'lé'enë' le rilé'eli', pero biti' bila'lé'enë' le. Gulë'ënnë' ila'yönnë' le riyönnili', pero biti' bila'yönnë' le.

Tu bönni' Samaria, bönni' tsahui'

²⁵ Ní'irö guyasë' tu bönni' yudo' usedi, en para si' bë'ë Jesús, gunábinë' Lë', rnnë':

—Bönni' Usedi, ¿bizxi ral-la' guna' para idéli'da' yöl-la' na'bán idú?

²⁶ Jesús rë' lë':

—¿Bizxi caz nazúaj lu guichi lu xibá queë' Moisés? ¿Nacxi rusaca' quiu' lë na' rulabu'?

²⁷ Bubi'ë didza' bönni' na', rnnë':

—Caní rna: “Idxí'inu' Xanu' Dios idú lãdxu'u, en len idú icja lãdxí'do'o, en len idú yöl-la' run quiu', en len idú yöl-la' réajni'i quiu', ate' idxí'inu' bönni' luzó'o ca nadxí'i cuinu'.”

²⁸ Jesús rë' lë':

—Dxí'ado' bubí'u didza'. Ben caní, ate' gata' quiu' yöl-la' na'bán na'.

²⁹ Tu' gú'unnë' bönni' na' ubéaj dxi'a cuinë', rë' Jesús:

—¿Nuzxi na' bönni' luzá'a?

30 Bubi'ë didza' Jesús, rë' lë':

—Buzé'ë tu bönni' Jerusalén, rudínnië', sa'yéajë' yödzö Jericó. La' nöza ni' gula'zönë' gubán lë'. Gula'güé' lari' nácuë', en gulunë' lë' huë'. Ní'irö bulu'zë'ë ni', en nucá'anagaquië' lë', chirati cazë'.

31 Ní'irö gudödë' tu bixúz la' nöza ni'. Cate' bilé'enë' bönni' huë' na', tsölá'alö gudödë'. 32 Gudödë' ca' ni' tu bönni' nababë' xzí'ini xi'sóë' Leví, yugu' bönni' na' tunë' dxin que yudo'. Cate' bilé'enë' lë', tsölá'alö ca' gudödë'.

33 Lësca' yu'ë tu bönni' Samaria nöza na', ate' bidxinë' gala' ga dë' bönni' huë' na'. Cate' bilé'enë' lë', buéchi' ládxë'ë lë'.

34 Gubígui'ë ga na' dë', ate' gulu'ë le za, en xisi uva nál-la lu huë' queë', ate' buchölinë' le lari'. Ní'irö budxië' lë' cúdzu'ba' böa' queë', en bu'ë lë' yu'u ga ta'dxinë' bönni' yú'ugaquië' nöza, ate' ni' gudapa chi'ë lë'.

35 Cate' za' rení' ia'tú dza, en chizóa uzé'ë bönni' Samaria na', guléajë' lászjaru' que chopa dza, le bucá'anë' lu në'ë bönni' xan yu'u na', en rë' lë': “Gudapa chi'ë bönni' ni, en channö utóu' ia'lati' dumí, ubi'a neda' quiu' cate' huöda.”

36 Na'a, ¿nacxi runi li? ¿Núzxilë' bönni' yonna ni gúquië' bönni' luzé'ë bönni' na' gulu'ë dö' bönni' gubán queë'?

37 Bubi'ë didza' bönni' yudo' usedi na', rë' Jesús:

—Bönni' na' buéchi' ládxë'ë lë'.

Ní'irö Jesús gudxë' lë':

—Guyéaj na'a, yöjén ca' li'.

Le benë' Jesús lídxigacanu Marta, en María

38 Ní'irö bu'ë nöza Jesús, ate' bidxinë' tu yödzödo' ga ni' tu nigula lënu Marta guchë'ënu Lë' lídxinu.

39 Marta ni zóanu nigula xzílanu lënu María, ate'

María na' gurö'ötënu ga naca xini'ë Jesús, en ruzë náganu xtidzë'ë. ⁴⁰ Marta na' bubi buguí'ínu, zían dxin runnu, ate' gubíga'nu ga na' zoë' Jesús, en rënu Lë':

—Xan, ¿naru' cabí ruí'i ládxi'tso' neda' tu' nucá'anabi' bi'i zxila' ni neda', ate' tuza' runa' dxin? Gudxi-bi' gácalenbi' neda'.

⁴¹ Bubi'ë didza' Jesús, rë'ë-nu:

—Marta, Marta, ruúbi ruguí'ide'enu', en zían le ruí'i ládxi'u runu'. ⁴² Tuz le run bayudxi nu gun, ate' María ni guröbi' lë na' nácatëro dxi'a, ate' lë na' guröbi' biti' udúa queëbi'.

11

Ca ral-la' ulídzaru'-në' Dios (Mt. 6:9-15; 7:7-11)

¹ Tu dza ni' Jesús rulidzë' Dios. Cate' budxi bë'lenë' Dios didza', tuë' bönni' usëda queë' rë' Lë', rnnë':

—Xan, busedi netu' ulídzatu'-në' Dios güi'ilentu'-në' didza', ca benë' Juan, busëdinë' bönni' dá'gaquië' lë'.

² Ní'irö Jesús rë' légaquië':

—Cate' ulídzali'-në' Dios güi'ilenli'-në' didza', guli'ná:

Xuztu', zu' yehua' yubá, gá'ana zxön Lo'.

Gudá inná bë'u.

Gaca ca raza ládxi'u Li' luyú ni, ca na' raza yehua' yubá.

³ Benna le gágutu' na'a dza.

⁴ Buniti lo netu' dul-la' nabága'tu'

ca netu' ca' runiti lotu' nupa tua' dö' queëtu'.

Biti' gu'u lataj si' bë' tu' xihui' netu',

pero busölá netu' lu na' nu ruá' dö'.

⁵ Jesús rē' ca' légaquiē':

—Channö zoē' nu bönni' ladjali', en zoē' böchi' luzě'ë, en channö huidē' ga na' zoē' guluhuēla, ate' ulidzē' lē', innē': “Böcha'a, benna quia' tsonna yöta xtila ⁶ tu' si' bidxinē' quia' böchi' luzá'a, zē'ë zi'tu', pero biti' bi dē le gu'a-nē' gahuē'.”
⁷ ¿Naru' ubi'ë didza' caní bönni' na' zoē' yu'u, guiē' lē': “Biti' utsó'o neda' tu' chinayayaj yu'u, en chidēlengacabi' bi'i quia' neda', ate' biti' gaca chasa' bi gunna' quiu'”? ⁸ Neda' rea' libí'ili': Salla' biti' chasē' bi unödzjē' queē' tu' náquiē' böchi' luzě'ë, pero chasē', en unödzjē' queē' idutē le riquinnē' para cabirö upíxjanē' lē'. ⁹ Que lē ni na' rea' libí'ili': Guli'naba, ate' Dios gunnē' queēli'. Guli'quilaj, ate' idzöli queēli'. Buli'lidza ra' yu'u, ate' tsalaj queēli'. ¹⁰ Nu rinaba, rizí' que, ate' nu riguilaj, ridzöli que, ate' nu rulidza ra' yu'u, ralaj que.

¹¹ 'Channö zoē' nu bönni' ladjali', en náquiē' xuz, ate' channö zxí'inē' inábibi' lē' yöta xtila, ¿naru' unödzjatsē' queēbi' guiöj? Channö inábibi' lē' tuba' böla, ¿naru' unödzjatsē' queēbi' bëla? ¹² Channö inábibi' lē' dxita que böra, ¿naru' unödzjatsē' queēbi' xöjnö'? ¹³ Caní naca, nácali' libí'ili' huiá' dö', pero nözili' unödzjali' quégacabi' zxí'inili' le naca dxí'a. Nácatērö löza Xúzili' zoē' yehua' yubá gunnē' queēli' Dios Bö' Lá'ayi, nülöli' inábili' Lē'.

Ta'nnē' runē' dxin Jesús len yöl-la' huáca que tu' xihui'

(Mt. 12:22-30; Mr. 3:19-27)

14 Tu dza bubéajë' Jesús bö' xihui' yu'u tu bönni', le run ga bití' raca inné'. Cate' burúaj bö' xihui' na', bë'ë didza' bönni' na' bití' guca inné', ate' bulu'bani bönachi nacua' ni'. 15 Bal-la bönachi nacua' ni' ta'nná:

—Len yöl-la' huáca que tu' xihui' Beelzebú, xángaca bö' xihui', rubéajë' yugu' bö' xihui' na'.

16 Ia'bal-la bönachi na' gulé'ëni ila'zì' bë' Jesús, ate' gula'nabi Lë' gunë' tu le gaca bë' le za' yehua' yubá. 17 Réquibe'enë' Jesús le ta'zá' ládxi'gaquië', ate' rë' légaquië':

—Gátitës ga ta'nná be'e bönachi luzé'eguequi, channö ila'rúaj choplö la' léguequisö bönachi na', ila'niti. Channö ila'rúaj choplö bönachi nacua' tu yu'u, údxi quéguequi. 18 Lësca' caní' raca que Satanás, tu' xihui', nazí'i le ca' Beelzebú. Channö ila'rúaj choplö nupa dá'gaca le, ¿nacxi gaca idía' yöl-la' unná bë' que? ¿Rnnátsali' na'a: Len yöl-la' huáca que Beelzebú rubéaja' yugu' bö' xihui'? 19 Channö neda', len yöl-la' huáca que Beelzebú rubéaja' yugu' bö' xihui', ¿nuzxi runna quégaca nupa dá'gaca libí'ili' yöl-la' huáca tu'béaj yugu' bö' xihui'? Que lë ni na', le tun nupa ni naca bë' nachíxili'. 20 Channö neda', len yöl-la' huáca queë' Dios rubéajgaca' bö' xihui', le nácatë chibidxín le rinná bë'ë Dios ga zóali'.

21 'Cate' tu bönni' nál-la dë lu në'ë le rudí'inë', en rapa chí'ë lidxë', naca chí'i dërö le dë queë'. 22 Na'a, channö zë'ë ia'túë' bönni' nál-latërë' ca lë', en ucul-lë' lë', ní'irö cuë' yúgu'të le rudí'inë', lë na' ruzxöni ládxi'ë, ate' quísië' le dë queë' bönni' na'.

23 'Nu bití' rácalen neda', ridá'baga' neda'. Nu bití' rutúbilen neda', rusilasi nu na'.

Ca naca que bö' xihui' ruxín xilataj
(Mt. 12:43-45)

²⁴ Gunnë' ca' Jesús:

—Cate' rirúaj bö' xihui' lu bönni', ridá gapa nabídx, riguila'j ga uzi' ladxi'. Channö cabí idzöli que, inná: “Huöja' xilatja' ga ni' birúaja'.” ²⁵ Cate' ruxín ni', röjxaca' bönni' na', náquië' ca tu yu'u chinulúa, en chinabá'a para nu tsöjsóa ni'. ²⁶ Ní'irö reaj, en röjxí' ia'gadxi bö' xihui', nácacatërö xihui' ca le, ate' ta'yú'u bönni' na'. Na'a, le raca queë' bönni' na' nayáli'tërö ca le guca queë' zí'alö.

Le naca bica' ba le naca idú

²⁷ Tsanni ni' ru'ë Jesús didza' ni, tu nigula nútsa'nu ladaj bönachi zían na' bë'ënu zidzaj didza', rnnanu:

—Bica' ba nigula na' biá'anu Li' lë'ënu, en bica' ba ca' luchú'unu ga na' gúdxu'u.

²⁸ Bubi'ë didza' Jesús, gunnë':

—Nácacatërö bica' ba nupa ta'yöni xtídzë'ë Dios, en tun ca rna.

Ta'nábinë' Jesús gunë' le gaca bë' nuzxi náquië'
(Mt. 12:38-42; Mr. 8:12)

²⁹ Tsanni ni' ta'biga' bönachi zían ga zoë' Jesús, gusí lahuë' ru'ë didza', rnnë':

—Ta'nába bönachi tuá' dö' ni guna' le gaca bë' ga za' yöl-la' huáca quia', pero bití' bi le gaca bë' ila'lé'enë'. Tuz le gaca bë' ca na' guca queë' Jonás ila'lé'enë'. ³⁰ Ca na' guca queë' Jonás, gúquië' tu le naca bë' lógaca bönachi yödzö Nínive, lësca' caní gaca quia' neda', Bönni' Guljë' Bönachi, gaca' tu le gaca bë' lógaca bönachi dza ni zóaru' na'a. ³¹ Cate' idxín dza ichúguië' Dios quégaca bönachi ila'gu'i

ila'zaca', en uchi'a usöröë' bönachi dza ni zóaru' na'a, Dios uchisë'-nu nigula gunná bé'enu bönachi dza ni'te luyú ni' dë tsölá'a ga ridödi gubidza beo' ziaga, ate' le bennu uluí'i nabága'gaca bönachi ni xíguia', tu' bídanu lënu, birúajnu ga naca zi'tu' para uduzë náganu didza' réajni'i bē'ë Salomón, bönni' gunná bé'enë' bönachi Israel, pero na'a, zoa' neda' ni, en nayëpisëtëra' ca Salomón na'. ³² Lësca' caní, Dios uchisë' bönni' gula'cu'ë yödzo Nínive cate' idxín dza ichugu bē'ë quégaca bönachi, en uchi'a usöröë' bönachi dza ni zóaru' na'a, ate' le gulunë' uluí'i nabága'gaca bönachi ni xíguia', tu' bulu'bí'i ládxi'gaquië' bönni' Nínive cate' bila'yönnë' libán benë' Jonás, ate' na'a zoa' neda' ni, en nayëpisëtëra' ca Jonás na'.

Le rigú'u bení' lu icja ládxi'do'oru'

(Mt. 5:15; 6:22-23)

³³ Gunnë' ca' Jesús:

—Cate' nu ruquela' guí', bití' rigú'u le ga n-gachi', en bití' rudusi' le guí'ina, pero ruzóa le xitsá' ga liná', para uzení' quégaca nupa ta'yú'u yu'u na'. ³⁴ Guiöj loru' naca ca tu le rigú'u bení' lu icja ládxi'do'oru'. Channö guiöj lo' naca dxi'a, idúteo' yudzu le naca bení', pero channö naca xihui' guiöj lo', idúteo' yudzu le naca chul-la. ³⁵ Ben chi'i cuinu' na'a, para cabí huóaca chul-la lë na' rigú'u bení' lu icja ládxi'do'o. ³⁶ Caní naca, channö idúteo' nalísinu' le naca bení', en bití' bi zóalen li' le chul-la, yúgu'të ilé'enu' dxi'a ca raca cate' ruzení' quiu' guí'.

Jesús ruzéqui'ë yugu' bönni' yudo' didza'

(Mt. 23:1-36; Mr. 12:38-40; Lc. 20:45-47)

³⁷ Cate' budxi bëë didza' ni Jesús, tu bönni' yudo' fariseo bulidzë' Lë' para tsöjtágulenë' lë'. Cate' guyázië' Jesús lidxë' bönni' yudo' na', guröë' rahuë'. ³⁸ Cate' bönni' yudo' fariseo na' bilé'enë' Lë', bubáninë' tu' cabí gudibi nëë Jesús cate' si' gahuë'. ³⁹ Xanru' rë' lë':

—Libi'ili', bönni' yudo' fariseo, riguibi cuinli' ca rigubili' láhuilögaca le rë'aji ráhuili', pero lu icja ládxi'do'oli' ruhuídi'li', en rizá' ládxi'li' le ruá' dö'. ⁴⁰ Libi'ili', bönni' biti' réajni'ili'. ¿Naru' cabí nözili', Nu ben le zoa láchuisö ben ca' le yu'u lë'elö? ⁴¹ Na'a, guli'gún gun le dë queëli', ate' ní'irö huóaca dxi'a yúgu'të le dë queëli'.

⁴² 'Bica' bayechi' libi'ili', bönni' yudo' fariseo. Riguíxjali' que yudo' tu cö' huéaj tu' chi cö' le rizí'ili' que xöhuéaj, en que guixi' ruda, en quégaca guixi' cuando', pero rudódisili' le naca tsahui', en yöl-la' nadxi'i queëli' Dios. Yugu' lë ni run bayudxi gunli', en biti' ucá'anali' ia'zica' lë na' runli'.

⁴³ 'Bica' bayechi' libi'ili', bönni' yudo' fariseo. Rë'ënili' cö'öli' gapa naca lo lu yu'u ga rudúbili' rusédali' queë' Dios, en rë'ënili' ulu'lidza bönachi libi'ili' ba zxön gapa naca láhuilöguequi bönachi.

⁴⁴ 'Bica' bayechi' libi'ili', bönni' yudo' usedi, enca' libi'ili', bönni' yudo' fariseo, bönni' rulu'isö tsahui' cuinli', tu' nácali' ca nácagaca yeru ba quégaca nupa nátigaca le cabí nalá'gaca, ate' ta'dá bönachi láhuigaca yeru ba na', en biti' téquibe'e.

⁴⁵ Ní'irö bubí'ë didza' tu bönni' yudo' usedi raquië' xibá queë' Moisés. Rë' Jesús:

—Bönni' Usedi, cate' rnno' caní, netu' ca' runu' zi'.

⁴⁶ Jesús rë' lë':

—Bica' bayechi' ca' libí'ili', bönni' yudo' usedi rácali' xibá queë' Moisés, tu' rusubága'gacali' bönachi tu yua' zi'i le cabí gaca nu guá', pero libí'ili' calëga láti'do'os biti' ruláhui'li' le len ná'ali'.

⁴⁷ 'Bica' bayechi' libí'ili', tu' richísali' biquitaj quégaca ba ga nagáchi'gaquië' bönni' gulu'ë didza' uláz queë' Dios, ate' gulútië' xuz xtó'oli' légaquië'. ⁴⁸ Caní naca, runli' ba nali' runli' tuz le gulunë' xuz xtó'oli' tu' gulútië' xuz xtó'oli' na' légaquië', ate' libí'ili' richísali' biquitaj quégaca ba ga nagáchi'gaquië'.

⁴⁹ 'Que lë ni na', lu yöl-la' réajni'i queë', Dios gunné' caní: "Isöl-la'a queëli' bönni' ilu'ë didza' uláz quia', en yugu' bönni' gubáz quia', ate' yugu' bönni' ni, bal-lë' gútili', en ia'bal-lë' cuia na'li' légaquië'." ⁵⁰ Caní gunë' Dios tu' uchi'a usöröë' quégaca bönachi dza ni zóaru' na'a, ni'a que rön quégaca yúgu'të bönni' gulu'ë didza' uláz queë', bönni' ni' bétigaca bönachi légaquië' cate' gusí lo rata' yödzölió, ⁵¹ ga gusí lo nu bëti Abel, ga bidxintë gulútië' Zacarías, bönni' na' gulútië' gatsaj láhui'lö ga dë bucugu lá'ayi ga na' tu' zégu'gaquië'-ba' böa' bëdxido' lahuë' Dios, en ga dë lataj lá'ayi. Que lë ni na', rea' libí'ili', Dios uchúguë' quégaca bönachi dza ni zóaru' na'a, ni'a que rön quégaca yúgu'të bönni' na' gulútië' xuz xtó'oli' légaquië'.

⁵² 'Bica' bayechi' libí'ili', bönni' yudo' usedi, rácali' xibá queë' Moisés. La' libí'isili' dë lu ná'ali' xzí'ini guíë que lataj ga ta'dzöli bönachi yöl-la' réajni'i. Libí'ili' biti' riyázali', ate' ruzága'li' xinözigaca nupa té'ëni ila'yaza.

⁵³ Cate' Jesús budxi bë'lenë' légaquië' didza'

ni, bönni' yudo' tu'sédinë', en yugu' bönni' yudo' fariseo gula'léde'enë' Lë', ate' gula'sí lógaquië' ta'naba yúdxide'enë' Lë' ca naca zían le taca, ⁵⁴ en tu'béajë' Lë' didza' para gaca ulu'zéguië' Lë' didza' ni'a que didza' ubi'ë.

12

Rusédinë' Jesús ca naca yöl-la' rulu'isö tsahui' cuini

¹ La' dza na' bulu'dubi zían gayuá' bönachi ga zoë' Jesús ga bidxintë ta'rölisö luzë'eguequi bönachi na'. Ní'irö gusí lahuë' Jesús rë' yugu' bönni' usëda queë cazë', rnnë':

—Guli'gún chi'i cuinli' que le naca ca cúa zi que yöta xtila quégaquië' bönni' yudo' fariseo, le naca yöl-la' rulu'isö tsahui' cuini quégaquië'. ² Biti' bi dë le naca balándo'os le cabí ilá' lahui, en biti' bi dë le nagachi' le cabí gaca bë'. ³ Que lë ni na', yúgu'të le chigunnáli' ga naca chul-la, ila'yöni bönachi ga naca lu bení', ate' didza' bë'ëli' bagáchi'sö ga guzóa lu yu'u nayayaj, gaca libán que ga naca lógaca bönachi.

Nu ral-la' gádxiru'
(Mt. 10:28-31)

⁴ Gunnë' ca' Jesús:

—Böcha'ado', rea' libí'ili': Biti' gádxili' bönni' tütigaquië' bönachi, ate' tödi na' bíti'rö bi gaca ilunë' quéguequi. ⁵ Ulu'ida' libí'ili' nu ral-la' gádxili'. Guli'gadxi Nu na' gaca ugúa yöl-la' na'bán queëli', en tödi na' dë lu në'ë yöl-la' unná bë' chú'unë' libí'ili' lu guí' gabila. Ön, rea' libí'ili', guli'gadxi Nu na'.

6 'Túti'gaquië'-ba' gáyu'ba' biguínido' len chopa dumí lásido'. Biti' ral-la ládxi'ë-ba' Dios tu biguínido' na'. 7 Lësca' caní, yúgu'të guitsa' ícjali' nabábagaca lahuë' Dios. Que lë ni na', bití' gádxili'. Nazáca'tëröli' libí'ili' ca zianba' biguínido'.

*Nupa ta'nnasö néquiquequi queë' Jesús
(Mt. 10:32-33; 12:32; 10:19-20)*

8 Gunnë' ca' Jesús:

—Rea' libí'ili': Yúgu'të bönni' ta'nnë' néquiquequinë' quia' neda' lógaca bönachi, lësca' neda', Bönni' Guljë' Bönachi, innía' néquiquequinë' quia' lógaquië' gubáz lá'ayi queë' Dios, 9 ate' bönni' ta'dá'baguë'ë néquiquequinë' quia' lógaca bönachi, lësca' neda' tá'baga'a néquiquequinë' quia' lógaquië' gubáz lá'ayi queë' Dios.

10 'Yúgu'të nupa bi ila'nnë quia' neda', Bönni' Guljë' Bönachi, gaca uniti lahuë' Dios léguequi, pero nu innë zi' queë' Dios Bö' Lá'ayi, bití' uniti lahuë' Dios nu na'.

11 'Cate' ila'chë'ë libí'ili' gapa naca lu yu'u ga tu'dubë' bönni' judío, en tu'sedë' queë' Dios, en lógaquië' bönni' ulu'chi'a ulu'söröë' libí'ili', en lógaquië' bönni' dë lu ná'agaquië', bití' ubi uguí'ili' nacxi gunli' o bizxi didza' ubí'ili', o bizxi innali'.

12 La' dza ná'asö usédinë' Dios Bö' Lá'ayi libí'ili' le ral-la' innali'.

Huáca gun yöl-la' tsahui' queëru' ga gal-la ládxi'ru'-në' Dios

13 Tu bönni' nútsë'ë ladaj bönachi zián na' rë' Jesús, rnnë':

—Bönni' Usedi, gudxë' böcha'a gunnë' uláz quia' le guta' queë' xuztu'.

14 Jesús rē' lē':

—Bōnni'. ¿Naru' zoa nu buzóa neda' ca nu uchi'a usörö libí'ili', o nu gun gatsaj le dē queéli'?

15 Ní'irö Jesús gudxē' bōnachi nacua' ni', rnnē':

—Buli'yútsöca'. Guli'gún chi'i cuinli' para cabí uhuídi'li'. Le uzi'ē xibé nu bōnni' biti' nácasö le zían le dē queē'.

16 Ní'irö Jesús bé'lenē' légaquiē' didza', bucúdzu'ē didza', rnnē':

—Zoē' tu bōnni' rilé'enē' yöl-la' tsahui' queē', ate' runödizada' gulapa lu xiyúē'. 17 Ní'irö guzá' ládxe'ē bōnni' na', rnnē': "¿Nacxi guntsa'? Biti' dē ga gapa chi'a le rulá' quia'." 18 Ní'irö rnnē': "Caní guna'. Uquínnajgaca' yu'u ga rapa chi'a le rulá' quia', ate' guna' yugu' yu'u zxönterö ca', ate' gapa chi'a le rulá' quia' ni', len yugu' le dē quia'. 19 Ní'irö gaca guíe' cuina': Chidéda' quia' zían le chinutuba', le gáhuida' zían iz. Uzí' ládxa'a. Gu'aj gahua', en udzējada'." 20 Ní'irö Dios rē' lē': "Li', bōnni' biti' bi nōzinē'. Na'a dzö' gátiu'. Na'a, ¿nuzxi caz guequi que, lē na' chinutubu'?" 21 Caní raca queē' bōnni' rutubē' la' queézē' yöl-la' tsahui', en biti' runē' le naca ca yöl-la' tsahui' lahuē' Dios.

Dios run chi'ē yugu' bōnachi queē'

(Mt. 6:25-34)

22 Gudödi ni' Jesús gudxē' yugu' bōnni' usēda queē', rnnē':

—Que lē ni na' rea' libí'ili': Biti' ubi uguí'ili' ni'a que le gu'aj gáguli', lē na' nabánili', o ni'a que lari' gáguli'. 23 Nácarö lesaca' yöl-la' na'bán queéli' ca le ráguli', ate' nácarö lesaca' idú le nácali' ca lari' ráculi'. 24 Buli'yutēz ca raca quégacaba' boíquiaj.

Biti' tázaba', en bití' ta'lápaba', en bití' nacuá' quégacaba' ga ilún chí'iba' le rulá' quégacaba', pero Dios rugahuë' lézacaba'. ¿Naru' cabí nazáca'tëröli' libí'ili' ca yugu' biguínido'? ²⁵ ¿Nuzxi caz bönni' ladjali' gaca gunë' ga soë' ibanë' ia'tú chí'ido'os tu' ruúbi ruguí'i ládxi'da'ahuë'? ²⁶ Que lë ni na', channö cabí gaca gunli' lë ni naca cuídí'sö, ¿bizx que ruúbi ruguí'ili' ni'a que le naca zxöntërö'?

²⁷ 'Buli'yutëz ca ta'zxön yöjdo'. Biti' tun du lari', en bití' taba lari', pero rea' libí'ili', bití' gúcarö lachi le gúcuë' Salomón ca nácagaca yöjdo' ni, sal-la' gúta'da' yöl-la' tsahui' queë'. ²⁸ Channö Dios runë' lachi yöj guíxi'do' rö'gaca na'a la' guíxi', ate' cuxö huidzaj ila'gu'ë léguequi lu guí', ¿naru' cabí gunë' le nácáro dxi'a queëli', libí'ili' na' bití' réajlë'ëli' Dios idú ládxi'li'? ²⁹ Que lë ni na', bití' güi' ládxi'li' le ral-la' gáguli', en le ral-la' guí'jali', en bití' ubi uguí'i ládxi'do'oli'. ³⁰ Yúgu'të lë ni ta'guilaj bönachi yödzölió ni, pero chinöz quézinë' Xúzili' Dios le riquínili'. ³¹ Guli'güi' ládxi'li' tsú'uli' ga rinná bë'ë Dios, ate' yúgu'të lë ni cu'ë xinöza queëli'.

Yöl-la' tsahui' rigú'uru' yehua' yubá
(Mt. 6:19-21)

³² Gunnë' ca' Jesús:

—Biti' gádxili', libí'ili' na' nácali' bö'cu' zxíla'do' quia'. Nabábasili' zóali', pero raza ládxi'ë Xúzili' Dios gunnë' queëli' lataj tsú'uli' ga ni' rinná bë'ë Lë'. ³³ Guli'guti' le dë queëli', en buli'nödzej quégaca bönachi yechi'. Caní gaca, gunli' queëli' yöxaj dumí le cabí gaca ditaj, en cú'uli' yöl-la' tsahui' na' yehua' yubá le bití' ubidxi udú, ga ni' bití' idxinë' bönni' gubán, en bití' usunítiba' böa'do'

le. ³⁴ Ga ni' dē yöl-la' tsahui' queēli', ni' gü'i lādxi'li' idxinli'.

Ral-la' sóaru' ban ladxi'

³⁵ Gunně' ca' Jesús:

—Guli'sóa sina', en guli'quela' guí' le uzení' queēli'. ³⁶ Guli'gaca ca bönni' huen dxin ta'bözē' dza huödē' xángaquiē', bönni' sa'yéajē' laní que yöl-la' rutsaga na', para cate' udxiné', en ulidzē', la' ila'sálatē' queē' tsu'ē. ³⁷ Bica' bágaca huen dxin na' ila'cu'ē ban ladxi' cate' huödē' xángaquiē'. Le nácatē rea' libí'ili', upá'a cuiné' xángaquiē' na', ate' gunē' ga ila'bō'ē ga ilahuē', ate' cu'ē le ilahuē'. ³⁸ Sal-la' huödē' cate' chiral-la o idú guluhuēla, channō idixáquiē' légaquiē' nacu'ē ban ladxi', bica' bágaca huen dxin na'. ³⁹ Lē ni ral-la' inözili'. La'tu' nōzinē' xan yu'u bizxi dza huadxiné' bönni' gubán, usubán lādxē'ē, en biti' gu'ē lataj bönni' na' udxíē' yeru lidxē', para cabí cuanē' le dzö'ō lidxē'. ⁴⁰ Que lē ni na', guli'sóa ban ladxi' ca' libí'ili', tu' huōda' neda', Bönni' Guljē' Bönachi, tu dza biti' ribōzali' neda'.

Bönni' huen dxin tsahui', en bönni' huen dxin biti' náquiē' tsahui'

(Mt. 24:45-51)

⁴¹ Ní'irō Pedro gunábinē' Jesús, rnnē':

—Xan, ¿naru' reo' nétu'sö lē ni rucúdzu'u didza', o reo' ca' caní yúgu'tē bönachi?

⁴² Rē' Xanru' lē':

—¿Nuzxi na' bönni' huen dxin tsahui', en réajni'inē', dē lu nē'ē uláz queē' xanē'? Bönni' ni, xanē' udödē' lu nē'ē lidxē' para cate' gála'rō ilahuē' bönni' nacu'ē lidxē', gu'ē que queēgaquiē'

le ilahuë'. ⁴³ Bica' ba bönni' huen dxin na' cate' huödë' xanë', idixáquië' lë' runë' caní dxin na' nudödë' lu në'ë. ⁴⁴ Le nácatë rea' libí'ili', udödë' xanë' lu në'ë bönni' huen dxin tsahui' na' idutë le dë queë'. ⁴⁵ Channö guéquinë' bönni' huen dxin na' huadzenë' huödë' xanë', ate' isí lahuë' gu'ë dö' quégaquië' ia'z'ica'rë' huen dxin, bönni' en nigula, en isí lahuë' gu'aj gahuë', en súdxinë', ⁴⁶ ní'irö huödë' xanë' bönni' huen dxin na' cate' biti' ribözë' lë', en cate' biti' réquibe'enë', ate' usaca' z'i'ë bönni' huen dxin biti' náquië' tsahui' na', en ichúguië' queë' qui'i sáquië' ca narugu quégaquië' bönni' biti' ta'yéajlë'ë.

⁴⁷ 'Bönni' huen dxin na' nözinë' le ré'ënë' xanë', en biti' zoë' sina', en biti' runë' ca rnnë' xanë', bönni' ni, quínitërë' xanë' lë'. ⁴⁸ Channö cabí nözinë' tu bönni' huen dxin le ré'ënë' xanë', en gunë' le gun ga ibáguë'ë le quinë' xanë' lë', bönni' ni quinë' lë' láti'do'os. Tu bönni' yu'u lu në'ë yenni', yenni' unabë' xanë' lu në'ë, ate' bönni' na' xanë' nuzxöni ládxe'ë lë' le zxön, le zxöntërö ca' unabë' xanë' lu në'ë bönni' huen dxin na'.

*Le náquië' Jesús gun ga ila'rúaj choplö bönachi
(Mt. 10:34-36)*

⁴⁹ Gunnë' ca' Jesús:

—Bida' neda' dujéna' ga tsegui gu' yödzölió ni, en caba ládxa'a chinaguéla' gu' na'. ⁵⁰ Na'a, dë tu le ral-la' qui'i saca'a le naca ca tu le idílida' nisa, ate' rö'a böniga ga idxintë gaca caní quia'. ⁵¹ ¿Naru' réquili' bida' dulequi dxía' le raca yödzölió ni? Rea' libí'ili': ¡Calëga! Bida' duléquia' le gun ga ila'rúaj choplö bönachi. ⁵² Na'a isí lo ulu'lá'alén luzë'eguequi gayu' bönachi nacua' tu yu'u. Tsonnë'

ila'dá'baguë'ë chopë' nazí'igaquië' xtídza'a, ate' chopë' na' ila'dá'baguë'ë tsonnë' na'. ⁵³ Nu bönni' zóabi' bi'i bönni' queë' tá'baguë'ë zxi'inë' na', ate' bi'i bönni' na' tá'baga'bi' xúzibi'. Nigula zóabi' bi'i nigula queënu tá'baga'nu zxi'ininu na', ate' bi'i nigula na' tá'baga'bi' xiná'abi'. Nigula zóanu nigula zxoá' lídxinu tá'baga'nu zxoá' lídxinu na', ate' nigula zxoá' lídxinu na' tá'baga'nu xto' zxi'ininu.

Le nácaqaca bë' le taca na'a dza

(Mt. 16:1-4; Mr. 8:11-13)

⁵⁴ Jesús gudxë' ca' bönachi zián nacuá' ni', rnnë':

—Cate' rilé'eli' za' böaj saca' ga ribía gubidza, la' rnnátëli': “Hualaj guiöj”, ate' caní raca. ⁵⁵ Cate' recja bö' za' saca' ga ridödi gubidza beo' ziaga, rnnali': “Udzá'a na'a”, ate' caní raca. ⁵⁶ Libí'ili', bönni' ruluí'isö tsahui' cuinli'. Nözili' le ruluí'i le raca lúzxiba, en le raca luyú ni, pero bití' réquibe'eli' le ruluí'i le nácaqaca bë' taca dza ni zóaru' na'a.

Ral-la' ugá' analenru' tsahui' nu rilé'ë'u

(Mt. 5:25-26)

⁵⁷ Gunnë' ca' Jesús:

—¿Bizx que bití' ruchi'a rusöröli' la' libí'isili' ca naca le naca tsahui'? ⁵⁸ Channö zoa nu bi unabi yudxi li', ate' zéajli' idxinli' yúlahui', bë' ladxi' ugá' analenu' tsahui' nu na' tsanni ni' yú'uli' nöza, para cabí uzegui li' lahuë' bönni' uchi'a usöröë' libí'ili', ate' bönni' uchi'a usöröë' na' udödë' li' lu në'ë bönni' rusayjë' lidxi guíë, ate' bönni' na' rusayjë' lidxi guíë cu'ë li' lidxi guíë na'. ⁵⁹ Rea' li', bití' uruju' ni' cate' údxirö quizzju' yúgu'të dumí lásido' ral-lu'u que nu na'.

13

Run bayudxi ubí'i ládxi'ru'

¹ La' dza ní'sö bila'dxinë' bönni' ta'guíxjöi'inë' Jesús ca benë' Pilato, bëtië' bal-lë' bönni' Galilea, en guzxi'ë rön quégaquië', le bugútsi'në' xichõngacaba' böa' bëdxi chigulútië' légaçaba' para ila'gu'ë xichõngacaba' na' lahuë' Dios. ² Bubi'ë didza' Jesús, rë' légaquië':

—¿Naru' réquili' gulácarë' bönni' dul-la' bönni' Galilea na' ca ia'zica'rë' bönni' Galilea, tu' gula'guí' gula'zaquië' caní? ³ Rea' libí'ili': ¡Calëga! Channö cabí ubí'i ládxi'li', nítili' ca' yúgu'tëli'. ⁴ Lësca' caní guca quégaquië' chizxunë' bönni' ni', yöjbaga' yu'u sibi na' nazí'i le Siloé légaquië', ate' gulátie'. ¿Naru' réquili' gula'bága'tërë' légaquië' xíguia' ca ia'zica'rö bönachi nacúa' Jerusalén? ⁵ Rea' libí'ili': ¡Calëgal! Channö cabí ubí'i ládxi'li', nítili' ca' yúgu'tëli'.

Rucúdu'ë didza' Jesús que yaga higo biti' bi ribía

⁶ Ní'irö bucúdu'ë didza' Jesús, rë' légaquië':

—Zoë' tu bönni', zoa tu yaga higo nazë' ga naca lu xiyüë'. Röjtiljë' le ribía yaga na', pero biti' bi ridzölinë'. ⁷ Ní'irö gudxë' bönni' runë' dxin lu xiyüë' na', rnnë': “Chiguca tsonna iz rida' rududilja' le cuía yaga higo ni, en biti' bi ridzövida'. Guchugu le. ¿Bizx que run nigui luyú ni?” ⁸ Ní'irö bubi'ë didza' bönni' huen dxin na', rë' lë': “Xan, bucá'anagarö le ia'tú ízatëz, ate' uzatsa' yu zxani, en cu'a bëbu zxani. ⁹ Channö cuía yaga ni, gaca dxi'a, pero channö cabí bi cuía, ní'irö ichugu' le.”

Ruúnë' Jesús tu nigula ré'enu cate' naca dza lá'ayi

¹⁰ Tu dza rusédinë' Jesús bönachi nacuá' lu yu'u ga tu'dubë' bönni' judío, en tu'sëdë' queë' Dios cate' naca dza lá'ayi quégaquië'. ¹¹ Zóanu tu nigula ni' chiguca chixxunu' iz ré'enu, tu' yu'u lënu bö' xihui' run ga te'e bönachi, ate' nayéchutica' sinu ridanu, en bití' ca' raca ulí cuinnu. ¹² Cate' bilé'enë'-nu Jesús, bulidzë'-nu, rnnë':

—Nigúlado', chiböácu' que yödzhüé' quiu'.

¹³ Ní'irö Jesús guxóa në'ë lënu, ate' la' bulitë cuinnu, en gulú'unu-në' Dios yöl-la' ba. ¹⁴ Ní'irö gulénë' bönni' lo que yu'u ga na' tu'dubë' tu'sëdë' queë' Dios. Rilenë' tu' bunë' Jesús nigula na' cate' naca dza lá'ayi. Bönni' lo na' gudxë' nupa nacuá' ni', rnnë':

—Xopa dza nacuá' cate' runru' dxin. Dë lataj yugu' dza ni guídali' para nu un libí'ili', en calëga dza lá'ayi.

¹⁵ Ní'irö bubi'ë didza' Xanru', rnnë':

—Libí'ili', bönni' rulu'isö tsahui' cuinli', ¿naru' cabí rusédxigacali'-ba' böa' bëdxi que queëli' ga na' dá'gacaba' cate' naca dza lá'ayi, ate' tsöjuá'agacali'-ba' para ilé'ajba' nisa? ¹⁶ Nácanu nigula ni' zxí'ini xi'sóë' Abraham, ate' idú chixxunu' iz chiyú'unu lu yalaj que Satanás tu' xihui'. ¿Naru' cabí ral-la' nu usedxi lënu sal-la' naca dza lá'ayi?

¹⁷ Cate' bë'ë didza' ni Jesús, bulu'tuí'inë' yúgu'të bönni' nacu'ë ni' ta'lenë' Lë', pero bulu'dzeja ia'zícá'rö bönachi, yúgu'të nupa nacuá' ni', tu' ta'lé'enë' yugu' le zxön runë' Jesús.

*Rucúdzü'ë didza' Jesús que xisedo' mostaza
(Mt. 13:31-32; Mr. 4:30-32)*

18 Ní'irö rnnë' Jesús:

—¿Nacxi caz raca rixxön le rinná bē'ē Dios, o bizxi uséqui'tseru' le? 19 Raca ca raca que xisedo' mostaza, le guzxi'ē tu bönni', ate' guzē' le ga naca lu xiyúē'. Guzxön yaga mostaza na', en guca ca tu yaga zxön, ate' bila'dxinba' biguínido', gulunba' xcá'agacaba' lu ni'a nē'e yaga mostaza na'.

Rucúdu'ē didza' Jesús que cúa zi que yöta xtila
(Mt. 13:33)

20 Lēscá' caní rnnë' Jesús:

—¿Bizxi caz uséqui'tseda' le rinná bē'ē Dios?
21 Naca ca cúa zi que yöta xtila, le guzxi'ínu tu nigula, en bugútsi'nu tsonna cö' cúa yöta xtila, ate' guyaxaj iduté cúa na'.

Tu ga tödiru' le naca guído'
(Mt. 7:13-14, 21-23)

22 Tsanni ni' yu'ē nöza Jesús, sa'yéajē' Jerusalén, ridödē' yugu' yödzö zxön, en yugu' yödzödo', ate' rusédinē' bönachi nacuá' gapa na'. 23 Tu bönni' zoē' ni' gunábinē' Jesús, rnnë':

—Xan, ¿naru' nabábasö nupa ulu'lágaca?

Jesús rē' nupa nacuá' ni', rnnë':

24 —Guli'güi'í ládxi'li' tsú'uli' saca' ga nu ridödi le naca guído', tu' rea' libí'ili': Zián nupa il'ē'eni ila'yaza ni', pero biti' ila'zéqui'nē'. 25 Tödi chasē' Xan yu'u, en usayjē' yu'u, isí loli' libí'ili' na' zóali' ní'ilo ulídzali'-nē' ra' yu'u na', ate' guiéli'-nē': “Xan, Xan, gusalaj queētu'.” Ní'irö ubi'ē didza' Lē', en guié' libí'ili': “Biti' nözda' nuzxi libí'ili'.” 26 Ní'irö isí loli' innali': “Güi'í gudágulentu' Li', ate' busédinu' gapa naca lu yē'eyi queētu'.” 27 Ní'irö guié' libí'ili': “Rea' libí'ili', biti' nözda' gazxi bönachi

libí'ili'. Guli'cuíta ga zoa', yúgu'téli' ruá'ali' dö.'"
²⁸ Ní'irö cödxi yéchi'li', en gagu zxea láya'li' cate' ilé'egacali'-në' Abraham, en Isaac, en Jacob, en yúgu'të bönni' gulu'ë didza' uláz queë' Dios, nacu'ë ga ni' rinná bë'ë Dios, pero libí'ili' sóali' ní'ilö.
²⁹ Ila'dxín bönnachi ila'rúaj saca' ga rilén gubidza, en saca' ga ribía gubidza, en saca' ga za' bö' ziaga, en saca' ga ridödi gubidza beo' ziaga, ate' ila'bö'ë ilahuë' ga ni' rinná bë'ë Dios. ³⁰ Ní'irö ilaca lo bal-la bönnachi nácagaca cá'asö na'a, ate' ulu'gá'ana cá'asö bal-la nupa nácagaca lo na'a.

Ribödxí yechë'ë Jesús ni'a quégaca bönnachi Jerusalén

(Mt. 23:37-39)

³¹ La' dza ní'isö bila'dxinë' bal-la bönni' yudo' fariseo ga zoë' Jesús en tē' Lē':

—¡Burúaj! ¡Buzxunnaj ni! ¡Rë'ënë' Herodes gútië' Li'!

³² Jesús rë' légaquië':

—Guli'tséaj, guli'tsöjödxe' bönni' na' náquië' ca tuba' böza', innali': "Buyútsöca', rubéajgaca' bö' xihui', en ruúna' bönnachi na'a, en cuxö, en cate' gaca lidzaj, údxi guna' dxin quía'." ³³ Run bayudxi tséajlensa' ca' nöza na'a, en cuxö, en huidzaj, ate' idxina' Jerusalén, tu' tútigaquië' bönni' tu'ë didza' uláz queë' Dios ni'.

³⁴ 'Libí'ili', zóali' Jerusalén. Rútigacali'-në' bönni' tu'ë didza' uláz queë' Dios, en ruládxigacali'-në' guiöj bönni' gubáz risól-lë'ë Dios ga zóali'. Cate' xö zían luzuí gú'unida' utuba' libí'ili' quía' ca runba' yöjede, rutúbiba' börado' queëba' zzan xíliba', pero bití' gú'unili'. ³⁵ Buli'yútsöca', cá'asö ugá'ana

lídxili', ate' rea' libí'ili', bíti'rö ilé'eli' neda' cate' idxinrö dza innali': "Bica' ba Nu na' za' uláz queë' Xanru'."

14

Ruúnë' Jesús tu bönni' ré'enë' huë' gui

¹ Cate' naca dza lá'ayi quégaquië' bönni' judío, guyu'ë Jesús lidxë' tu bönni' unná bë', bönni' yudo' fariseo. Rö'ë Jesús rahuë', ate' nacu'ë bönni' yudo' fariseo ni' ta'në'ë Lë'. ² Zoë' ca' tu bönni' ré'enë' huë' gui ga na' zoë' Jesús. ³ Ní'irö Jesús gunábinë' bönni' yudo' usedi táquië' xibá queë' Moisés, en yugu' bönni' yudo' fariseo, rnnë':

—¿Naru' dë lataj unru' nu re'e cate' naca dza lá'ayi?

⁴ Légaquië' bulu'sayaj ruá'agaquië'. Ní'irö Jesús gudélë'ë bönni' huë' na', en bunë' lë', ate' la' busöl-la'të' lë'. ⁵ Ní'irö Jesús rë' yugu' bönni' yudo' na', rnnë':

—Channö nu bönni' ladjali' nacuá'aba' queë' böa' bëdxi, ate' ibíxiba' tuba' lu yeru, ¿naru' cabí tsöjléajtë'-ba', sal-la' naca dza lá'ayi?

⁶ Biti' bi didza' guca ulu'bi'ë ca naca lë ni.

Nu cö' lataj lo

⁷ Cate' bilé'enë' Jesús ca tunë' bönni' yudo' fariseo na', ta'bö'ë lataj lo ga na' ta'bö'ë tahuë', ní'irö bucúdzu'ë didza', ate' rë' légaquië':

⁸ —Cate' nu bönni' ulidzë' li' guídu' ga raca laní que yöl-la' rutsaga na', biti' cö'u lataj lo. Nadxi ca' nulidzë' ca' tu bönni' nácatë'rë' lo ca li'. ⁹ Ní'irö bönni' na' bulidzë' li' huidë' ga zu', en guíë' li': "Bë' lataj bönni' ni cö'ë ga zu'", ate' ní'irö lu yöl-la' rutuí'i quiu' tsöjchö'u zxánitëlö. ¹⁰ Que lë ni na', cate' nu

bönni' ulidzë' li', guyéaj yöjchö' zxánitëlö, para cate' idxinë' bönni' na' bulidzë' li', huë' li': "Böcha'a, gudödi ia'lati' nilö." Ní'irö gácaru' li' lo lógaca nupa ta'bö'len li' tsözxön. ¹¹ Nu run ba zxön cuini, ilunë' ga huöta' huöxaj, pero nu zoa nöxaj ladxi', ilunë' ga gácarö lo nu na'.

¹² Jesús rë' ca' bönni' na' bulidzë' Lë', rnnë':

—Cati' gunu' tu gü'i huagu o tu lanído', biti' ulídzagacu'-në' yugu' böchi' luzó'o, en yugu' bönni' böchu'u, en yugu' di'a dza quiu', en dzaga yu'u quiu' ta'lé'enë' yöl-la' tsahui' quégaquië', tu' ulu'lidzë' ca' li', ate' caní gaca, ubí'i quiu'. ¹³ Cate' gunu' tu gü'i huagu, bulidza yugu' bönachi yechi', en nupa nabixi ni'a ná'agaca, en nupa biti' raca sá'gaca, en yugu' bönni' lo chul-la. ¹⁴ Ní'irö gacu' bica' ba, tu' cabí gaca bi ulu'bi'ë bönni' caní quiu', pero ubí'i quiu' cate' idxín dza ulu'bán nupa gulún le naca tsahui', en gulátigaca.

Rucúdzu'ë didza' Jesús que tu laní zxön

¹⁵ Cate' tu bönni' rö'ë rágulenë' Jesús biyönnë' didza' ni, rë' Lë':

—Bica' ba nu gagu ga ni' rinná bë'ë Dios.

¹⁶ Jesús rë' lë':

—Zoë' tu bönni' benë' laní zxön, ate' zían nupa bulidzë'. ¹⁷ Cate' chinabá'a la' huagu, gusöl-lë'ë bönni' huen dxin queë' tsöjödxe' nupa na' chin-ulidzë', gunné': "¡Guli'dá! ¡Yúgu'të chinabá'a!" ¹⁸ Gula'sí lógaquië' yúgu'të' ta'nabë' lataj cabí tsöjáquië'. Bönni' zí'alö na' rnnë': "Si' guzxi'a tu luyú, en runda' bayudxi tsöjyúa' le. Ráta'yua' lo' gunnu' neda' lataj." ¹⁹ Ia'tué' rnnë': "Si' guzxi'a gayu' nözaba' bëdxi, ate' tsöjzxí' bë'a légacaba'

ugúngaca'-ba' dxin. Ráta'yua' lo' gunnu' neda' lataj." ²⁰ Ia'túé' rnné': "Si' butsaga na'a, en que lë ni na' biti' gaca guía'." ²¹ Cate' böajë' bönni' huen dxin na', yöjtíxjöi'inë' xanë' yúgu'të lë ni. Ní'irö gulénë' bönni' xan yu'u na', ate' gudxë' bönni' huen dxin na', rnné': "Guyéajtë na'a gapa naca lu yë'ëyi, en gapa naca la' nöza que yödzo ni, ate' ichë'u yugu' bönachi yechi' ni, en nupa nabixi ni'a ná'agaca, en nupa biti' raca sá'gaca, en yugu' bönni' lo chulla." ²² Cate' chinunë' bönni' huen dxin na' caní, rnné': "Xan, chibena' ca na' gunná bé'enu' neda', ate' ni dë lataj." ²³ Ní'irö xanë' gudxë' bönni' huen dxin na', rnné': "Guyéaj gapa naca la' nöza, en gapa naca nöza lasi, ate' ben bayudxi guídigaca nupa nacua' ni' para ilí lidxa', ²⁴ tu' rea' libí'ili': Biti' gahuë' que laní quia' nitúë' bönni' ni' bulidza' zí'alö."

Le sáca'ru' cate' zéajlenru'-në' Cristo

²⁵ Yugu' dza ni' röjácálen Jesús bönachi zían, ate' buécjë' Jesús, en rë' légaquië':

²⁶ —Channö guídalenë' neda' tu bönni', en biti' idxí'irönë' neda' ca nadxí'inë' xuz xinë'ë, en nigula queë', en yugu' zxí'inë', en yugu' bi'i böchë'ë, en yugu' bi'i zanë', en yöl-la' na'bán queë', biti' gaca gáquië' bönni' usëda quia'. ²⁷ Nu bönni' biti' gáquië' ca tu bönni' sa'yéajë' söjtë'ë lë'e yaga cruz, ate' të'ë neda', biti' gaca gáquië' bönni' usëda quia'. ²⁸ Channö zoë' nu bönni' ladaj libí'ili' guë'ënnë' gunë' tu yu'u zían cuía, ¿naru' cabí cö'ë zí'alö ulabë' gáca'xi dumí ral-la' utöë' para inözinë' channö dë queë' tsca le riquinnë' para údxi gunë' yu'u na'? ²⁹ Channö cabí gunë' caní, en isí lahuë' cuéquië'

xilibi yu'u na', ate' biti' gaca údxi gunë' yu'u na', ní'irö ila'sí lógaca yúgu'të nupa ila'lé'e le ulu'titaj lë', ³⁰ ila'nná: "Bönni' ni gusílahuë' runë' yu'u, pero biti' guca údxi gunë' le." ³¹ Lë'sca' caní, channö zoë' nu bönni' rinná bē'ē, en ral-la' tsejē' gudil-la tsöjtíl-lalenë' ia'túë' bönni' rinná bē'ē, ¿naru' cabí cō'ē zí'alö, en cuéqui icjē' channö séqui'nē' tsöjtíl-lalenë' bönni' ni' nachē'ē galaj milē' bönni', ate' lē' chi milsē' bönni' nachē'ē? ³² Channö cabí séqui'nē', cate' ni' zoë' zi'tu' ia'túë' bönni' na' rinná bē'ē, isöl-lē'ē bönni' gubáz queë', ate' inábinë' lē' nacxi ral-la' gunë' para ulu'dzáguië' dxi'a. ³³ Caní naca, channö zoë' nu bönni' ladaj libí'ili' biti' ucá'anë' yúgu'të le dē queë', biti' gaca gáquië' bönni' usëda quia'.

Zödi' le naniti yöl-la' siná'a que

(Mt. 5:13; Mr. 9:50)

³⁴ Gunnë' ca' Jesús:

—Dxi'a naca zödi', pero channö initi yöl-la' siná'a que, ¿nacxi gaca úniru' le siná'a? ³⁵ Bítirö nazaca' zödi' na', calëga para luyú, en calëga para ga rirú'uniru' bëbu, pero chú'unaru' le ní'ilö. Nu zoa nagui, en riyöni, ral-la' uzë nagui nu na'.

15

Rucúdzu'ë didza' Jesús ca naca queëba' bö'cu' zxila' gunítiba'

(Mt. 18:10-14)

¹ Bulu'dubë' yúgu'të bönni' tu'quízxjē' lázagaca bönachi, en yugu' bönni' cá'asö ga zoë' Jesús para ulu'zë náguië' Lë'. ² Que lë ni na' yugu' bönni' yudo' fariseo, en yugu' bönni' yudo' usedi gula'nnë' queë' Jesús, ta'nnë':

—Bönni' ni runë' bal yugu' bönni' dul-la', en rágulenë' légaquië'.

³ Ní'irö bucúdzu'ë didza' Jesús, rë' légaquië':

⁴ —Channö zoë' tu bönni' ladaj libí'ili', nacua'aba' queë' tu gayua'aba' bö'cu' zxila', en channö nítiba' tuba', ¿naru' cabí ucá'anë' ia'zíca'röba' tápalalaj yu' chénnaba' na' ga naca lu lataj cá'asö, ate' tsejë' tsöjdiljé'-ba' bö'cu' zxila' na' nanítiba', cate' udzölrönë'-ba? ⁵ Cate' udzölinë'-ba', lu yöl-la' rudzeja queë' ixóë'-ba' ya' zxicjë', ⁶ en cate' udxinë' lidxë' utubë' yugu' böchi' luzé'ë, en yugu' dzaga yu'u queë', ate' guié' légaquië': "Bulí'dzéjalen neda', tu' chibudzö'lida'-ba' bö'cu' zxila' quia' gunítiba'." ⁷ Rea' libí'ili': Lësca' caní gácatë'rö yöl-la' rudzeja yehua' yubá ni'a queë' tuë' bönni' dul-la' ubí'i ládxë'ë ca gaca quégaquië' tápalalaj yu' chénnë' bönni' tsahui', bönni' téquinë' bití' naquíniguequinë' ulu'bí'i ládxí'gaquië'.

Rucúdzu'ë didza' Jesús que tu dumí guniti

⁸ Rnnë' ca' Jesús:

—Channö zóanu tu nigula, dë queënu chi dumí plata, en channö iníti tu dumí plata na', ¿naru' cabí uquéla'nu gui', ate' ulúanu yu'u, uguilaj yúdxinu le cate' udzölrönu le? ⁹ Cate' udzölinu le, utúbinu yugu' nigula luzá'anu, en yugu' nigula dzaga yu'u queënu, ate' guiënu légacanu: "Bulí'dzéjalen neda', tu' chibudzö'lida' dumí plata na' guniti." ¹⁰ Rea' libí'ili': Lësca' caní, ulu'dzéjade'erönë' gubáz lá'ayi queë' Dios ni'a queë' tuë' bönni' dul-la' ubí'i ládxë'ë.

Rucúdzu'ë didza' Jesús queëbi' tu bí'i gunítibi'

¹¹ Rnnë' ca' Jesús:

—Zoë' tu bönni' nacuá'abi' chópabi' bi'i bönni' queë'. ¹² Bi'i cuidi' na' rëbi'-në' xúzibi': "Dad, benna quia' le dë quiu' le ral-la' guequi quia'." Ní'irö xúzibi' na' gudísië' quégacabi' le dë queë'. ¹³ Nabábasö dza gudzé, bi'i cuidi' na' butúbibi' yúgu'të, ate' guyéajbi' tu yödzö zi'tu', ate' ni' butöbi' dërö le dë queëbi'. Le ruá' dö' benbi'. ¹⁴ Cate' chibutöbi' dërö le dë queëbi', guca gubín lu yödzö ga na' zóabi', ate' biyadzaj queëbi'. ¹⁵ Ní'irö guyéajbi' yöjsóabi' huen dxin queë' tu bönni' lu yödzö ni', ate' bönni' na' gusöl-lë'-ë-bi' ga dë xiyué' tsöjgágubi'-ba' yugu' cuchi queë'. ¹⁶ Guca ládxi'bi' gágubi' guixi' cá'asö na' táguba' cuchi, pero cantu nu bi bë' le gágubi'. ¹⁷ Ní'irö bubí'i ládxi'bi', rnnabi': "Cate' xö bönni' huen dxin nacu'ë lidxë' xuza', en dëda' le tahuë', pero neda' ni huáti caza' yöl-la' ridún. ¹⁸ Uzá'a ni, huöja' ga zoë' xuza', en tsöjödxa'-në': Dad, bena' dul-la' lahuë' Dios, zoë' yehua' yubá, en lo' li'. ¹⁹ Bítirö naca' neda' lesaca' gaca' zxí'inu'. Ben neda' ca bönni' huen dxin quiu'." ²⁰ Ní'irö guyú'ubi' nöza, söhuöajbi' ga zoë' xúzibi'.

'Cate' ni' zóabi' zi'tu' suzá'abi', bilé'enë'-bi' xúzibi', en buéchi' ládxi'ë'-bi'. Carelö yöjzxí'galë'-bi' xúzibi', en yöjnidë' yenbi', gudahuë'-bi' zxixi. ²¹ Ní'irö zxí'inë' na' rëbi'-në': "Dad, bena' dul-la' lahuë' Dios, zoë' yehua' yubá, en lo' li'. Bítirö naca' neda' lesaca' gaca' zxí'inu'." ²² Ní'irö xúzibi' rë' yugu' bönni' huen dxin queë', rnnë': "Guli'tsöjléajté lari' nazáca'tërö, en guli'gacu-bi'. Guli'cú'u le nazaca' xibön ná'abi', en buli'dá' huarache ní'abi'. ²³ Guli'tsöjzxí'i-ba' bëdxi renni', ate' guli'guti-ba'. Gáguru'-ba', en gunru' laní, ²⁴ tu' guca bi'i bönni' quia' ni ca tu bi'i chinátibi', ate'

bubanbi'. Gunítibi', ate' chibulá'abi' na'a." Ní'irö gula'sí lógaquië' tu'dzéjanë'.

²⁵ 'Tsanni ni' raca lë ni, zóabi' bi'i bönni' zí'alö queë' bönni' na' la' guixi'. Cate' suzá'abi' rudxinbi' gala' ra' yu'u, riyönibi' raca huila, en raca huõ'a lu yu'u na'. ²⁶ Ní'irö bulídzabi'-në' tuë' bönni' huen dxin zoë' ni', en gunábibi' lë' bizxi na' raca. ²⁷ Bönni' huen dxin na' rë'ë-bi': "Bi'i böchu'u na' budxinbi', ate' gunná bë'ë xuzu' gulútië'-ba' bëdxi renni', tu' budxinbi' lu në'ë dxi'a tsáhui'do'." ²⁸ Ní'irö gulébi' bi'i zí'alö na', en biti' gú'unibi' tsú'ubi' yu'u. Ní'irö birúajë' xúzibi', en gúta'yue' lobi' tsú'ubi'. ²⁹ Bubi'ibi' didza' bi'i zí'alö na', rëbi'-në' xúzibi': "Nöz quézinu' cate' xö iz bena' dxin lo', en catu caz gudá'baga'a li', pero catu caz bennu' quia' tuba' bö'cu' zxíla'do' para gü'ílena' xibé yugu' luzá'a. ³⁰ Na'a, cate' budxinbi' bi'i quiu' ni busunítibi' yugu' le guta' quiu', gudálenbi'-nu yugu' nigula udá dzaga, benu' ga gulútië'-ba' bëdxi renni' ni'a queëbi'." ³¹ Ní'irö xúzibi' rë'ë-bi', rnnë': "Zxí'ina', lí' zóalen cazu' neda' ate' yúgu'të le dë quia', quiu' nequi. ³² Ben bayudxi gunru' laní, en udzéjaru', tu' gúcabi' bi'i böchu'u ni ca tu bi'i chinati cázabi', ate' nubanbi'. Gunítibi' ate' chibulá'abi'."

16

Rucúdzu'ë didza' Jesús queë' bönni' huen dxin biti náquië' tsahui'

¹ Jesús rë' ca' yugu' bönni' dá'gaquië' Lë', rnnë':

—Zoë' tu bönni' dë yöl-la' tsahui' queë', en zoë' ca' queë' tuë' bönni' huen dxin dë lu në'ë uláz queë'. Bila'dxinë' yugu' bönni' tu'zéguië' bönni' huen dxin na' lahuë' xanë', ta'nnë' queë' rutösë' le dë queë'

xanë' na'. ² Ní'irö xan yu'u na' bulidzë' bönni' huen dxin na', en rë' lë': "¿Bizxi didza' ni riyönda' quiu'? Buluí' neda' le naca bë' dxin nunu', tu' cabirö gata' lu no'o uláz quia'." ³ Ní'irö guzá' ládxë'ë bönni' huen dxin na', rnnë': "¿Nacxi guntsa'? Rubéajë' xana' neda' lataj lo ga runa' dxin. Biti' séqui'da' guna' dxin gú'una, en utuí'ida' inaba' nu bi gúnnasö quia'." ⁴ Na'a nözda' naca guna' para cate' ubéajë' neda' lataj lo ni, ila'cuá' nupa ulu'zí' neda' lídxiguequi. ⁵ Ní'irö bönni' huen dxin na' bulidzë' yugu' bönni' bi tál-lë'ë queë' xanë', ate' rë' bönni' zí'alö: "¿Gáca'xi ral-lu'u queë' xana'?" ⁶ Lë' rnnë': "Tu gayuá' rö'ö chugu le za ral-la'a." Bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Gurö'ötë ni, en buzúaj ia'tú lu guichi le inná chi-un rö'ö chugu ral-lu'u." ⁷ Gudödi ni' gunábinë' ia'túë', rnnë': "Nazxi li', ¿gáca'xi ral-lu'u?" Lë' rnnë': "Tu gayuá' da'a zxoá' xtila." Ní'irö bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Buzúaj ia'tú lu guichi le inná tápalalaj da'a ral-lu'u." ⁸ Réquibe'enë' xanë' na' sína'të benë' bönni' huen dxin bití' náquië' tsahui' na'. Caní naca, nácacacarë' sina' bönni' yödzölió ni lu le tunë' la' légacasë', ca nácacaca bönachi ta'dalen Dios lu bení' queë'.

⁹ 'Neda' rea' libí'ili': Guli'cözalen bönachi dxi'a, ugunli' dxin yöl-la' tsahui' dë queéli' yödzölió ni, para cate' idxín dza ucá'anali' yugu' lë ni, ilunë' libí'ili' bal lataj ni' zóatica'sö.

¹⁰ 'Nu rugún dxi'a dxin tu le cuídi'sö dë lu në'e, lësca' ugún dxi'a dxin tu le zxön gata' lu në'e. Nu bití' rugún dxi'a dxin tu le cuídi'sö dë lu në'e, bití'

ugún dxi'a dxin tu le zxön gata' lu në'e. ¹¹ Que læ ni na', channö cabí rugunli' dxi'a dxin yöl-la' tsahui' dë queëli' yödzölió ni, ¿nuzxi caz udödi lu ná'ali' yöl-la' tsahui' le naca idú? ¹² Channö cabí rugunli' dxi'a dxin le dë lu ná'ali' le nequi que nu yúbölö, ¿nuzxi caz udödi lu ná'ali' le ral-la' guequi que quézili'?

¹³ 'Biti' gaca nitué' bönni' huen dxin gunë' xichíngaca chopa xanë', tu' udí'inë' tuë', en idxí'inë' ia'tué', o gunë' bal tuë', en uzóë' tsölá'alö ia'tué' na'. Biti' gaca gunli' xichinë' Dios, en gunli' ca' dxin para uzí'ili' xibé yöl-la' tsahui' que yödzölió.

¹⁴ Bila'yönnë' bönni' yudo' fariseo didza' ni, ate' tu' nadxí'iguequinë' yöl-la' tsahui' quégaquië', que læ ni na' bulu'titjë' Jesús. ¹⁵ Ní'irö Jesús rë' légaquië':

—Libí'ili' rubéaj dxi'a cuinli' lógaca bönachi, pero nözinë' Dios le yu'u icja ládxi'do'oli', tu' naca læ na' tun zxön bönachi tu le ruzóë' Dios tsölá'alö.

Xibá queë' Moisés, en le rinná bë'ë Dios

¹⁶ Gunnë' ca' Jesús:

—Ga bidxintë dza zoë' Juan, ben dxin le rinná bë' xibá queë' Moisés, en le bulu'zúajë' lu guichi yugu' bönni' gulu'ë didza' uláz queë' Dios. Ní'irö cate' bidxinë' Juan na', gusí lo raca libán ca gaca nu tsaza ga rinná bë'ë Dios, ate' tun bayudxi yúgu'të bönachi ila'yaza ni'.

¹⁷ 'Sal-la' raca caní, gácarö ila'dödi que lúzxiba, en que luyú ni ca initi tu dídza'sö nazúaj lu guichi lu xibá queë' Dios.

Le rulá'a yöl-la' nutsaga na'
(Mt. 19:1-12; Mr. 10:1-12)

¹⁸ Gunnë' ca' Jesús:

—Channö tu bönni' ulá'alenë' nigula queë', ate' utsaga ná'alenë'-nu nigula yúbölö, gunë' dul-la' le riguitsaj xibá que yöl-la' nutsaga na', ate' nu utsaga ná'alen nigula na' nusanë'-nu bönni' queënu, gun ca' dul-la' le riguitsaj xibá que yöl-la' nutsaga na'.

Bönni' dë yöl-la' tsahui' queë', en Lázaro

¹⁹ Ní'irö bucúdu'ë didza' Jesús, rnnë':

—Zoë' tu bönni' rilé'enë' yöl-la' tsahui' queë'. Rácuë' lari' xiná, en lari' nazáca'da', ate' yugu' dza rúntica'së' laní, ate' tē'aj tahuë' le banéquini.

²⁰ Zoë' ca' ni' tu bönni' yéchi'do' lë' Lázaro, bönni' rinabë' nu bi unödzej queë', ate' huë'tëzë' rö'ë ra' yu'u queë' bönni' na' rilé'enë' yöl-la' tsahui'.

²¹ Raca ládxe'ë bönni' yéchi'do' na' gahuë' le bizxaj tu'huöxaj zxani ga rahuë' bönni' na' rilé'enë' yöl-la' tsahui'. Ta'dxinba' ca' bö'cu', en ta'lé'ëba' lu huë' queë' bönni' yéchi'do' na'.

²² Bidxín dza gútië' bönni' yéchi'do' na', ate' gubáz lá'ayi queë' Dios gula'ché'ë lë' tsöjsóalenë' Abraham ga naca lataj lachi queë' Dios. Gútië' ca' bönni' na' bilé'enë' yöl-la' tsahui', ate' bulu'cáché'ë lë' yeru ba.

²³ Cate' ni' riguí'i rizáque'ë bönni' na' bilé'enë' yöl-la' tsahui', zoë' lataj quégaca nupa nátigaca, guchisa lahuë', en bilé'enë' Abraham zoë' zi'tu', en dzáguië' Lázaro na' lë'.

²⁴ Ní'irö bë'ë zidzaj didza', rnnë': "Xuza', Abraham, buéchi' ladxi' neda'. Gusöl-la' Lázaro quia' para usubisë' xibón në'ë, en udusuhuöälë' lúdx'a, tu' riguí'i rizáca'a lu guí' ni."

²⁵ Abraham rë' lë', rnnë': "Zxí'ina', busá' ládxi'u ca guca quiu', buzi'u xibé yöl-la' tsahui' tsanni ni' zu' nabanu', pero Lázaro ni, guca queë' yöl-la' yechi', ate' na'a, ruzí' zxönë' Lázaro ni, pero li' riguí'i rizácu'u.

²⁶ Ia'stú,

tu ra' guí'a sibi rö', le zoa gatsaj láhui'lö ga ni zóali' libí'ili', en ga ni zóatu' netu'. Que læ ni na' nupa nacuá' ni, en ilé'ëni ila'dödi ga zóali' libí'ili', bití' ca' gaca ilunë' ca', en bití' gaca ilida ni nupa nacuá' ni'.²⁷ Ní'irö bönni' na' bilé'enë' yöl-la' tsahui' rë' læ', rnnë': "Xuza' Abraham, ráta'yua' lo' isöl-lu'u-në' Lázaro tsejë' lidxë' xuza',²⁸ tu' nacu'ë gáyu'ë bönni' böcha'a ni'. Gusöl-lë'ë tsöjenë' liná' lo que le raca ni, para cabí guídigaquië' ca' lataj ga ni riguí'i rizáca'a."²⁹ Ní'irö Abraham rë' læ', rnnë': "Dë quégaquië' le buzúajë' lu guichi Moisés, en le bulu'zúajë' lu guichi bönni' gulu'ë didza' uláz queë' Dios. Yugu' didza' quégaquië' na' ral-la' ulu'zë náguië'."³⁰ Bubi'ë didza' bönni' na' bilé'enë' yöl-la' tsahui', rnnë': "Xuza' Abraham, bití' gaca caní, pero channö ubanë' tu bönni' lu yöl-la' guti, en tsejë' ga na' nacu'ë, ulu'bí'i ládxi'gaquië'."³¹ Abraham rë' læ', rnnë': "Channö cabí tu'zë náguië' didza' bë'ë Moisés, en le gula'nnë' bönni' gulu'ë didza' uláz queë' Dios, bití' ila'yéajlë'ë sal-la' nu ubán lu yöl-la' guti."

17

Run bönadxi queëru' gunru' ga nu gun dul-la' (Mt. 18:6-7, 21-22; Mr. 9:42)

¹ Jesús rë' yugu' bönni' dá'gaquië' Lë', rnnë':

—Nacuá'tica'sö le tun ga ilún bönachi dul-la', pero bica' bayechi' bönni' na' runë' ga nu gun dul-la'.² Dxí'arö gaca queë' bönni' na' runë' caní, nu ugal-la' tu guiöj riyëtu yaga yenë', en tsöjchú'una læ' lu nísado', cáte'lö gunë' ga gun dul-la' nu bi'i néquibi' quia'.³ Guli'gún chi'i cuinli'. Channö böchi'

luzó'o gu'ë dö' quiu', buzéajni'i-në', en channö ubí'i ládxe'ë, buniti lo lë'. ⁴ Sal-la' gadxi luzuí tu dza gu'ë dö' quiu', en gadxi luzuí ca' guídë' ga zu', en guié' li': "Rubí'i ládxa'a", ral-la' uniti lo' lë'.

Yöl-la' huáca que le réajlë'ëru' Cristo

⁵ Ní'irö yugu' bönni' gubáz queë' Xanru' tē' Lë', ta'nnë':

—Ben ga tséajlë'ërötu'-në' Dios.

⁶ Xanru' rë' légaquië', rnnë':

—La'tu' naca cuídi'sö yöl-la' réajlë' queëli' Dios, nácasö ca tu xisedo' mostaza, huáca guiëli' yaga zxön ni: "Gucuíta ni, en yöjsóa lu nísado'", atë' gun yaga na' ca rnnali'.

Le ral-la' gun nu naca huen dxin

⁷ Gunnë' ca' Jesús:

—Channö zoë' tuë' bönni' ladaj libí'ili', en zoë' queë' tuë' bönni' nadó'o rugá'anë'-ba' bëdxi o ru-lapë', cate' údxi gunë' xichinë' xanë', ¿naru' huëtsë' xanë' lë', innë': "Gudá, gurö'ö gagu"? ⁸ ¡Calëgal Caní guié' lë': "Bupá'a le gahua'. Guzóa sina' cu'u le guí'aj gahua', atë' tödirö na' huáca guí'aj gagu' li'."

⁹ ¿Naru' huëtsë' bönni' nadó'o queë' na': "Xclenu", tu' benë' ca gunná bé'enë' lë'? Runi neda', biti' gunë' caní. ¹⁰ Lë'sca' caní gaca queëli'. Cate' chinunli' yúgu'të le gunná bé'enë' Dios libí'ili', ral-la' innali': "Nácatu' huen dxin cabí nácatu' lesaca', tu' bénsötu' le run bayudxi guntu'."

Chië' bönni' té'enë' huë' nudzu' ruzödi

¹¹ Tsanni ni' yu'ë Jesús nöza, sa'yéajë' Jerusalén, ridödë' gapa dë yödzödo' nabábagaca luyú Samaria, en luyú Galilea. ¹² Cate' guyázië' tu yödzödo', bila'ruájë' dutságagaquië' Lë' chië' bönni' té'enë'

huë' nudzu' ruzödi, ate' gula'cu'ë zí'tu'sö, ¹³ en tu'ë zidzaj didza', ta'nñë':

—¡Jesús, Bönni' Usedi! ¡Buéchi' ladxi' netu'!

¹⁴ Cate' bilé'enë' Jesús légaquië', rë' légaquië':

—Guli'tséaj, guli'tsöjlu'i cuinli' lógaca bixúz.

Tsanni ni' söjáquië', bulu'huöáquië' dxi'a.

¹⁵ Ní'irö tuë' bönni' nútsë'ë ladjagaquië', cate' réquibe'enë' chinuhuöáquië' dxi'a, böajë' ga na' zoë' Jesús, ru'ítica'së' zidzaj didza', rigu'ë Dios yöl-la' ba. ¹⁶ Biyéchuë', en busudxín lahuë' lu yu lahuë' Jesús, en rë' Lë': “¡Xclenu'!”

Bönni' ni nababë' Samaria. ¹⁷ Ní'irö Jesús rë' lë':

—¿Naru' cabí bulu'huöáquië' dxi'a chië' bönni'?

¿Gazxi nacuá'tsë' ia'zica'rë' bönni' na'? ¹⁸ ¿Naru' cabí zoa nu huöda cu'u Dios yöl-la' ba, pero tuzë' bönni' zí'tu' ni?

¹⁹ Ní'irö Jesús gudxë' bönni' na', rnnë':

—¡Guyasa, en böaj lidxu'! ¡Chiböácu' dxi'a tu réajlë'u neda'!

*Ca idxín le rinná bë'ë Dios
(Mt. 24:23-28, 36-41)*

²⁰ Cate' yugu' bönni' yudo' fariseo ta'nábinë' Jesús bátaxi ral-la' idxín le rinná bë'ë Dios, Lë' bubí'ë didza', rë' légaquië':

—Ca idxín le rinná bë'ë Dios, biti' naca le ilé'eli'.

²¹ Cuntu nu gaca inná: “¡Ni bidxín!”, o inná: “¡Ni' bidxín!” ¡Buli'yútsöca! ¡Rinná bë'ë Dios lu icja ládxi'do'gaca bönachi!

²² Ní'irö Jesús gudxë' yugu' bönni' usëda queë', rnnë':

—Huadxín dza cate' guë'ënili' ilé'eli' dza huöda neda', Bönni' Guljë' Bönachi, pero biti' ilé'eli' le.

²³ Ila'cuá' nupa ilë libí'ili': “¡Ni zoë'!”, o ila'nná:

“¡Ni’ zoë!” Biti’ tséajli’ ni’, en biti’ tséajlenli’ légaquië’. ²⁴ Ca raca cate’ rëpi yösa, ruzení’ idá’alö lúzxiba, lësca’ caní gaca cate’ idxín dza huöda’ neda’, Bönni’ Guljë’ Bönachi. ²⁵ Zí’alö ca gaca lë ni, run bayudxi quí’i sáca’da’, ate’ bönachi dza ni zóaru’ na’a ulu’cá’ana neda’ cá’asö. ²⁶ Ca na’ guca dza ni’ zoë’ Noé, lësca’ caní gaca cate’ idxín dza huöda’ neda’, Bönni’ Guljë’ Bönachi. ²⁷ Dza ni’te na’ gulë’aj gulahuë’. Bulu’tsaga ná’agaquië’, en bulu’dödë’ zxi’inigaquië’ lu yöl-la’ rutsaga na’ ga bidxintë dza guyázië’ Noé lë’e barco zxön na’ nazí’i le arca, ate’ bidxintë nisa guiöj usuniti yödzölió le busuniti yúgu’të’. ²⁸ Lësca’ caní guca dza ni’ zoë’ Lot. Gulë’aj gulahuë’. Gulá’uë’, en gulúti’ë. Gulazë’ xiyúgaquië’, en gulunë’ yugu’ yu’u quégaquië’. ²⁹ Cate’ bidxín dza na’ burúajë’ Lot lu yödzö Sodoma, böxaj guí’ ca tu nisa guiöj, enca’ le ruzéguida’ nazí’i le azufre, ate’ bulu’suniti yúgu’të’. ³⁰ Lësca’ caní gaca cate’ idxín dza ulu’i lahua’ neda’, Bönni’ Guljë’ Bönachi.

³¹ ‘Cate’ idxín dza na’, channö zoë’ tu bönni’ ícjo’olö, en dzö’ö le dë queë’ lu yu’u na’, bití’ ral-la’ huötjë’ tsöjzxi’ë le dë queë’, ate’ nu zoa la’ guixi’, lësca’ caní, bití’ ral-la’ huöjë’ lidxë’. ³² Guli’sá ládi’li’ ca guca queënu nigula queë’ Lot. ³³ Nu bönni’ rë’ënë’ gun chí’ë yöl-la’ na’bán queë’, unítië’ le, pero bönni’ udödë’ yöl-la’ na’bán queë’ ni’a quia’, udélë’ë le.

³⁴ Rea’ libí’ili’: Cate’ idxín rëla na’, ila’cu’ë chopë bönni’ tsözxön ga tasië’, ate’ tuë’ uduzxi’a-në’, en ia’tué’ ucá’ana’ lë’. ³⁵ Ila’cuá’anu huëtu tsözxön chópanu nigula, ate’ tunu uduzxi’a-nu, en ia’tunu ucá’ana’-nu. ³⁶ Ila’cu’ë chopë bönni’ la’ guixi’, ate’ tuë’ uduzxi’a-në’, en ia’tué’ ucá’ana’ lë’.

³⁷ Cate' bila'yönnë' lë ni bönni' usëda queë' Jesús, gula'nábinë' Lë', ta'nnë':

—Xan, ¿gazxi gaca lë ni?

Jesús rë' légaquië':

—Ga dë tu le nati, ni' ulu'dubi quéziba' bíchulab.

18

Tu nigula uzëbi, en bönni' ruchi'a rusöröë'

¹ Ní'irö bucu'dzu'ë didza' Jesús, rë' légaquië' ca run bayudxi ulídzatica'siru'-në' Dios, en biti' gaca chopa ládxi'ru'. ² Rnnë':

—Zoë' tu bönni' ruchi'a rusöröë' tu yödzö, bönni' biti' rádxinë' Dios, en biti' runë' nu bönni' bal. ³ La' yödzö ná'asö zóanu tu nigula uzëbi, ate' bidxinnu nigula ni ga zoë' bönni' ruchi'a rusöröë' na', rn-nanu: “Buchi'a busörö le run quia' nu ruá' dö quia'.” ⁴ Xidzé biti' gú'unnë' bi gunë' queënu, pero gudödi ni' guzá' ládxe'ë, rnnë': “Biti' rádxida'-në' Dios, en biti' runa' nu bönni' bal, ⁵ pero tu' rupízxjanu nigula uzëbi ni neda', que lë ni na' uchi'a usöröa'-nu, para cabí guídatica'sinu ni, en para cabí tödi bë' upízxjanu neda'.”

⁶ Ní'irö Xanru' rë' légaquië', rnnë':

—Guli'zé nágali' ca na' gunné' bönni' ruchi'a rusöröë' na', bönni' biti' náquië' tsahui'. ⁷ ¿Naru' cabí uchi'a usöröë' Dios bönachi gurö cazë' queë', nupa na' tu'lidza Lë' rëla te dza? ¿Naru' huadzétsenë' gácalenë' légaquië'? ⁸ Rea' libí'ili': La' uchi'a usörötenë' légaquië'. Cate' huöda' neda', Bönni' Guljë' Bönachi, ¿naru' idzö'lida' nupa ta'yéajlë' neda' luyú ni?

Tu bönni' yudo' fariseo, en tu bönni' uquíxaj

⁹ Bucúdzu'ë didza' Jesús ca naca quégaquië' bönni' tu'béaj tsahui' cuíngaquië', en tu'cá'anë' cá'asö ia'zíca'rö bönachi. ¹⁰ Gunnë':

—Bila'dxinë' chopë' bönni' ga naca chila yudo' para ulu'lidzë' Dios. Tuë' bönni' na' náquië' bönni' yudo' fariseo, ate' ia'tué' na' náquië' bönni' ruquíxjë' lázagaca bönachi. ¹¹ Guzuínë' bönni' yudo' fariseo na', en caní bulidzë' Dios, rnnë': "Dios, rea' Li': Xclenu', tu' cabí naca' ca nácagaquië' ia'zíca'rë' bönni', nácagaquië' gubán, en biti' nácagaquië' tsahui'. Ta'guitsjë' xibá que yöl-la' nutsaga na'. Lësca' biti' naca' ca bönni' uquíxaj ni. ¹² Neda' runa' gubasa chopa luzuí tu' xunu' dza huéaj, en runödza' que yudo' tu cö' huéaj tu' chi cö' que yúgu'të le rata' quia'." ¹³ Guzózë' zítu' bönni' uquíxaj na', en biti' böáxjanë' ichisa lahuë' uyüë' lúxiba, pero gudapë' luchu'ë, rnnë': "Dios, buéchi' ladxi' neda', bönni' dul-la'." ¹⁴ Neda' rea' libí'ili': Böajë' lidxë' bönni' uquíxaj na', nuhuóáquië' tsahui' lahuë' Dios, calëga ia'tué' bönni' ni'. Núti'tës bönni' run ba zxön cuinë', gunë' Dios ga huöta' igulé', pero nu bönni' rizóë' nóxaj ladxi', gunë' Dios ga gácarë' lo.

Jesús rulidza tsáhuë'ë-bi' yugu' bí'ido'
(Mt. 19:13-15; Mr. 10:13-16)

¹⁵ Ní'irö bila'dxinë' yugu' bönni', en nigula ga zoë' Jesús, naché'gaquië'-bi' yugu' bí'ido' quégaquië' para ixóa në'ë Jesús légaabi'. Cate' bila'lé'enë' yugu' bönni' usëda queë' Jesús lë ni, gula'dil-lë' légaquië'. ¹⁶ Ní'irö Jesús bulidzë' yugu' bönni' dá'gaquië' Lë', rnnë':

—Guli'güf'i-bi' lataj ila'dxinbi' bí'ido' ni ga zoa'. Biti' uzága'li' xinǒzagacabi', tu' gata' quégaca nupa nácgaca ca bi'i caní lataj ga rinná bē'ē Dios. ¹⁷ Le nácatē rea' libí'ili': Nu cabí si' lu nē'e le rinná bē'ē Dios, ca runbi' tubi' bí'ido', bití' ca' tsaza ga ni' rinná bē'ē Lē'.

Tu bönni' rilé'enē' yöl-la' tsahui'
(Mt. 19:16-30; Mr. 10:17-31)

¹⁸ Tu bönni' unná bē' gunábinē' Jesús, rnnē':

—Bönni' Usedi idú dxi'a. ¿Bizxi ral-la' guna' para idéli'da' yöl-la' na'bán idú?

¹⁹ Jesús rē' lē':

—¿Bizx que rē'u neda': "Idú dxi'a"? Cuntu nu bönni' náquiē' idú dxi'a. Tuzē' Dios náquiē' idú dxi'a. ²⁰ Nǒz quézinu' yugu' le gunná bē'ē Dios: Biti' gunu' dul-la' le riguitsaj xibá que yöl-la' nut-saga na'.

Biti' gútigacu' bönachi.

Biti' cuanu'.

Biti' innío' que luzó'o le cabí nácatē.

Ben bal xuz xinó'o.

²¹ Bönni' na' rē' Jesús, rnnē':

—Yúgu'tē lē ni runa' ga gudela' naca' bí'ido'.

²² Cate' biyönnē' Jesús didza' ni, rē' lē':

—Ia'tú le riyadzaj quiu' gunu'. Bēti' yúgu'tē le dē quiu', ate' lē na' si'u bunǒdzaj quégaca bönachi yechi', ate' gata' quiu' yöl-la' tsahui' yehua' yubá. Ní'irö gudá, gudá' neda'.

²³ Cate' bönni' na' biyönnē' didza' ni, ruhu'innē', tu' dēda' yöl-la' tsahui' queē'. ²⁴ Cate' bilé'enē' Jesús ca na' ruhu'innē' bönni' na', rnnē':

—¡Bica' böniga gaca, ila'yaza nupa ta'lé'e yöl-la' tsahui' ga rinná bē'ē Dios! ²⁵ Gácarö tódiba'

böa' nagui yötsi', ca tsázië' tu bönni' rilé'enë' yöl-la' tsahui' ga rinná b'ë Dios.

²⁶ Ní'irö nupa bila'yöni didza' ni gula'nná:

—¿Nuzxi caz gaca ulá, channö?

²⁷ Jesús gudxë' légaquië':

—Le biti' gaca ilunë' bönni', huáca gunë' Dios.

²⁸ Ní'irö Pedro rë' Jesús:

—Buyútsöca', netu' nucá'anatu' yúgu'të le dë queëtu', en dá'atu' Li'.

²⁹ Ní'irö Jesús rë' légaquië':

—Le nácatë rea' libí'ili', nu bönni' ucá'anë' lidxë', o xuz xinë'ë, o yugu' böchi' zanë', o nigula queë', o yugu' zxí'inë', tu' ruí'i ládxë'ë inná b'ë Dios, ³⁰ bönni' ni huazí'irë' dza ni zóaru' na'a, ate' dza si' za' idéli'në' yöl-la' na'bán idú.

Jesús rigúxjö'ë leyúbölö ca si' ilútië' Lë'

(Mt. 20:17-19; Mr. 10:32-34)

³¹ Jesús guchë'ë quez queë' idxínnutë' bönni' usëda queë', en rë' légaquië':

—Buli'yútsöca', ribenru' zéajru' Jerusalén, ga ni ilaca yúgu'të le nazúajgaca lu guichi ca gula'nnë' bönni' gulu'ë didza' uláz queë' Dios ca ral-la' gaca quia' neda', Bönni' Guljë' Bönachi. ³² Yugu' bönni' Jerusalén ulu'dödë' neda' lu ná'agaquië' bönni' zí'tu', ate' ulu'titjë' neda', en ulu'lidza zí'ë neda', en ulu'chejë' neda' zxöna'. ³³ Ila'guinë' neda', ate' tódirö ni' ilútië' neda', pero cate' gaca tsonna dza ubana'.

³⁴ Biti' gula'yéajni'inë' bönni' usëda queë' didza' ni, en biti' guléquibe'enë' ca sa'yéaj le ruí'ilenë' légaquië' didza' que, tu' naca le cabí sequi' ila'yéajni'inë'.

Jesús ruúnë' tu bönni' yödzö Jericó nachul-la lahuë'

(Mt. 20:29-34; Mr. 10:46-52)

³⁵ Cate' chizóa idxinë' Jesús yödzö Jericó, zoë' tu bönni' ni' nachul-la lahuë'. Rö'ë ra' nöza rin-abë' nu bi gúnnašö queë'. ³⁶ Bönni' ni' biyönnë' ta'dödi bönachi zían ni', ate' gunabë' bizxi na' raca. ³⁷ Bönachi ni' të lë':

—Jesús, bönni' Nazaret, ridödë' ni.

³⁸ Ní'irö bönni' na' nachul-la lahuë' bë'ë zidzaj didza', rnnë':

—¡Jesús, zxf'ini xi'sóë' David, buéchi' ladxi' neda'!

³⁹ Yugu' bönni' nanöruagaquië' lahuë' Jesús gula'dil-lë' bönni' na' nachul-la lahuë' para usayaj ru'ë, pero lë' zídzejrö bë'ë didza', rnnë':

—¡Zxf'ini xi'sóë' David, buéchi' ladxi' neda'!

⁴⁰ Ní'irö guzé' dxiz Jesús ribözë', ate' gunná bé'enë' nu tsöjlidza lë' para idxinë' lahuë'. Cate' bönni' na' nachul-la lahuë' bidxinë' lahuë' Jesús, gunábinë' Jesús lë', rnnë':

⁴¹ —¿Bizxi rë'ënu' guna' quiu'?

Bönni' na' nachul-la lahuë' rnnë':

—Rë'ënida' huöálaj guiöj lahua'.

⁴² Jesús rë' lë':

—Chiböálaj guiöj lo'. Chiböácu' tu' réajlë'u neda'.

⁴³ La' ní'isö bulé'etenë', ate' sa'yéajlenë' Jesús, rigu'ë Dios yöl-la' ba. Lësca' yúgu'të bönachi nacuá' ni', en bila'lé'e lë na' guca gula'gú'u Dios yöl-la' ba.

19

Jesús, en Zaqueo

¹ Ní'irö guyázië' Jesús yödzö Jericó, en ridödë' lu yödzö na'. ² Zoë' tu bönni' lë' Zaqueo ni', bönni' lo ladjagaquië' bönni' uquízxaj, ate' dë yöl-la' tsahui' queë'. ³ Ruí'i láchë'ë bönni' ni ilé'enë' Jesús, pero bití' guca queë' tu' nacua' bönachi zían ni', en náquië' bönni' ga rë'ëdo'. ⁴ Ní'irö carelö yöjnörüë' lógaca bönachi zían na', ate' yöjchenë' tu lu yaga para gaca ilé'enë' Jesús, tu' ral-la' tödë' ni'. ⁵ Cate' bidxinë' Jesús ni', guchisa lahuë' ruyúë' ga na' dxíë' Zaqueo na', en rë' lë':

—Zaqueo, bötjatë lu yaga na', tu' run bayudxi tsöjgá'ana' lidxu' na'a.

⁶ Ní'irö la' bötjatë' Zaqueo lu yaga, ate' lu yöl-la' rudzeja queë' guchë'ë Jesús lidxë'. ⁷ Cate' bila'lé'e bönachi nacua' ni' lë' ni, gula'sí lógaquië' yúgu'të' ta'nnë' queë', ta'nnë':

—Guyázië' Jesús ugá'analenë' bönni' dul-la'.

⁸ Ní'irö guzuínë' Zaqueo, en rë' Xanru':

—Xan, buyútsöca'. Gatsaj le dë quia' gu'a quégaca bönachi yechi', en channö bi gudödi bë' buquizxja' bönachi, ubi'a quégaca bönachi na' tapa cö'tëlö ca'.

⁹ Jesús rë' lë':

—Na'a dza ni bidxín yöl-la' rusölá quégaca nupa nacua' yu'u ni, tu' nababë' bönni' ni dí'a dza queë' Abraham. ¹⁰ Bida' neda', Bönni' Guljë' Bönachi, ududilja', en udusölá' nupa nanítigaca.

Rucúdu'ë didza' Jesús que chi cö' dumí

¹¹ Tsanni ni' ta'yönnë' didza' ni ru'ë Jesús, rë' légaquië' le rucúdu'ë didza', tu' chizóa ila'dxinë' yödzö Jerusalén, ate' téquinë' chizóatë ilá' lahui le rinná bë'ë Dios. ¹² Caní rnnë' Jesús:

—Zoë' tu bönni' lo, sa'yéajë' tu yödzö zi'tu' para si' lu nëë yöl-la' unná bë', ate' ní'irö huödë'. ¹³ Cate' chizóa tsejë' ni' bulidzë' chië' bönni' huen dxin queë', en bë'ë que queëgaquië' tu cö' huéaj dumí, ate' rë' légaquië': "Guli'guílajlen dumí ni tsanni huöda'." ¹⁴ Yugu' bönni' uládz queë' biti' ta'lé'enë' lë' dxi'a, ate' gula'söl-lë'ë yugu' gubáz quégaquië' ga ni' tsejë', ila'nnë': "Biti' ré'ënitú' inná bé'enë' bönni' ni netu'." ¹⁵ Ní'irö guzxí' lu nëë yöl-la' unná bë', ate' budxinë' ladzë'. Cate' bidxinë' ni' gunná bé'enë' nu tsöjlidza yugu' bönni' huen dxin na' budödë' lu ná'agaquië' dumí na', para inözinë' gáca'xi bulu'guílajlenë' le tu tuë'. ¹⁶ Cate' bönni' zí'alö na' bidxinë' lahuë', rnnë': "Xan, tu cö' dumí quiu' na' chibén icja ia'chí cö' ca'." ¹⁷ Xanë' na' rë' lë': "Tsahui' benu'. Nacu' huen dxin tsahui'. Tu' dxí'ado' bugunu' dxin láti'do'os na' guta' lu no'o, na'a, guna' ga inná bé'enu' chi yödzö." ¹⁸ Ní'irö bidxinë' ia'tué' bönni' huen dxin na' lahuë' lë', rnnë': "Xan, tu cö' dumí quiu' na' chibén icja ia'gayu' cö' ca'." ¹⁹ Xanë' na' rë' ca' lë': "Inná bé'enu' gayu' yödzö." ²⁰ Ní'irö bidxinë' ia'tué' lahuë' lë', rnnë': "Xan, ni dë tu cö' dumí quiu' na'. Ben chi'a le, butúlida' le lari'. ²¹ Caní bena' tu' rádxida' lí, tu' nacu' bönni' bizxaj. Runu' ca na' ta'nná bönachi: Ruzi'u le cabí buzú', en rulapu' ga biti' guzu'." ²² Ní'irö xanë' na' rë' lë': "Nacu' huen dxin biti' naca tsahui'. Ni'a que didza' bë'u uchi'a usöröa' lí. ¿Réquibe'enu' naca' bönni' bizxaj: Ruzi'a le cabí buzóa', en rulapa' ga biti' guza'?" ²³ Na'a, ¿bizx que biti' yöjlú'u dumí quia' na' ga gun icja, para cate' huöda', uzi'a le idú len icja na'?" ²⁴ Ní'irö rë' nupa nacuá' ni': "Guli'cúa lu nëë

dumí na', ate' guli'gü'i queë' bönni' na' dë queë' chi cö' dumí." ²⁵ Légaquië' tē' lē': "Xan, chidē queë' chi cö' dumí." ²⁶ Ní'irō bubí'ē didza' xángaquië', rnnē': "Rea' libí'ili': Nu rugún dxi'a dxin le do' dē lu nē'e, ulu'zxōni lādxi'gaca lē' ia'late', pero nu bití' rugún dxi'a dxin le do' dē lu nē'e, ulu'béaj lu nē'e lē' na' guta' lu nē'e. ²⁷ Ca naca quégaquië' bönni' ni' bití' ta'lé'enē' neda' dxi'a, en bití' gul'é'ennē' inná bé'eda' légaquië', guli'tsōjxí' légaquië' para ídigaquië' ni, ate' guli'guti légaquië'."

*Len yöl-la' ba zxōn razië' Jesús yōdzō Jerusalén
(Mt. 21:1-11; Mr. 11:1-11; Jn. 12:12-19)*

²⁸ Cate' budxi gunnē' caní Jesús, buguel'ē xinzōzē', sa'yéajē' zaca' yōdzō Jerusalén. ²⁹ Cate' bila'dxinē' gala' ga nacuá' yōdzō Betfagé, en yōdzō Betania, ga naca ra' gu'ado' nazí'i le Gu'a Yaga Olivo, gusōl-lē'ē Jesús chopē' bönni' usēda queë', ³⁰ ate' rē' légaquië':

—Guli'tséaj yōdzōdo' ni' ca dōdilō ga zóaru', en cate' idxinlí' ni', tsōjxáca'li'-ba' tuba' búrrodo' nága'ba' ni', búrrodo' na' cuntu nu ribíani lēba'. Guli'sedxi-ba', en guli'duchē'-ba' quia' ni. ³¹ Channō zoa nu rinábini libí'ili', inná: "¿Bizx que risédxili'-ba'?", ubí'ili' didza' caní innali': "Xanru' riquinnē'-ba'."

³² Sōjáquië' bönni' usēda queë' na' nasōl-lē'ē, ate' yōjxáca'gaquië'-ba' ca na' chigudxē' Jesús légaquië'.

³³ Cate' gula'sedxē'-ba' búrrodo' na', yugu' bönni' xanba' tē' légaquië':

—¿Bizx que risédxili'-ba' búrrodo' na'?

³⁴ Bulu'bi'ē didza', ta'nnē':

—Xanru' riquinnē'-ba'.

³⁵ Gula'chě'ě-ba' ga na' zoë' Jesús. Cate' chigula'xóë' yugu' lari' tsölä'a quégaquië' cúdzu'ba' búrrodo' na', bulu'dxië' Jesús cúdzu'ba' lahui lari' na'. ³⁶ Gapa ral-la' tödë' Jesús, gula'chiljë' lari' quégaquië' la' nöza. ³⁷ Cate' chibila'dxinë' gala' ga zoa lidinni que Gu'a Yaga Olivo, lu yöl-la' rudzeja quégaquië' gula'sí lógaquië' yúgu'të bönni' dá'gaquië' Jesús, tu'ë zidzaj didza', ta'gu'ë Dios yöl-la' ba, ni'a quégaca yugu' yöl-la' huáca zxön bila'lé'enë' benë' Jesús. ³⁸ Ta'nnë':

—¡Yöl-la' ba bönni' unná bë' ni zë'ë uláz queë' Xanru' Dios! ¡Yehua' yubá za' le ribequi dxi ládxi'ru'! ¡Yöl-la' ba Dios!

³⁹ Ní'irö yugu' bönni' yudo' fariseo nútsa'gaquië' ladaj bönachi zián ni' tē' Jesús, ta'nnë':

—¡Bönni' Usedi, gudil-la yugu' bönni' usëda quiu'!

⁴⁰ Bubi'ë didza' Jesús, rë' légaquië':

—Rea' libí'ili': Channö ila'cuá' dxië' bönni' ni, yugu' guiöj hualuí'i caz zidzaj didza'.

⁴¹ Cate' bidxinë' Jesús gala' ra' yödzö na', en rilé'enë' le, ní'irö ribödxë' que, ⁴² rnnë':

—Raca ládxa'a huanözili' na'a dza le gaca gun ga cuéqui dxi ládxi'li' lahuë' Dios, pero na'a china-gachi' queëli', para cabí ilé'eli' le. ⁴³ Huala'dxín queëli' dza cate' nupa biti' ta'lé'e libí'ili' dxi'a ila'bequi zö'ö idú gásibi'ilö ga zóali', en ila'gú'u libí'ili'lé'alö, ate' yúgu'të latajidú gásibi'ilö ilúnlenë' libí'ili' gudil-la. ⁴⁴ Ulu'quínajë' zö'ö run chi'i yödzö queëli', en ilútië' nupa nacué' lu yödzö ni. Biti' ugá'ana guiöj lahui luzé'e. Yúgu'të lë ni gaca queëli' tu' cabí gúquibe'eli' dza bidë' Dios buduyúë' libí'ili'.

*Rulatjè' Jesús lö'a yudo'**(Mt. 21:12-17; Mr. 11:15-19; Jn. 2:13-22)*

⁴⁵ Ní'irö guyázië' Jesús lö'a yudo', en gusí lahuë' rubéajë' ní'ilo yúgu'të nupa tuti', en nupa to'o ga naca lö'a yudo'. ⁴⁶ Rë' légaquië':

—Nazúaj lu guichi lá'ayi, rnna: “Lidxa' naca yu'u ga ulu'lidza bönachi Dios”, pero libí'ili' chin-unli' le ca tu lídxigaca bönni' gubán.

⁴⁷ Yugu' dza rusédinë' Jesús bönachi ga naca chila yudo', ate' gula'zóa gula'bö'ë bixúz unná bë', len bönni' yudo' tu'sédinë', en yugu' bönni' lo que lu yödzö ilútië' Lë'. ⁴⁸ Biti' bulu'dzölinë' nacxi ilútië' Lë', tu' idú ládxi'gaca tu'zé nágagaca yúgu'të bönachi xtídzë'ë.

20*Yöl-la' unná bë' dë lu në'ë Jesús**(Mt. 21:23-27; Mr. 11:27-33)*

¹ Tu dza, cate' ni' rusédinë' Jesús bönachi ga naca chila yudo', en riguíxjö'ë didza' dxi'a, bila'dxinë' yugu' bixúz unná bë', en bönni' yudo' tu'sédinë', len bönni' gula tu'zéajni'inë', ga na' zoë', ² ate' të' Jesús:

—Gudixjöi'i netu'. ¿Bizxi yöl-la' unná bë' dë lu no'o runu' caní? ¿Nuzxi caz budödi lu no'o yöl-la' unná bë' ni?

³ Bubi'ë didza' Jesús, rë' légaquië':

—Inábida' ca' libí'ili' tu didza', ate' ubí'ili' innali'.

⁴ ¿Nuzxi gusöl-la' Juan ruquilë' bönachi nisa? ¿Naru' Dios, o bönachi?

⁵ Gulún xtídzá'gaquië' la' légacasë' bönni' yudo' na', ta'nnë':

—Channö innaru': Gusöl-lë'ë Dios lë', guié' rë'u: "¿Bizx que biti' guyéajlë'ëli'-në'?" ⁶ Channö guiëru'-në': Gula'söl-lë'ë yugu' bönni' lë', bönachi lu yödzö ni ulu'laxi' rë'u guiöj, tu' nöziguequi bë'ë didza' Juan na' uláz queë' Dios.

⁷ Ní'irö bulu'bi'ë didza', ta'nnë':

—Biti' nöztu' nuzxi na' gusöl-la' Juan.

⁸ Ní'irö Jesús rë' légaquië':

—Neda' ca' biti' guía' libí'ili' bi yöl-la' unná bë' rúnida' caní.

*Yugu' bönni' huen dxin biti' nácagaquië' tsahui'
(Mt. 21:33-44; Mr. 12:1-11)*

⁹ Ní'irö la' gusí lotë' Jesús ru'ilenë' bönachi nacua' ni' didza'. Rucúdzü'ë didza', rnnë':

—Zoë' tu bönni' budë'ë yugu' lubá uva lu xiyúë', ate' budödë' luyú na' lu ná'agaquië' bönni' huen dxin para ilún gatsjë' len lë' le ulu'zi'ë, ate' guyijë' zi'tu' ga ni' bugá'anë' xidzé. ¹⁰ Cate' bidxín dza ulu'chibë' uva luyú na', gusöl-lë'ë tuë' bönni' gubáz queë' ga na' nacü'ë huen dxin na' para si'ë uláz queë' que le ulu'zi'ë, pero huen dxin na' gulúndë'ë lë' zi', en bulu'söl-lë'ë lë' cá'asö. ¹¹ Leyúbölö gusöl-lë'ë ia'túë' gubáz queë', ate' légaquië' gulúndë'ë lë' ca' zi', en gulu'ë dö' queë', ate' bulu'söl-lë'ë lë' cá'asö. ¹² Leyúbölö gusöl-lë'ë quégaquië' bönni' bunny gubáz queë', ate' bulu'dxië' ca' lë' huë', en bulu'béajë' lë' ní'lö luyú na'.

¹³ 'Ní'irö guzá' ladxë'ë xani luyú na', gunnë': "¿Nacxi guntsa? Isöl-la'a xzí'ini caza' nadxí'ida'-bi' quégaquië'. Cate' ila'lé'enë'-bi', nadxi ca' ilunë'-bi' bal." ¹⁴ Ní'irö, cate' yugu' bönni' huen dxin na' bila'lé'enë'-bi', gulún xtídza'gaquië' la' légacasë',

ta'nné: “Bi'i ni guequi queébi' luyú ni. Guli'dá, gútiru'-bi', para guequi queéru' le ral-la' guequi queébi'.” ¹⁵ Bulu'béajé'-bi' ní'ilö luyú na', en gulútië'-bi'.

'Na'a, ¿nacxi caz gunë' xani luyú na' quégaquië'? ¹⁶ Guidé', en gútië' yugu' huen dxin na', ate' udödë' luyú queë' lu ná'agaca bönachi yúbölö.

Cate' bönachi nacua' ni' bila'yöni lë ni, gula'nné':
—¿Inná Dios biti' gaca caní!

¹⁷ Ní'irö buyüë' Jesús légaquië', rnné':

—¿Bizxi sa'yéaj lë na' nazúaj lu guichi lá'ayi, rna:

Guiöj na' gula'rú'unë' bönni' huen zö'ö,
guiöj ni chinaca guiöjlen squin zö'ö?

¹⁸ Núti'tës nu ibixi lahui guiöj ni, quitsaj nu na', ate' nu bönni' tsöjbága' guiöj ni lë', uzxuzxaj lë'.

Ca naca dumí ta'guizxaj lázagaca bönachi
(Mt. 21:45-46; 22:15-22; Mr. 12:12-17)

¹⁹ La' dza ní'isö, yugu' bixúz unná bë' len bönni' yudo' tu'sédinë' gula'zóa gula'bö'ë ila'zönë' Jesús, tu' téquibe'enë' gunné' quégaquië' lë na' bucúdzü'ë didza', pero guládxinë' bi ilún bönachi zían nacua' ni'. ²⁰ Ní'irö bulu'yúyenië' Jesús, en gula'söl-lë'ë yugu' bönni' para ulu'béajé' Lë' didza', bönni' ulu'luí'i cuíngaquië' ca bönni' tsahui', para ilunë' ga bi innë' Jesús, para gaca ulu'dödë' Lë' lu në'ë bönni' rinná bé'enë' uláz queë' César. ²¹ Para ilunë' caní, gula'nábinë' Jesús, ta'nné':

—Bönni' Usedi, nöztu' rno' le nácatë, en rusédinu' le nácatë, en biti' ruchi'a rusöröu' ca naca le tu'luí'isö lahui bönachi, pero idütë li naca ca rusédinu' xibá queë' Dios. ²² Gudíxjöi'i netu'.

¿Naru' run bayudxi quixxaj laztu' queë' César, bönni' Roma rinná bē'ē, o cabí?

²³ Réquibe'enē' Jesús le té'ennē' ilunē' queë', ate' rē' légaquiē':

—¿Bizx que rizi' bē'ēli' neda'? ²⁴ Buli'luí'itsöqui' neda' tu dumí ridá. ¿Nuzxi lahui da' lē'e ni, en nuzxi le nazúaj ni?

Bulu'bi'ē didza', ta'nnē':

—Queë' César na'.

²⁵ Ní'irö Jesús rē' légaquiē':

—Buli'nödzej queë' César le nequi queë' César, ate' queë' Dios le nequi queë' Dios.

²⁶ Biti' guca ilunē' ga bi innē' Jesús para gaca ulu'zéguiē' Lē' didza' lógaca bönachi zián na', pero bulu'báninē' ca naca didza' bubí'ē, ate' bulu'sayaj ruá'agaquiē'.

Ca gaca quégaca nupa ulu'bán lu yöl-la' guti

(Mt. 22:23-33; Mr. 12:18-27)

²⁷ Ní'irö yugu' bönni' yudo' saduceo, nupa na' ta'nná biti' ulu'bán nupa chinátigaca, bila'dxinē' ni', ate' gula'nábinē' Jesús, ta'nnē':

²⁸ —Bönni' Usedi, Moisés buzúajē' queëru' lu guichi, le rnna: “Channö gátiē' nu bönni', ate' ugá'ananu nigula queë', en channö cuntu nu zoa bi'i queë', ní'irö bi'i böchi'bi' ral-la' sí'ibi'-nu nigula queë' na', para uzóabi' bi'i queëbi' böchi'bi' na' gútibi'.” ²⁹ Gula'cuá'abi' gadxi bi'i bönni' nácagacabi' böchi'bi', ate' bi'i zí'aló na' but-saga ná'alenbi' bi'i nigula, en gútibi', biti' zóabi' bi'i queëbi'. ³⁰ Ní'irö bi'i buropi na' but-saga ná'alenbi'-nu nigula na', ate' gútibi' ca' bi'i ni, biti' zóabi' bi'i queëbi'. ³¹ But-saga ná'alenbi'-nu bi'i

bunni na', ate' la' tuz ca gulunbi' igádxitëbi', ate' gulátibi', bití' zóabi' bi'i quégacabi'. ³² Ga búdxitë, gútinu ca' nigula na'. ³³ Na'a, cate' ulu'bán nupa chinátigaca, ¿núzxilöbi' guéquinu nigula na' queëbi', tu' bulu'tsaga ná'alenbi'-nu igádxitëbi'?

³⁴ Ní'irö bubi'ë didza' Jesús, rë' légaquië':

—Tu'tsága ná'agaca bönachi dza ni zóaru' na'a, en tu'nödzejë'-bi' xzí'inigaquië' para ulu'tsaga ná'agacabi'. ³⁵ Na'a, nupa ná'agaca lesaca' ulu'bán lu yöl-la' guti, en tsöjcuá' yödzölió si' gata', bití' ilún yöl-la' rizóalen nigula, en bití' ulu'tsaga ná'agaca. ³⁶ Caní gaca, tu' cabirö ilati nupa na' ulu'bán lu yöl-la' guti, pero ilácagaca ca ná'agacaquië' gubáz lá'ayi queë' Dios, en ilácagaca xzí'ini cazë' Dios. ³⁷ Ca na' ral-la' ulu'bán nupa chinátigaca, rulu'inë' rë'u Moisés caz ga na' nazúaj lu guichi ca naca que yaga yötsi' régui, ga ni' ru'ë didza' Xanru', rnnë' náquië' Dios queë' Abraham, en Dios queë' Isaac, en Dios queë' Jacob. ³⁸ Dios náquië' Dios, calëga quégaca nupa nátigaca tsaz, pero quégaca nupa nabángaca, tu' nabángaca lahuë' Lë' yúgu'të bönachi, sal-la' gulati luyú ni.

³⁹ Ní'irö bulu'bi'ë didza' bal-lë' bönni' yudo' usedi, ta'nnë':

—Bönni' Usedi, dxí'ado' gunnó'.

⁴⁰ Bítí'rö bulu'rúguinë' ila'nábinë' Lë' didza'.

¿Nuzxi xzí'ini náquië' Cristo?

(Mt. 22:41-46; Mr. 12:35-37)

⁴¹ Ní'irö Jesús rë' légaquië':

—¿Nacxi caz na' ta'nnë': “Cristo náquië' xzí'inë' David”? ⁴² David caz bë'ë didza' le nazúaj lu guichi lá'ayi ga nazúajgaca salmo, le rnna:

Xanru' Dios gudxë' Xana':

“Gurö'i cuita lë'a ibëla

⁴³ cate' gunra' ga ulu'zechu zxíbigaca lo' nupa
ta'dá'baga' Li'.”

⁴⁴ David caz na' gunné' queë' náquië' Xané'.
¿Nacxi caz naca, rnnali' libí'ili' náquië' zxí'inë'?

Jesús ruzégui'ë diza' bönni' yudo' tu'sédinë'

(Mt. 23:1-36; Mr. 12:38-40; Lc. 11:37-54)

⁴⁵ Tsanni ni' yúgu'të bönachi nacua' ni' tu'zë
nágagaca Jesús, rë' yugu' bönni' usëda queë':

⁴⁶ —Guli'gún chi'i cuinli' quégaquië' bönni'
yudo' tu'sédinë', tu' ta'yaza ládxi'gaquië' ta'dë'
nácugaquië' lari' tunna, en té'ënnë' ulu'lidza
bönachi légaquië' zxön gapa naca lu yé'ëyi, en
ta'yaza ládxi'gaquië' ca' ta'bö'ë lataj lo gapa
tu'dubë' tu'sedë' queë' Dios, en gapa ta'bö'ë tahuë'.

⁴⁷ Ta'gúë' lídxigacanu nigula uzëbido', ate' para
ulu'lu'i tsahui' cuíngaquië', xidzé tu'lidzë' Dios.
Yugu' bönni' ni, yënni'tërö gunë' Dios ga ila'gu'i
ila'záquië'.

21

Gun le gulú'unu tu nigula yechi' lahuë' Dios

(Mr. 12:41-44)

¹ Ga na' zoë' Jesús chila yudo', guchisa lahuë', en
rilé'enë' yugu' bönni' dë yöl-la' tsahui' quégaquië',
ta'gu'ë dumí lu gu'ina que dumí gun que yudo'.

² Bilé'enë' ca' tu nigula yechi' uzëbido', rigú'unu
chopa dumí lásido', le nazáca'gaca láti'do'os.

³ Rnnë' Jesús:

—Le nácatë rea' libí'ili', tu le zxöntërö gulú'unu
nigula yechi' uzëbido' ni ca ia'zíca'rö bönachi na'

ta'gu'ë dumí. ⁴ Yúgu'të', tsca le nadödi bë' dë quégaquië', gula'gu'ë dumí que yudo', pero nigula ni, lu yöl-la' yechi' queënu gulú'unu idútë le dë queënu, le ral-la' gáhuinu.

Rigúxjö'ë Jesús ca ulu'sunítie' yudo'

(Mt. 24:1-2; Mr. 13:1-2)

⁵ Nacuá' ni' nupa tuí'i didza' ca naca que yudo' na', ca na' nazí'i biquitaj que, yugu' guiöj nazácalë'egaca, en yugu' gundo' nácagaca lachi, ate' Jesús rë' légaquië', rnnë':

⁶—Yúgu'të' lë ni rilé'eli', huadxín dza cate' bíti'rö ugá'ana guiöj lahui luzë'e ni, tu' ulu'suniti bönachi yudo' ni.

Le ilaca bë' cate' si' idxín dza údxi

(Mt. 24:3-28; Mr. 13:2-23)

⁷ Ní'irö gula'nábinë' Jesús, ta'nnë':

—Bönni' Usedi, ¿bátaxi gaca lë ni? ¿Bizxi gaca bë' chizóa gaca caní?

⁸ Bubi'ë didza' Jesús, rnnë':

—Gulí'gún chi'i cuinli', para cabí nu si' ye'e libí'ili', tu' ila'lá'gaquië' bönni' zían, en ila'zí'i lágaquië' ca lea' neda', ila'nnë' nácagaquië' Cristo, en ila'nnë': “Chizá' gala' dza údxi.” Neda' rea' libí'ili': Biti' tséajlenli' légaquië'. ⁹ Cate' yönili' raca gudil-la, en ta'dá'baga' bönachi yúlahui', bití' gadxi idzóbili', tu' run bayudxi ilaca le caní, pero bití' zuitëni dza údxi.

¹⁰ Ní'irö rë' ca' légaquië':

—Til-la tu yödzö len ia'tú yödzö, ate' bönachi tu ga nu rinná bë' ila'díl-lalen bönachi ia'tú ga nu rinná bë'. ¹¹ Töldigaca budó' zxu', ate' zían lataj gaca

gubín, en ilatsaj yödzhü'ë' zxon. Ila'lá' lahui lúzxiba le ilún gadxi bönachi, en le ilaca bë'.

12 'Zí'atëlö cate' si' ilaca lë ni, ila'zön bönachi libí'ili', en ila'bía ládxi'gaca libí'ili'. Ila'chë'ë libí'ili' gapa tu'dübë' tu'sëdë' queë' Dios para ilútië' libí'ili', en ila'gu'ë libí'ili' lidxi guíë. Ila'chë'ë libí'ili' lógaquië' bönni' ta'nná bë'ë, en lógaquië' bönni' lo, tu' dá'ali' neda'. 13 Gaca caní queéli' para séqui'li' gunli' ba nalí quia' neda'. 14 Tsutsu guli'gún ládxi'li', para cabí cuéqui ícjali' zí'alö nacxi innali' uláz queéli', 15 tu' gunna' queéli' didza' ubí'ili', en yöl-la' réajni'i, para cabí gaca ulu'cul-lë' libí'ili', en para cabí gaca bi ila'nné' que xtídza'li' bönni' ni' bití' ila'lé'enë' libí'ili' dxi'a. 16 Ní'irö xuz quézili' ulu'dödë' libí'ili', en cá'anqueze yugu' bönni' böchi' quézili', en yugu' di'a dza que quézili', en yugu' böchi' luzë'e quézili', ate' ilútië' bál-lali'. 17 Yúgu'të bönachi ulu'zóa libí'ili' tsölá'alö tu' dá'ali' neda', 18 pero bití' inítí nitú guitsa' ícjali'. 19 Channö ugá'anali' tsutsu, idéli'li' yöl-la' na'bán idú.

20 'Cate' ilé'eli' bönni' rójáquië' gudil-la nagú'ugaquië' lë'a Jerusalén, inözili' chibidxín dza inítí yödzö ni. 21 Ní'irö nupa nacuá' luyú Judea ral-la' ila'zxunnaj ni, en tsöjaca gapa naca guí'ado', ate' nupa nacuá' lu yödzö ni ral-la' ila'rúaj ni, ate' nupa nacuá' la' guixi', bití' ral-la' ulu'dxín lu yödzö ni. 22 Yugu' dza ni' Dios gunë' xíguia' nupa nacuá' yödzö ni para gaca yúgu'të le nazúaj lu guichi lá'ayi ca ral-la' gaca quégaquië'. 23 Cate' idxín dza ni', bica' bayechi' yugu' nigula nuá'gacanu-bi' bí'ido' si' ilaljbi', en nigula tu'gádxí'nu-bi' bí'ido', tu' ila'guí'i ila'záca'da' bönachi nacuá' ni', ate' Dios

gúndë'ë bönachi ni' xíguia'. ²⁴ Ilátië' zianë' lu gudil-la na', ate' ila'chë'ë ia'bal-lë' nadzúngaquië' ga ila'dxinë' idútë yödzülió, ate' yödzö Jerusalén ni, ulu'léaj ulu'libë' le bönni' zi'tu', cate' izá'arö dza quégaquië'.

Le ilaca bë' si' huödë' Bönni' Guljë' Bönachi
(Mt. 24:29-35, 42-44; Mr. 13:24-37)

²⁵ Gunnë' ca' Jesús:

—Ni'irö ila'cuá' le ilaca bë' lu gubidza, en lu beo', en yugu' lu bölj lúzxiba, ate' luyú ni ulu'chixi bönachi, en iládxiguequi, tu' yön chi'i guziú' yu que nísado', en que le riyasa ridxía nisa na'. ²⁶ Ulu'dú ládxi'gaca lu yöl-la' radxi quéguequi tu' ila'zá' ládxi'gaca quégaca le ral-la' ilaca lu yödzülió, en ila'zxizi le nalá'gaca lúzxiba. ²⁷ Ní'irö ila'lé'enë' neda', Bönni' Guljë' Bönachi, guída' lu böaj lúzxiba, dë lu na'a yöl-la' unná bë', ate' ilá' lahui yöl-la' zxön quia'. ²⁸ Cate' isí lo ilaca lë ni, buli'tipa ládxi'li', en guli'chisa loli', tu' chizóa udxina' neda', para huóá'ua' libí'ili'.

²⁹ Jesús gudxë' ca' légaquië' tu le bucúdzü'ë didza', rnnë':

—Buli'yútsöca' ca raza que yaga higo, en que bíti'tës yaga yúbölö. ³⁰ Cate' rilé'eli' ta'lén ni'a në'e huë'enido', nöz quézili' chizá' gala' cusu ba. ³¹ Lësca' caní, cate' ilé'eli' chitaca yugu' lë ni, inözili' chizá' gala' dza idinná bë'ë Dios luyú ni.

³² 'Le nácatë rea' libí'ili', bití' ilátigaca bönachi ila'cuá' dza ni' cate' ilaca yúgu'të lë ni. ³³ Ila'dödi que lúzxiba, en que luyú ni, pero xtídza'a, bití' tödi cá'asö, tu' idxín caz ca rnna.

³⁴ 'Guli'gún chi'i cuinli' para cabí gü'ili' lataj tsaza icja ládxi'do'oli' le gun ditaj libí'ili', lë na' naca yöl-la' rágulë'e, en yöl-la' rizudxi, en yöl-la' ruúbi ruguí'i, para cate' idxín dza ni', cabí sóali' niti ladxi', ³⁵ en para cabí gaca queéli' ca tu le rizón bönachi, ca naca le gaca quegaca yúgu'të bönachi nacua' idútë yödzölió. ³⁶ Que lë ni na', guli'sóa ban ladxi', en buli'lídzatica'së' Dios, para gaca uláli' lu lë na' ral-la' ilaca, en para cabí utuí'ili' cate' idxinli' lahua' neda', Bönni' Guljë' Bönachi.

³⁷ Lahui' dza rizóë' Jesús chila yudo', rusédinë' bönachi, ate' chi'i dzö'ölö rirúajë' ni', en rejë' lu guí'ado' nazí'i le Guí'a Yaga Olivo. ³⁸ Yugu' zila bila'dxín yúgu'të bönachi ga zoë' Jesús chila yudo' para ulu'zë nágagaca xtídzë'ë.

22

Tun xtídzá'gaquië' ilútië' Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Cate' chizóa idxín laní cate' tahuë' yöta xtila cabí nazí'i cúa zi que, nazí'i le Pascua laní na', ² bulu'dubë' yugu' bixúz unná bë' len bönni' yudo' tu'sédinë'. Ta'zóa ta'bö'ë ilútië' Jesús, pero biti' gula'zéqui'në' tu' tádxinë' bi ilún bönachi.

³ Ní'irö Satanás tu' xihui' yöjtsaga Judas. Judas lë' ca' Iscariote, en nababë' idxínmutë' gubáz nasöl-lë'ë Cristo. ⁴ Guyijë' Judas na', yöjë'lenë' didza' yugu' bixúz unná bë', en bönni' dë lu ná'agaquië' que yudo', nacxi gunë' para udödë' Jesús lu ná'agaquië'. ⁵ Bulu'dzéjanë' bönni' yudo' na', en gula'zí' lu ná'agaquië' ulu'nödzjë' queë'

dumí. ⁶ Raza ládxë'ë Judas lë ni, ate' rizóa ribö'ë udödë' Jesús lu ná'agaquië' bagáchi'sö.

Le ráguru' le rusá' ládxi'ru' ca gútië' Xanru'

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷ Bidxín dza na' tahuë' yöta xtila cabí nazí'i cúa zi que, cate' ral-la' ilútië'-ba' bö'cu' zxila' le tahuë' dzö' Laní Pascua. ⁸ Jesús gusöl-lë'ë Pedro, en Juan, rnnë':

—Guli'tséaj, guli'tsöjpa'a queëru' le gáguru' dzö' Laní Pascua.

⁹ Të' Lë':

—¿Gazxi rë'ënu' tsöjpa'atu' queëru'?

¹⁰ Jesús rë' légaquië', rnnë':

—Bulí'yútsöca', cate' tsú'uli' lu yödzo ni, irúajë' tu bönni' dutságuië' libí'ili', söjnu'ë tu rö'ö nisa. Guli'tséajlenë' ga idxíntëli' yu'u ga tsázië'.

¹¹ Guli'guíë' xan yu'u na': "Bönni' Usedi rë' li': ¿Gazxi zoa yu'u laní ga gágulena' yugu' bönni' usëda quia' dzö' Laní Pascua?" ¹² Ní'irö uluí'inë' libí'ili' tu yu'u zxön xitsá' ga ni' chinabá'a. Bulí'pa'a ni' le gáguru'.

¹³ Ní'irö yöjáquië', en yöjxáca'gaquië' ca na' chigudxë' Jesús légaquië', ate' bulu'pë'ë ni' le ilahuë' dzö' Laní Pascua.

¹⁴ Cate' bidxín dzö' na', gurö'ë Jesús ga ilahuë', ate' bönni' gubáz queë' na' gula'bó'lenë' Lë' tsözxön. ¹⁵ Ní'irö Jesús rë' légaquië':

—Gúcada' ládxa'a gágulena' libí'ili' tsözxön xtsö' ni zí'atëlö cate' si' qui'i saca'a, en gátia'. ¹⁶ Rea' libí'ili': Bítirö gahua' lë ni cate' idxinrö dza gaca le rulu'isö xtsö' ni ga ni' rinná bë'ë Dios.

17 Gudélëë Jesús tu zxíga'do', en gudxë' Dios: "Xclenu'." Ní'irö rë' légaquië':

—Guli'sí' lë ni, en guli'gui'aj lati' huéaj, 18 tu' rea' libí'ili': Bítí'rö guí'ja' xisi uva cate' idxinrö le rinná bë'ë Dios.

19 Ní'irö gudélëë yöta xtila, en gudxë' Dios: "Xclenu'." Gudödi ní' buzzuxjé' le, en bë'ë que queégaquië', rnnë':

—Lë ni naca idütë le naca' le rudöda' uláz queéli'. Guli'gún caní para usá ládxi'li' neda'.

20 Cate' budxi gulahuë', lësca' caní bë'ë didza' que zxíga'do' na', rnnë':

—Zxíga'do' ni ruluí'i ca naca didza' cubi rucá'ana tsahui', ate' rön quia' run tsutsu le, rön na' ilalaj ní'a queéli'.

21 'Na'a, bönni' na' udödë' neda' lu ná'agaca bönachi rö'ë rágulenë' neda' tsözxön. 22 Le nácatë huayija' ga ilútië' neda', Bönni' Guljé' Bönachi, en gaca quia' ca na' nazúaj lu guichi lá'ayi ca ral-la' gaca quia', pero bica' bayechi' bönni' na' udödë' neda'.

23 Ní'irö gula'sí lógaquië' ta'nábinë' Lë' tu tuë', ta'nnë':

—¿Núzxilötu' nu gun caní?

Tuí'i xtídza'gaquië' núzxilögaquië' gáquië' lo

24 Ní'irö gulu'ë didza' la' légacasë' núzxilögaquië' idéli'në' lataj lo. 25 Jesús gudxë' légaquië':

—Yugu' bönni' unná bë' tu'gunë' dxin yöl-la' unná bë' quegaquië', ta'nná bé'enë' bönachi, ate' nupa ni dë lu ná'agaca yöl-la' unná bë', légaquië' bönni' tácalen. 26 Libí'ili' bití' ral-la' gunlí' caní, pero nu naca lo ládjali' ral-la' gaca ca nu naca

cuídi'tërö, ate' nu rinná bē' ral-la' gaca ca nu run dxin quéguequi luzě'e. ²⁷ ¿Núzxilö na' nácarö lo, nu na' rö'ö ragu, o nu rupá' la' huagu? ¿Naru' calēga nu na' rö'ö ragu nácarö lo? Neda' zóalena' libí'ili' ca nu rupá' la' huagu.

²⁸ 'Libí'ili' ni guzóalenli' neda' cate' ni' bi guca quia', yugu' le gula'zí' bē' neda'. ²⁹ Que lē ni na' udöda' lu ná'ali' tu ga inná bē'ēli', ca na' benē' Xuza', budödē' lu na'a ga inná bē'a neda'. ³⁰ Caní guna' para gaca cō'öli', en gu'aj gágulenli' neda' ga ni' inná bē'a, ate' cō'öli' xilataj cázali' ga uchi'a usöröli' idxinnu cō' xzí'ini xi'sóē' Israel.

*Rnnē' Jesús innē' Pedro bití' núnbē'ē Lē'
(Mt. 26:31-35; Mr. 14:27-31; Jn. 13:36-38)*

³¹ Gunnē' ca' caní Xanru':

—Simón, Simón. Buyútsöca'. Chigunaba Satanás tu' xihui' libí'ili', para urixi udödi libí'ili' ca nu rurixi rudödi xzoa' xtila, ³² pero chibulidza'-nē' Dios, en gunábida' Lē' gácalenē' li', para cabí údxi udú yöl-la' réajlē' quiu' neda'. Na'a, cate' huóácu' quia', butipa ládxi'gaquiē' böchi' luzó'o.

³³ Pedro rē' Lē':

—Xan, chizóa' sá'lēna' Li', calēgasö tseja' lidxi guié, pero lēasca' gátilena' Li'.

³⁴ Jesús rē' lē':

—Pedro, rea' li': Zí'alö cödxiba' böra na'a, chigudá'bagu'u tsonna luzuí, innó' cabí núnbē'u neda'.

Le benē' Jesús cate' chizóa ilútiē' Lē'

³⁵ Jesús gunábinē' légaquiē', rnnē':

—Cati' gusöl-la'a libí'ili' cabí nuá'ali' yöxaj yöta, en calëga buzudi dumí, en calëga chopa cö' xiráchuli', ¿naru' bi biyadzaj queëli'?

Légaquië' ta'nnë':

—Biti' bi.

³⁶ Ní'irö rë' légaquië':

—Na'a, nu dë yöxaj yöta que ral-la' guá' le, ate' lësca' caní ral-la' gun nu dë que buzudi dumí, ate' nu biti' dë que guíë tuchi' ral-la' guti' lari' rixóa yeni, en si' tu guíë tuchi'. ³⁷ Rea' libí'ili': Run bayudxi gaca quia' lë na' nazúaj lu guichi lá'ayi, rnna: “Gulunë' queë' ca tunë' quégaca nupa tua' dö”, ate' ilaca yúgu'të le nazúajgaca lu guichi ca ral-la' gaca quia'.

³⁸ Ní'irö légaquië' ta'nnë':

—Xan, ni dë chopa guíë tuchi'.

Lë' rë' légaquië':

—Chinaca.

Jesús ruldzë' Dios la' yëla Getsemaní

(Mt. 26:36-46; Mr. 14:32-42)

³⁹ Ní'irö birúajë' Jesús, en ca run cazë' sa'yéajë' lu Guí'a Yaga Olivo, ate' yugu' bönni' usëda queë' sōjácalenë' Lë'. ⁴⁰ Cate' bila'dxinë' ni', Jesús rë' légaquië', rnnë':

—Buli'ídzë' Dios, inábili'-në' cabí gata' lataj si' bë' tu' xihui' libí'ili'.

⁴¹ Ní'irö Jesús guzë'ë ga na' nacu'ë, en gudödë' ia'lati' tsca ga ridxín tu guíōj rirú'uniru', ate' ni' buzóa zxibë', en ruldzë' Dios. ⁴² Rnnë':

—Xúz, channö rë'ënu', bucuása ga zoa' lë na' ral-la' quí'i saca'a, pero calëga ca rë'ënda' neda', pero ca rë'ënu' Li' gunu'.

⁴³ Ní'irö buluí'i lahuë' gubáz lá'ayi queë' Dios, zë'ë yehua' yubá, ate' butipë' ládxe'ë Jesús. ⁴⁴ Lu yöl-la' risëbi ladxi' queë', idú ládxe'ë Jesús bulidzë' Dios, ate' nisa yösa queë' guca ca rön raba' luyú.

⁴⁵ Cate' budxi bulidzë' Dios, guyasë', en böajë' ga na' nacu'ë bönni' usëda queë', ate' duxáquië' légaquië' tásië' tu' tu'huí'inigaquië'. ⁴⁶ Ní'irö Jesús rë' légaquië':

—¿Rásitsali'? ¡Guli'chasa, en buli'lidzë' Dios! Inábili'-në' cabí gata' lataj si' bë' tu' xihui' libí'ili'.

Ta'zönë' Jesús

(Mt. 26:47-56; Mr. 14:43-50; Jn. 18:2-11)

⁴⁷ Tsanni ni' ru'ë didza' Jesús, la' bila'dxintë' bönni' zían ni', ate' Judas, bönni' na' nababë' idxínnuë' bönni' usëda queë' Jesús dzáguië' légaquië', ate' nanöruë' lógaquië' bönni' zían na'. Gubígui'ë ga zoë' Jesús para utsaga lahuë' Lë'. ⁴⁸ Ní'irö Jesús rë' lë':

—Judas, ¿naru' rudöditso' caní neda', Bönni' Guljë' Bönachi, rutsaga lo' neda'?

⁴⁹ Cate' yugu' bönni' na' nacua'lenë' Jesús bila'lé'enë' ca na' raca queë' Lë', të' Lë':

—Xan, ¿naru' güí'itu' légaquië' guíë' tuchi'?

⁵⁰ Tuë' bönni' usëda queë' Jesús benë' huë' guídi náguië' bönni' huen dxin queë' bixúz lo. Burixë' guídi náguië' ibëla. ⁵¹ Jesús rnnë':

—Chinaca na'a. Tsca' gaz.

Gudanë' Jesús guídi náguië' bönni' huen dxin na', en bunë' le. ⁵² Ní'irö rë' yugu' bixúz unná bë', en bönni' dë lu ná'agaquië' que yudo', en bönni' gula tu'zéajni'inë', bönni' na' bití' ta'lé'enë' Lë' dxi'a, rnnë':

—¿Narúajtsali' nuá'ali' guíë tuchi', en yaga para sönli' neda' ca runli' rizönli'-në' gubán? ⁵³ Yugu' dza guzóalen caza' libí'ili' chila yudo', ate' biti' bi benli' quia', pero na'a chibidxin dza queëli', le naca dza dë lu në'e nu na' zoa lataj chul-la.

Rnnë' Pedro: "Biti' núnbë'a-në' Jesús"

(Mt. 26:37-58, 69-75; Mr. 14:53-54, 66-72; Jn. 18:12-18, 25-37)

⁵⁴ Ní'irö gula'zönë' Jesús, en gula'chë'ë Lë' ga na' bulu'sudxinë' Lë' lidxë' bixúz lo. Pedro yöjnahüë' Jesús zi'tu' zí'tu'sö. ⁵⁵ Cate' ni'a në'ë bixúz lo chigula'béquië' guí' lö'a lidxë' bixúz lo na', gula'bö'ë idú gásibi'ilö ra' guí' na', ate' Pedro gurö'lenë' légaquië' tsözxön. ⁵⁶ Cate' tubi' bi'inigula huen dxin bilé'ebi'-në' Pedro, ni' rö'ösë' ra' guí', buyubi' lë', en rnnabi':

—Bönni' ni dë'ë ca' Jesús.

⁵⁷ Gudá'baguië' Pedro, rnnë':

—Nigúla, biti' ca' núnbë'a-në' bönni' na'.

⁵⁸ Ia'lati' gudzé ia'túë' bönni' bilé'enë' Pedro, ate' rnnë':

—Li' do'o ca' légaquië'.

Pedro gunné':

—Bönni', calëga neda'.

⁵⁹ Ia'láti'sö gudzé, gunné' ia'túë' bönni':

—Le nácatë bönni' ni dë'ë Jesús, tu' náquië' bönni' Galilea.

⁶⁰ Ní'irö Pedro gunné':

—Bönni', biti' nözda' bizxi na' ru'u didza' que.

Tsanni ni' ru'ë didza' ni, la' gurödxitëba' böra.

⁶¹ Ní'irö buécjë' Xanru', en ruyúë' Pedro, ate' yöjnenë' Pedro xtídzë'ë Xanru', ca na' gudxë' lë': "Zí'alö cödxiba' böra na'a, li' chigudá'bagu'u

tsonna luzuí, innó' bití' núnbë'u neda'." ⁶² Burúajë' Pedro ní'ilö, ate' rön caz gurödxë'.

Tu'titjë' Jesús

(Mt. 26:67-68; Mr. 14:65)

⁶³ Yugu' bönni' na' nazöngaqüë' Jesús bulu'titjë' Lë', ate' gula'guínë' Lë'. ⁶⁴ Ní'irö bulu'sayjë' lahuë' Jesús, ate' gula'gápë'ë lahuë', en gula'nábinë' Lë', ta'nnë':

—¡Gunnëya'atsöca'! ¿Nuzxi na' gudapa' Li'?

⁶⁵ Ziánrö ca' gula'nnë' queë' le gulu'ë dö' queë'.

Ridxinë' Jesús lógaquië' bönni' yudo' tu'chi'a tu'söröë'

(Mt. 26:59-66; Mr. 14:55-64; Jn. 18:19-24)

⁶⁶ Cate' chizá' rení' dza na', bulu'dubë' bönni' gula tu'zéajni'inë' bönachi judío len yugu' bixúz unná bë', en bönni' yudo' tu'sédinë', ate' gula'chë'ë Jesús lógaquië' bönni' yudo' tu'chi'a tu'söröë', ate' gula'nábinë' Lë', ⁶⁷ ta'nnë':

—Gudíxjöi'i netu'. ¿Naru' nactso' Li' Cristo?

Jesús rë' légaquië':

—Channö guía' libí'ili' naca' Cristo, bití' tséajlë'ëli' neda', ⁶⁸ en channö inábida' libí'ili' tu didza', bití' ubí'ili' didza', en bití' usanli' neda'. ⁶⁹ Na'a isí lo, neda', Bönni' Guljë' Bönachi, cö'a cuita lë'ë ibëla Dios, nápatë're' yöl-la' unná bë'.

⁷⁰ Gula'nábinë' Lë' yúgu'të', ta'nnë':

—¿Naru' nactso' Li' Zxí'inë' Dios?

Lë' gudxë' légaquië':

—Le nácasö rnnali'.

⁷¹ Ní'irö ta'nnë':

—¿Núzxirö naquíniru' nu gun ba nalí queë'? La' rë'usö chibiyöniru' didza' ru'ë.

23

Ridxinë' Jesús lahuë' Pilato, bönni' rinná bë'ë uláz queë' César

(Mt. 27:1-2, 11-14; Mr. 15:1-5; Jn. 18:28-38)

¹ Ní'irö gulazuínë' yúgu'të bönni' zián ni', ate' gula'chë'ë Jesús lahuë' Pilato, ² ga ni' gula'sí lógaquië' tu'zéguië' Lë' didza', ta'nnë':

—Bönni' ni, budzölitu' ca runë'. Runë' ga ta'dá'baga' bönachi uládz queëtu' yúlahui', en ruzáguë'ë xinözigaca nupa ta'guíxaj laz ruquíxjë' César, en rnnë' lë cazë' náquië' Cristo, bönni' ral-la' inná bë'ë.

³ Ní'irö Pilato gunábinë' Jesús, rnnë':

—¿Naru' nacu' Li' nu inná be'e bönachi judío?

Bubi'ë didza' Jesús, rnnë':

—Le nácasö rno'.

⁴ Ní'irö Pilato gudxë' yugu' bixúz unná bë', en bönachi nacuá' ni', rnnë':

—Biti' bi rudzövida' le naca xíguia' nunë' bönni' ni.

⁵ Ní'irö gulunrë' tsutsu xtídza'gaquië', ta'nnë':

—Runë' ga tu'tsatsa bönachi, en rusédinë' caní bönachi idú luyú Judea. Gusílahuë' benë' caní luyú Galilea ga ridxintë runë' ca' ni.

Ridxinë' Jesús lahuë' Herodes, bönni' rinná bë'ë luyú Galilea

⁶ Cate' biyönnë' Pilato didza' ni, tu'ë didza' que luyú Galilea, ní'irö gunábinë' légaquië' channö náquië' Jesús bönni' Galilea. ⁷ Cate' gunözinë' nababë' Jesús ga ni' rinná bë'ë Herodes, gusöl-lë'ë Lë' lahuë' Herodes na', tu' zoë' ca' Herodes Jerusalén yugu' dza na'. ⁸ Cate' Herodes na'

bilé'enë Jesús, budzéjanë, tu' chiguca xidzé rë'enë ilé'enë Lë' tu' chibiyönnë' le zian ca naca queë Jesús, en runë löza ilé'enë tu yöl-la' huáca gunë'.
 9 Ní'irö Herodes gunábinë Jesús le zian, pero Jesús bití' bi didza' bubí'ë. 10 Nacu'ë ca' ni' yugu' bixúz unná bë', len bönni' yudo' tu'sédinë', ate' bulu'zéguidë'ë Jesús didza'. 11 Ní'irö Herodes, en bönni' queë röjáquië' gudil-la bulu'cá'anë' Jesús cá'asö, en para ulu'titjé' Lë', bulu'gácuë' Lë' tu lari' nazaca' ca rácuë' tu bönni' unná bë', ate' leyúbölö bulu'sudxinë' Lë' lahuë' Pilato. 12 Dza na' bulu'dzáguië' dxi'a Pilato, en Herodes, tu' zí'alö gula'lé luzé'ë tuë' ia'túë'.

Ta'chúguië' queë' Jesús gátie'

(Mt. 27:15-26; Mr. 15:6-15; Jn. 18:39-19:16)

13 Ní'irö butubë' Pilato yugu' bixúz unná bë', en bönni' dë lu ná'agaquië', en bönachi lu yödzö, 14 ate' rë' légaquië':

—Dujúa'ali'-në' bönni' ni lahua' neda', rnnali' queë' runë' ga tu'tsatsa bönachi, pero cate' gunabi yúdxida'-në', ate' zóatëli' ca' ni, bití' bi budzöliida' le naca xíguia' nabáguë'ë, yugu' lë na' ruzéguii'-në' didza'. 15 Cate' gusöl-la'a libí'ili' lahuë' Herodes, bití' bi budzölinë' le benë' bönni' ni le naca xíguia' nabáguë'ë para nu ichugu queë' gátie'. 16 Na'a usaca' zi'a-në', ate' tödi na' usana'-në'.

17 Run bayudxi tu le gunë' Pilato, usanë' lu ná'agaca bönachi tuë' bönni' nadzunë' cate' raca laní na', ca na' run cazë'. 18 Ní'irö gulu'ë zidzaj didza' yúgu'të bönni' nacué' ni', ta'nné':

—Bëtië' bönni' ni, en busanë' queëtu' Barrabás.

19 Nadzunë' Barrabás na' lidxi guié tu' gudíl-lalenë' yúlahui' lu yödzo na', en tu' bëtië' bönachi.

20 Bulidzë' Pilato légaquië' leyúbölö, tu' ré'ënë' usanë' Jesús. 21 Leyúbölö gulu'ë zidzaj didza', ta'nnë':

—¡Budë'ë lë'e yaga cruz! ¡Budë'ë lë'e yaga cruz!

22 Ní'irö Pilato gudxë' légaquië' le bunni luzuí, rnnë':

—¿Bizxi caz le ruá' dö' benë' bönni' ni? Biti' bi budzólida' nunë' le run ga nabáguë'ë xíguia' gátie'. Usaca' zi'a-në', ate' ní'irö usana'-në'.

23 Zídzajrö gulu'ë didza', ta'nabë' të'ë Jesús lë'e yaga cruz. Tu' gula'bödxie' yenni' yugu' bönni' na', en yugu' bixúz unná bë', gula'déli'në' gaca ca na' të'ënnë'.

24 Ní'irö Pilato guchúguië' queë' Jesús, para gaca queë' ca na' ta'nabë'. 25 Busanë' quégaquië' bönni' na' nadzunë' lidxi guié tu' gudíl-lalenë' yúlahui', en bëtië' bönachi, bönni' na' chigula'nabë', ate' budödë' Jesús para gaca queë' ca na' të'ënnë'.

Dë'ë Jesús lë'e yaga cruz

(Mt. 27:32-44; Mr. 15:21-32; Jn. 19:17-27)

26 Cate' ni' ta'ché'ë Jesús tsöjdá'gaquië' Lë' lë'e yaga cruz, gula'zönë' Simón, bönni' yödzo Cirene, suzë'ë la' guixi', ate' gula'xóë' yen zxicjë' yaga cruz na' para gu'ë le, en tsejë' cúdzu'lë' Jesús.

27 Bönachi zián, enca' yugu' nigula söjnógaca Jesús, ta'bödxinu nigula na', en ta'bödxie' yéchi'nu queë' Lë'. 28 Ní'irö buécjë' Jesús, en ruyúë' légacanu, ate' rë' légacanu:

—Libí'ili' nigula Jerusalén. Biti' cödxili' quia' neda', pero guli'cödxie' que quézili', en quégacabi' zxi'inili' 29 tu' huadxín dza ila'nná: “Bica' bágaca

yugu' nigula huödx, en nigula biti' guluá'anu-bi' bí'ido', en biti' bulu'gádxí'nu-bi' bí'ido'." ³⁰ Ní'irö ila'sí lógaca ila'nná bönachi, ilé' yugu' guí'a sibi: "Guli'dubága' netu'", en ilé' ca' yugu' guí'ado': "Guli'cachi' netu'." ³¹ Channö caní tuné' quia' neda', naca' ca tu yaga ya'a, ¿naru' cabí ilúnteré' ca' queé'li', nácali' ca yaga bidxi?

³² Gula'chě'ë ca' chopë' bönni' tuá' dö', para ilútië' légaquië' tsözxön len Jesús. ³³ Cate' bila'dxiné' lataj nazí'i le Calavera, le rnna len didza' xidza' Lataj Que Böga' Ícjaru', bulu'dě'ë Jesús lě'e yaga cruz. Bulu'dě'ë ca' lě'egaca yaga cruz chopë' bönni' tuá' dö'. Tuë' bulu'dě'ë cuita lě'ë ibëla Jesús, en ia'tuë' bulu'dě'ë cuita lě'ë yögöla.

³⁴ Ní'irö Jesús rnné':

—Xuz, buniti lo légaquië', tu' cabí nözguequinë' bi tunë'.

Bönni' röjáquië' gudil-la nacu'ë ni' bulu'lě'ë queëgaquië' le nácuë' Jesús, en bulu'quitjë' le gaca bē' lahui. ³⁵ Bönachi nacuá' ni' tu'yú, en yugu' bönni' dē lu ná'agaquië' bulu'titjë' Jesús, ta'nně':

—Yugu' nu yúbölö busölë' bönni' ni. Na'a ralla' usölá cuinë' channö náquië' Cristo, bönni' gurö cazë' Dios.

³⁶ Yugu' bönni' na' röjáquië' gudil-la bulu'titjë' ca' Jesús. Gula'biguë'ë ga na' zoë', en bulu'gui'jë' Lē nupi zi, ³⁷ ta'nně':

—Channö nacu' Li' bönni' inná bé'enë' bönachi judío, busölá cuinu'.

³⁸ Da' ca' lě'e yaga cruz icjlë' Jesús tu le nazúaj lu guichi lu didza' griego, en lu didza' latín, en lu didza' hebreo, le rnna caní: "Bönni' Rinná Bé'enë'

Bönachi Judío.” ³⁹ Tuë’ bönni’ huiá’ dö’ na’ dë’ë lë’e yaga cruz bulidza zi’ë Jesús, rnnë’:

—Channö nacu’ Li’ Cristo, busölá cuinu’, enca’ netu’.

⁴⁰ Bubi’ë didza’ ia’tuë’ bönni’ huiá’ dö’ na’, en gudil-lë’ luzë’ë na’, rnnë’:

—¿Naru’ cabí rádxinu’-në’ Dios? Lësca’ li’ narugu quiu’ gátu’.

⁴¹ Le nácatë rë’u, le rál-la’sö gaca queëru’ riguí’i rizáca’ru’, ca na’ sa’yéaj dö’ biá’aru’, pero Bönni’ ni, biti’ bi dö’ nu’ë.

⁴² Ní’irö bönni’ ni rë’ Jesús:

—Yöjné neda’ cate’ idxinu’ ga ni’ inná bë’u.

⁴³ Jesús rë’ lë’:

—Le nácatë rea’ li’, na’a dza ni sóalenu’ neda’ lataj lachi quia’.

Ratië’ Jesús

(Mt. 27:45-56; Mr. 15:33-41; Jn. 19:28-30)

⁴⁴ Cate’ bidxín idú huagubidza, guchul-la iduté yödzölió ga bidxinrö idú ridödi xihuö. ⁴⁵ Guchul-la gubidza, ate’ lari’ nal-la’ lu yudo’ biröza’ chopa dí’ilö. ⁴⁶ Ní’irö bë’ë zidzaj didza’ Jesús, rnnë’:

—Xuz, rigu’a lu no’o bö’ naca caza’.

Cate’ budxi gunné’ caní, birúajtë bö’ naca cazë’, gútië’.

⁴⁷ Cate’ bönni’ rinná bé’enë’ bönni’ röjáquië’ gudil-la bilé’enë’ ca na’ guca, gulu’ë Dios yöl-la’ ba, rnnë’:

—Le nácatë bönni’ ni gúquië’ bönni’ tsahui’.

⁴⁸ Cate’ yúgu’të bönni’ nacu’ë ni’ tu’yüë’ bila’lé’enë’ lë na’ guca, yöjhuöjgaquië’ yödzö, ta’gapa’ luchú’ugaquië’ tu’ tu’báninë’. ⁴⁹ Zí’tu’sö bulu’gá’ana yúgu’të nupa ni’ núnbë’gaca Jesús, en

yugu' nigula na' yójacalennu Lë' cate' ni' gudë' luyú Galilea, ate' tu'yúë' lë ni raca.

Rigáchë'ë Jesús yeru ba

(Mt. 27:57-61; Mr. 15:42-47; Jn. 19:38-42)

⁵⁰ Zoë' ca' ni' tu bönni' yödzö Arimatea que luyú Judea, lë' José. Bönni' ni náquië' dxi'a, en tsahui', en nabábalenë' yugu' bönni' yudo' tu'chi'a tu'söröë'.

⁵¹ Biti' benë' tuz nupa na' gula'chugu queë' Jesús gátië', tu' ribözë' ca' José ni le rinná bë'ë Dios.

⁵² Ní'irö guyijë' José na' lahuë' Pilato, en gunabë' lataj u'ë Jesús. ⁵³ Cate' chinuzötjë' Lë', buchölinë' Lë' lari', ate' gulu'ë Jesús yeru ba, le nadaj lë'e guí'a guiöj, ate' lu ba na', cuntu nu nagüí'iguequinë'.

⁵⁴ Dza na' naca dza tu'pë'ë que dza lá'ayi quégaquië' bönni' judío, tu' si' idxín dza na'.

⁵⁵ Yójacanu ca' ni' nigula na' gula'zá'lennu Jesús, cate' ni' gudë' luyú Galilea, ate' bila'lé'enu yeru ba na', en ca na guca, gula'gu'ë Lë' ni'. ⁵⁶ Cate' yójhuó'gacanu yu'u, bulu'pá'anu nōri rilá' zxixi, en yugu' le za rilá' zxixi. Ní'irö bulu'zí' lādxi'gacanu dza lá'ayi na' quégaquië' bönni' judío ca na' rinná bë' xibá queë' Dios.

24

Rubanë' Jesús lu yöl-la' guti

(Mt. 28:1-10; Mr. 16:1-8; Jn. 20:1-10)

¹ Cate' bidxín dza risí lo ia'gadxi dza na', cate' ni' naca zílado', bila'dxinnu nigula na' ra' yeru ba queë' Jesús. Nuá'gacanu yugu' le rilá' zxixi, lë na' chinupá'agacanu, ate' dzágagacanu lé'gacanu ia'bálanu nigula. ² Cate' bila'dxinnu ni', bila'lé'enu chinadúa guiöj na' gudá' ga nu riyaza yeru ba queë'.

³ Cate' gula'yázanu yeru ba na', biti' bulu'dzölinu zoa Xanru' Jesús ni'. ⁴ Cate' ni' ta'bö'önu bö'niga ni'a que lë ni, chopë' bönni' nácugaquië' lari' rëpi yösa bení' la' bila'dxintë' ni', en gula'zuinë' ga na' nacuá'anu. ⁵ Ní'irö guládxinu, en bulu'zötaj ícjagacanu, tu'yunu lu yu, ate' chopë' gubáz lá'ayi na' të' légacanu, ta'nnë':

—¿Bizx que ruguílajli' nu zoa nabán xilataj nu nati? ⁶ Biti' zoë' ni, tu' chibubanë'. Guli'tsöjné lë na' chigudxi cazë' libí'ili' cate' ni' zoë' luyú Galilea. ⁷ Gunnë': "Run bayudxi nu udödi neda', Bönni' Guljë' Bönachi, lu ná'agaquië' bönni' dul-la', ate' ulu'dë'ë neda' lë'e yaga cruz, ate' ubana' cate' gaca tsonna dza."

⁸ Ní'irö yöjnégacanu didza' na' bë'ë Jesús, ⁹ ate' bulu'zá'anu ra' yeru ba na', yöjtíxjöi'iguequinu idxinéajtë' bönni' gubáz queë' Cristo, en ia'zica'rë' ca', ca naca lë na' guca. ¹⁰ Nigula na' yöjtíxjöi'iguequinu bönni' gubáz na' yugu' lë ni, nácagacanu María Magdalena, en Juana, en María, xinë'ë Jacobo, en ia'bál-lanu nigula na' dzágagacanu légacanu. ¹¹ Guléquinë' bönni' gubáz na' tu'ínu didza' chixi, en biti' gula'yéajlë'ë légacanu.

¹² Ní'irö guyasë' Pedro, en carelö sa'yéajë' ra' yeru ba na'. Cate' buyüë' lu ba na', bilé'enë' yugu' lári'sö nacuá'ni', ate' ní'irö bö'ajë' lidxë', rubáninë' ca naca lë na' guca.

Le guca la' nöza ridxintë Emaús
(Mr. 16:12-13)

¹³ La' dza ná'asö söjáquië' chopë', yú'ugaquië' nöza le ridxintë Emaús, le rö'ö ca chopa hora rizá'aru' Jerusalén. ¹⁴ Yú'ugacasë' ca' nöza, tu'ë

didza' ca naca yúgu'të læ na' guca. ¹⁵ Tsanni ni' yú'ugaquië' nõza, tu'ë didza' la' légacasë', gubígui'ë gala' Lë cazë' Jesús, ate' gudálenë' légaquië' tsözxön. ¹⁶ Biti' bulu'únbë'ë Lë' tu' naca ca tu le nabaga' guiöj lógaquië'. ¹⁷ Ní'irö Jesús gunábinë' légaquië', rnnë':

—¿Bizxi didza' na' ru'íli' la' libí'isili' yú'uli' nõza?
¿Bizx que na' ruhu'ínili'?

¹⁸ Bubi'ë didza' bönni' na' læ' Cleofas, rë' Lë':

—¿Nácatso' bönni' zi'tu' lu yödzö Jerusalén, en tuzu' li' biti' nõzinu' læ na' guca néaje nasi ni'?

¹⁹ Ní'irö Jesús rë' légaquië':

—¿Bizxi na' guca?

Të' Lë':

—Lë na' guca queë' Jesús, bönni' Nazaret. Gúquië' bönni' bë'ë didza' uláz queë' Dios, ate' len yöl-la' huáca zxön benë' dxin, en bë'ë didza' lahuë' Dios, en lógaca yúgu'të bönachi. ²⁰ Yugu' bixúz unná bë', len bönni' ta'nná bé'enë' netu' bulu'dödë' Lë', en gulunë' ga nu guchugu queë' gátië', ate' bulu'dë'ë Lë' læ'e yaga cruz. ²¹ Netu' bentu' löza gúquië' Lë' bönni' na' ral-la' huöá'uë' bönachi Israel, pero na'a chiguca tsonna dza cate' gulaca læ ni. ²² Ia'stú, bál-lanu nigula nútsa'gacanu netu' gulunnu ga gurö'ötu' böniga. Yöjácanu ra' yeru ba queë' cate' si' gulén gubidza na'a dza, ²³ en cate' biti' bulu'dzölinu Lë', buduhuöjgacanu, en gulënu netu' bila'lé'enu yugu' gubáz lá'ayi queë' Dios, nupa ni' gulë légacanu zoë' nabanë' Jesús. ²⁴ Ní'irö bal-lë' bönni' luzá'atu' yöjáquië' ra' yeru ba na', en bila'lé'enë' naca ca na' gula'nnanu nigula na', pero biti' bila'lé'enë' Jesús.

²⁵ Ní'irö Jesús gudxë' légaquië':

—Libi'ili', bönni' biti' réajni'ininé'. Nazidi icja ládxi'do'oli' para cabí tséajlë'ëli' yúgu'të le gula'nné' bönni' gulu'ë didza' uláz queë' Dios. ²⁶ ¿Naru' cabí ben bayudxi qui'i sáquë'ë Cristo yugu' lë ni, en tsázië' ga ni' tsépisëtëre'?

²⁷ Ní'irö gusí lahuë' Jesús riguixjöi'iné' légaquië' yúgu'të le ruí'i didza' ca naca queë' le nazúajgaca lu guichi lá'ayi, ca na' gusí lo bë'ë didza' Moisés ga bidxintë yugu' le gula'nné' yúgu'të bönni' gulu'ë didza' uláz queë' Dios.

²⁸ Cate' bila'dxinë' yödzödo' ga na' söjáquië', benë' Jesús ca tu bönni' zéajtëre' zi'tu'. ²⁹ Gulunë' bayudxi ugá'analenë' légaquië', ta'nné':

—Bugá'analen netu', tu' chiridzö' na'a, en chizóa gal-la.

Ní'irö guyázië' Jesús yu'u, en bugá'analenë' légaquië'. ³⁰ Cate' ni' Jesús rö'ë rágulenë' légaquië', gudélë'ë yöta xtila, en gudxë' Dios: “Xclenu'.” Ní'irö buzzuxjë' le, en bë'ë quégaquië'. ³¹ La' ní'isö bidúa lë na' gubaga' guiöj lógaquië', ate' bulu'únbë'ë Jesús, ate' Lë' buniti cuinë' lógaquië'. ³² Ní'irö gulé luzë'ë tuë' ia'tué':

—¿Naru' cabí böála'tica' ládxi'do'oru' tsanni ni' ruí'ilenë' rë'u didza' la' nöza, en cate' ni' ruchila lá'anië' le nazúaj lu guichi lá'ayi?

³³ La' ní'isö gula'zuinë' yöjhuöjgaquië' Jerusalén, ate' yöjxáca'gaquië' nudúbigaquië' idxinéajtë' bönni' gubáz queë' Jesús, en nupa nacuá'len légaquië'.

³⁴ Ní'irö yugu' bönni' na' nacu'ë ni' gulé' chopë' na':

—Chibubán cazë' Xanru', en buluí'i lahuë', ate' bilé'enë' Simón Lë'.

³⁵ Ní'irö chopë' na' gula'guíxjö'ë ca na' guca quégaquië' la' nöza, en ca na' bulu'únbë'ë Jesús cate' ni' buzxuzxjë' yöta xtila na'.

*Bönni' usëda queë' Jesús tu'lé'enë' Lë'
(Mt. 28:16-20; Mr. 16:14-18; Jn. 20:19-23)*

³⁶ Tsanni ni' tu'ë didza' ca nácagaca lë ni, la' yöjsóatë' Jesús gatsaj láhui'lö ga na' nacu'ë, ate' rë légaquië':

—Guli'sóa dxi ládxi'li'.

³⁷ Ní'irö guladxí gula'dzöbinë' tu' téquinë' bixín ta'lé'enë'. ³⁸ Jesús rë' légaquië':

—¿Bizx que rööli' böniga? ¿Bizx que rizá' ládxi'li' yugu' lë ni? ³⁹ Buli'yútsöca' na'a, en ni'a. Neda' caz ni. Guli'cán neda', en buli'yú neda', tu' cabí da' bixín bëla', en bití' yu'u dxita ca ni rilé'eli' naca quia' neda'.

⁴⁰ Ni' ru'isë' ca' didza' ni, bulu'inë' légaquië' në'ë, en ni'ë. ⁴¹ Tu' tu'dzéjaguequinë' bití' gula'yéajlë'ë, en gula'bö'ë baniga. Que lë ni na' Jesús gudxë' légaquië':

—¿Dë queëli' ni le gahua'?

⁴² Ní'irö bulu'nödzejë' queë' láti'do'oba' böla chinégui'ba', en tu quízxi'ba' buz. ⁴³ Guzxi'ë Jesús le, en gudahuë' lógaquië'. ⁴⁴ Ní'irö rë' légaquië':

—Yúgu' lë na' gulaca quia' gulaca ca na' gudxi caza' libí'ili' cate' ni' zóalena' libí'ili', gunniá': Run bayudxi gaca yúgu'të le nazúaj lu guichi lu xibá queë' Moisés, en le gula'nnë' bönni' gulu'ë didza' uláz queë' Dios, en le nazúaj lu guichi nazí'i le Yugu' Salmo, ca ral-la' gaca quia' neda'.

⁴⁵ Ní'irö buzéajni'inë' légaquië' lë na' nazúajgaca lu guichi lá'ayi. ⁴⁶ Rë' légaquië':

—Caní nazúaj lu guichi ca run bayudxi gaca queë' Cristo, qui'i sáquë'ë, en ubanë' lu yöl-la' guti cate' gaca tsonna dza, ⁴⁷ ate' idútë yödzölió ralla' gaca libán ca naca quia' neda' para ulu'bí'i ládxi'gaca bönachi para uniti lahuë' Dios dul-la' nabága'gaquië'. Lu yödzö Jerusalén isí lo gaca libán na' ⁴⁸ ate' libí'i cázali' na' bilé'eli' yugu' lë ni ral-la' gunli' ba nalí que. ⁴⁹ Buli'yútsöca', isól-la'a queëli' le guzxí' lu në'ë Xuza' gunnë' queëli', pero buli'gá'anasö Jerusalén cate' idxinrö queëli' yöl-la' huáca na' za' yehua' yubá.

Ruhuëpë' Jesús yehua' yubá

(Mr. 16:19-20)

⁵⁰ Ní'irö Jesús guchë'ë yugu' bönni' dá'gaquië' Lë', sōjáquië' yödzö Betania, ate' ni' guchisa në'ë, en bulidza tsáhuë'ë légaquië'. ⁵¹ Tsanni ni' rulidza tsáhui'së' ca' légaquië', buzá'atë' ga na' nacu'ë, buëpë' yehua' yubá. ⁵² Gudödi gula'yéaj ládxi'gaquië' Lë', lu yöl-la' rudzeja quégaquië' yöjhuójgaquië' Jerusalén. ⁵³ Gula'cuá'tica'së' chila yudo', ta'gu'ë Dios yöl-la' ba, en tun zxönë' Lë'. ¡Ca' naca!

CXXX

Didza' cubi rucá'ana tsahui'
**New Testament in Zapotec, Rincón (MX:zar:Zapotec,
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

58bf86df-ae22-508c-81dc-936dbf138c25